

Buk më Nwönö Cïk

Köp na tye i Buk më Nwönö Cïk

Buk ni Muca ënë öcöö.

Buk më Nwönö cïk obedo buk më abic ka Muca. Buk ni Muca ënë öcöö i kin mwaka 1440 b.c., kadi jö nökenë thamö ni ëcöö i mwaka 1260 b.c.

Köp na tye i buk ni:

Buk ni tye ki köp na pol na Muca ötwakö both jö Icarael na bara gin öya ki i bar më Moab, më ngölö kulo Jordan ëka më dönyö i Kanaan. Köp ni makö wothgi na bor i thim, ëka köp ni gini obedo më po wigi i kom gen k'Obanga. Nwönö Cïk po wi jii i kom gin na mitëre i cïkëre n'Obanga oketho ki jö Icarael: ka jii bino winyo cïk ka Rwoth, gin bino nwongo gum i lobo na nyen, ëntö ka gin ba bino winyo, ebino ngölö niggi köp ëka ebino ryëmögi ökö ki i lobo (cura 4:1-40, cura 8 ëka 27-30). Muca öcükö cwiny jii më ketho gen-gi ëka më winyo Obanga ëka më mire i kom tic n'Obanga ömöö bothgi. Ën ötëlögi i wörö Obanga ëka ki wero wer. Muca oketho Yocua më leeno kakarë ëka dong öcïdhö malö i wi kidi Nebo, ki kunön ën öripö lobo n'Obanga öcïkö më miögi. Muca öthöö kunön i wi kidi na mwaka merë tye 120, ëka eiko ën i Moab.

Köp na pïrë tük i buk ni obedo gen k'Obanga, tükö merë më larö ëka më gwökö jögë. Obanga onwongo tye kanya acël ködgi naka thon i karë na kwö tük, ëka i dyere më pëkögi, ën ömiögi gen pi karë më anyim. Jö k'Obanga myero öyër gini nga na gin bino lübö ëka më mire kën-gi dökï më geno ëka më winyo Obanga. Köp na Yecu okobo cön

nī (cìk na pīrē tēk) na nwongere ì cura 6:5: “Mar Rwoth Obangani kī cwinyi kībēc, kī tiponi kībēc ēka kī tēkōni kībēc.”

Cìk mē yaa kī ì Koreb

¹ Man ēnē kōp na Muca ötwakö both jö Icarael kībēc ì löka kulo Jordan kī kukidē ì karē na gīn tye ì thim, ì Araba n'opimere kī Cup, ì kin Parān kī Topel, Laban, Kajerot ēka Dijabu.

² (Tero nīnō apar acēl mē woth, yaa kī ì Koreb mē cīdhō yo Kadec Barnea nakun ewok kī ì yoo mē Kidi Ceir.)

³ Ì nīnō dwe acēl mē dwe mē apar wie acēl, ì mwaka mē pyer angwēn, ēnē Muca okobo both jö Icarael cìk kībēc n'onwongo Rwoth ömīö bothe na makö komgī.

⁴ Man ötimērē kinge na ēn ölöö Cikon rwoth ka jö Amor, n'onwongo löö löc ì Kecbon, ēka Og rwoth mē Bacān, n'onwongo löö löc ì Acitarot ēka Edrei.

⁵ Ì löka kulo mē Jordan kī kukidē mē lobo mē Moab, Muca öcakö gönyö tyēn cìk nī nakun kobo nī:

⁶ Rwoth Obanga onu ötwak kod onu kī ì Koreb* nī, “Un dong ibedo ì thē kidi nī pī karē na lac.

⁷ Yaa unu ēk icak unu wothwu, icīdh unu yo lobo n'otingere ka jö Amor, ēka jö kībēc na cwök ködgī na tye ì Araba, ì kite, kī kuthō thē kite, ì Negeb ēka ì lobo n'ögürö dhō nam, ì lobo ka jö Kanaan ēka ì Lebanon, naka ì kulo na thwönē, n'obedo kulo mē Euparate.

* **1:6 Koreb** man ēnē nyīng nōkēnē mē kidi Cinai.

8 Nën! An dong atyeko miöwu lobo ni. Cìdh unu èk ìgam unu lobo na Rwoth okwongere nì ebino miö both kwaröwu Abraam, Icaka, Jakob èka èkwaëgì na bino lübögì.”

Muca oketho èngöl-köp

9 Ì karè nön, Muca okobo bothgì nì, “An ba dökì arömö cobo pèköwu kèna.

10 Rwoth Obangawu dong ömïö ìnya unu na pol rwök, ènè ömïö tin ipol unu calö cèr na tye ì polo.

11 Èk Rwoth, Obanga ka kwerewu, ömïïwu ìmedèrè tyèn elip acèl èka ömïïwu gum kite na èn öcìkò ködè!

12 Èntö an atwèrö cobo pèköwu kèna nìngö nakun dong ìdökö unu yèc na pèk rwök, èka kì köp kìbèc na tye ì kinwu?

13 Yèr unu jö mökö na ryèk, na nìang èka jö n'èwörögì kì ì kom kakawu acèlacèl, èka an abino kethogì na calö ètèlawu.”

14 Un ibino ìgamö nìna nì, “Gin na in ikobo tye na bër na wan myero ètìm.”

15 Cè an akwanyö ètèla mè kakawu, èryèkö èka jö n'èwörögì. An akethogì mè bedo kì lóc ì komwu na calö edite ka jö elip, edite ka jö mia acèl, edite ka jö pyer abic, edite ka jö apar èka na calö ètèla mè kaka.

16 Ì karè nön an acìkò èngöl-köpwu nì: Winy unu pido na tye ì kin utmegowu èka ìngöl unu köp n'atìr, kadì köp tye ì kin omego n'obedo dhanö mè Icarael onyo arok mörö na bedo bothe.

17 Kür ilengere unu ì ngölö-köp; un ibino winyo köp ka ngat na tìdì èka mè ka ngat na dit na röm aröma. Kür ibed unu kì lworö ì kom ngat mörö,

pïen ngölö-köp obedo më k'Obanga. Kel unu köp mörö na tæk rwök kî bothwu ëka an abino winyo.

¹⁸ İ karë nön an aciköwu i kom jami kibëc na un onwongo myero itim.

*Eoro ëröth piny
(Wel 13:1-33)*

¹⁹ Cë wan ëya ökö kî i Koreb kite na Rwoth Obangawa öciköwa ködë. Wan ewok i thim na lac na un inënö ëka ëcïdhö yo lobo n'otingere ka jö Amor cë ethuno i Kadec Barnea.

²⁰ Cë an akobo bothwu nî, “Un ithuno i lobo ka jö Amor n'otingere, na Rwoth Obanga onu tye ka miö both onu.

²¹ Nën, Rwoth Obangawu ömïöwu lobo. Cïdh unu ëk igam unu lobo kite na Rwoth Obanga, Obanga ka kwerewu, okobo niwu. Kür ibed unu kî lworö; kür cwinywu thon opodhi.”

²² Cë un kibëc ibino unu botha ëka ikobo unu nî, “Eru eor cwö mörö më cïdhö anyim ëk öcïdh öröth gîni lobo nî onu ëka odwongi gîni köp both onu i kom yoo na onu myero ëlubi ëka peci na onu ebino dönyö ië.”

²³ An athamö nî man obedo thama na bër; cë an ayërö jö apar ariö, ëcwö acël kî i kaka acëlacël.

²⁴ Gîn obino öya ëka öcïdhö gîni i lobo n'otingere, cë obino gîni naka i ora më Ecikol ëka öröthö gîni.

²⁵ Gîn ökwanyö nyig yen mökö më lobo nön ëka okelo gîni bothwa. Gîn odwongo köp bothwa nakun kobo gîni nî, “Lobo na Rwoth Obanga onu cwök miö both onu obedo lobo na bër.”

Jö Icarael öjëm i kom Rwoth

²⁶ Ëntö un onwongo ba ìmütö unu cìdhö yo malö; un ijëm ì kom cìk ka Rwoth Obangawu.

²⁷ Un ìngüngüta kì ì kēmawu nakun ikobo unu nì, “Rwoth dagwa; èn ökwanyöwa kì ì Ejip më mïöwa ì cìng jö Amor èk otyekwa ökö.

²⁸ Wan ebino cìdhö yo kwene? Utmegowa ömïöwa erwenyo genwa ökö. Gìn kobo nì, ‘Jö më lobo nön tèk èka boco gini na lööwa ökö; peci tye na döngö, na cël mërë tye naka malö ì wi polo. Wan thon ènënö jö Anak kunön.’ ”

²⁹ Cë an akobo bothwu nì, “Kür ibed unu kì myël kom; kür ilwor unugi.

³⁰ Rwoth Obangawu, na ènë tëlö nyimwu, ènë bino lwëny pìrwu, kite na un inënö èn ötimö ì Ejip,

³¹ èka ì thim. Kunön un inënö kite na Rwoth Obangawu ögwököwu ködë, na calö kite n'apap tingo kì wode. Èn ötimö man ì kabedo kibëc na un icìdhö yo ië naka ithuno unu ì kabedo nì.”

³² Ëntö kì kom gín na kibëc n'Obanga ötimö un pod ikwërö më bedo kì gen ì kom Rwoth Obangawu,

³³ n'obino ötëlö nyimwu ì wothwu, kì mac ì kiwor èka kì pöl ì kiceng, më nwongo kabedo niwu èk ibed unu ië èka më nyutho niwu yoo na myero ilüb unu.

³⁴ Ì karë na Rwoth owinyo köp na un ikobo, èn obedo k'akëmö èka okwongo kwong nì:

³⁵ “Ngat mörö më run nì na rac ope kadì k'acël na bino nënö lobo na bër na an akwongara më mïö both kwerewu,

³⁶ na path kì Kaleb wod ka Jepune. Èn bino nënö lobo nön. An abino mïö èn èka èkwaë mërë lobo

na en bino nyönö kī tyēnē, piēn en obedo ka lübö Rwoth kī cwinye kibēc.”

³⁷ Akēmō obino ōmakō Rwoth thon i koma pīrwu. Ēn okobo nīna nī, “In thon ba ibino dōnyō kunōn.

³⁸ Ēntō Yocua wod ka Nun n'obedo alüb kori ēnē bino dōnyō. Dīi cwinye, piēn en bino tēlō jō Icarael mē gamō lobo nōn.”

³⁹ Cē Rwoth okobo both onu kibēc nī, “Ēthīnōwu na pod thūthīnō gīnī na un ikobo nī ebino terogī i opīi ēka na bara ngeo gīnī poko gin na bēr kī kom gīn na rac, gīn ēnē bino dōnyō kunōn. An abino mīōgī ēka gīn bino gamō.

⁴⁰ Ēntō un, lōkērē ēka idök unu i thim i yoo na cidhō yo Nam na Kwar.”

⁴¹ Cē un igamō nīna nī, “Wan ēbalō i nyim Rwoth. Wan ebino cidhō ēka ēlwēnyō kite na Rwoth Obangawa ōcīkōwa kōdē.” Cē ngat acēlacēl oruko jami mē lwēny nakun thamō nī cidhō yo lobo n'otingere obedo gīn na yot.

⁴² Ēntō Rwoth okobo nīna nī, “Kob nīgī, ‘Kūr icīdh unu malō mē lwēny piēn an ba abino woth kodwu ēka langwu bino lōönōwu.’ ”

⁴³ An atwak kodwu, ēntō un ba iwinyo. Un ijēm i kom cīk ka Rwoth ēka pī awakawu un icīdhō i lobo n'otingere.

⁴⁴ Jō Amor n'onwongo bedo gīnī kanya otingere nōn obino i komwu; gīn ōryēmō kōrwu calō kic ēka ōlwēnyō i komwu kī i Ceir naka othuno i Korma.

⁴⁵ Cē un idwogo ēka ikok unu i nyim Rwoth, ēntō en ba owinyo kokowu ēka ba olengo ithe i kōpwu.

⁴⁶ Pī manōn, un idong i Kadec nīnō na pol—pī karē kibēc na un ibedo kunōn.

2

Karë na jö Icarael obedo ködë i thim

¹ Cë wan ëlökërë ëka ëcïdhö i thim, i yoo na dök yo Nam na Kwar, kite na Rwoth öcika ködë. Wan ebedo ka wirë i lobo më Ceir n'obedo lobo n'otingere pï karë na lac.

² Cë Rwoth okobo nïna nï,

³ “Un dong ibedo ka wirë i lobo ni n'otingere pï karë na lac; kobedini dong lökërë unu yo kukuju.

⁴ Mïi jïi cïk ni gïni: ‘Un icwök unu wok i lobo ka utmegowu n'obedo ëkwaë k'Ecau, na bedo gïni i lobo Ceir. Gïn bino bedo kï lworö i komwu, ëntö myero igwökërë unu rwök.

⁵ Kür icak unu lwëny i komgï, piën an ba abino mïö lobogï mörö bothwu, kadï thon kany mörö na dhanö twërö cung ië. An amïö lobo n'otingere më Ceir both Ecau na calö mëgë.

⁶ Un ibino wilö cem më acama ëka pii më amodha kï bothgï.’ ”

⁷ Rwoth Obangawu ömïöwu gum i kom tic kïbëc më cïngwu. Ën ögwököwu i wothwu i thim ni na lac. I mwaka pyer angwën ni Rwoth Obangawu obedo ka gwököwu, ëka gin mörö ope n'orem kï bothwu.

⁸ Cë wan ëcïdhö ëkadhö utmegowa n'obedo ëkwaë k'Ecau, na bedo gïni i Ceir. Wan ëlökërë kï i yoo më Araba na yaa kï i Elat ëka Ejion Geber, cë ëcïdhö i yoo na dök yo thim më Moab.

⁹ Cë Rwoth okobo nïna nï, “Kür icïdh unu both jö më Moab kï gero onyo icak unu lwëny i komgï, piën an ba abino mïöwu lobogï mörö. An atyeko mïö Ar both ëkwaë ka Lot na calö mëgï.”

¹⁰ (Jö Emim onwongo bedo gini kunön cön; gin obedo jö na tek eka pol gini rwök nakun boco gini calö jö Anak.

¹¹ Jö ni ekwanögi i kom jö Repa calö jö Anak, entö jö Moab cwodogì nì jö Emim.

¹² Jö Kori onwongo cön bedo gini i Ceir, entö ekwaë k'Ecau obino öryëmögi ökö. Gin otyekogì ökö kibëc kii nyimgi eka obedo gini i kabedogì kite na jö Icarael ötimö ködë i lobo na Rwoth ömïögi na calö mëgi.)

¹³ Eka Rwoth okobo nì, “Kobedini dong yaa unu malö, ingöl unu ora më Jered.” Cë wan engölö ora.

¹⁴ Cakërë i karë na wan ëya ködë kii i Kadec Barnea naka engölö i ora më Jered, onwongo dong römö mwaka pyer adek wie aboro. I karë nön cwö kibëc më run nön n'onwongo obedo gini elwëny obino öthöo gini ökö, kite na Rwoth onwongo okwongere ködë bothgi.

¹⁵ Cing Rwoth onwongo tye i komgi naka otyeko jö më run nön kibëc kii i kabedogì.

¹⁶ I karë na jö kibëc n'onwongo obedo gini elwëny öthöo othum ökö,

¹⁷ Rwoth okobo nina nì,

¹⁸ “Tin myero iwok unu kii i wang lobo më Moab na cwök kii pacö më Ar.

¹⁹ Entö ka ibino unu na cwök kii jö Amon, kür icidh unu bothgi kii gero onyo icak unu lwëny i komgi, piën an ba abino miöwu lobo mörö n'obedo më ka jö Amon. An dong atyeko miö both ekwaë ka Lot na calö mëgi.”

²⁰ (Manön thon onwongo ecwodo nì lobo ka jö Repa, n'onwongo bedo gini kunön; entö jö Amon

cwodogì nī jö Jamjumim.

²¹ Gìn onwongo obedo jö na tēk ēka pol gīnī rwök nakun boco gīnī calö jö Anak. Rwoth obino otyekogì kibēc kī ī nyim jö Amon, n'öryēmögì ökö ēka obedo gīnī ī lobogì.

²² Man ēnē kite na Rwoth ötimö ködē thon ī kom ēkwaē k'Ecau n'onwongo obedo gīnī ī Ceir, ī karē na ēn otyeko jö Kori ökö kī ī nyimgì. Cē ēkwaē k'Ecau ögamö lobogì ēka oleo gīnī na pod bedo gīnī iē naka tin.

²³ Ēka pī jö Abi n'obedo gīnī ī peci na thithinö naka othuno ī Gaja, jö Kaptor n'obino gīnī kī ī Kaptor otyekogì ökö ēka obedo gīnī ī kabedogì.)

Ēlöö Cikon rwoth mē Kecbon

²⁴ “Kinge na dong onu ewok ī Moab, Rwoth okobo both onu nī, ‘Yaa malö, icak unu dong ngölö ora mē Arnon. Nēn! An atyeko mīö Cikon dhanö mē Amor, rwoth mē Kecbon, kanya acēl kī lobo mērē ī cingwu. Cīdh unu anyim ēk ilwēny unu ī kome ēka igam unu lobo.

²⁵ Ī nīnō na tin, an abino mīö koyo öny ī kom rok kibēc na bedo ī wi lobo nakun lworo makögì. Gìn bino winyo köp ī komwu ēka komgì bino myēl nakun cwinygì podho pīrwu.’

²⁶ “Cē an aoro jīī ī thim mē Kedemot both Cikon rwoth mē Kecbon kī köp mē kuc, nakun akobo nīnē nī,

²⁷ ‘Yee nīwa mē wok ī loboni. Wan ebino wok nakun ēlübö yoo kēkēn. Wan ba ebino lōkērē yo kucem onyo yo kucam.

²⁸ Cadh nīwa cem mē acama ēka pīī mē amodha kī wel mē ryal. Yee nīwa ewok kī tyēnwa kēkēn—

29 kite n'ëkwaë k'Ecau na bedo gĩnĩ ĩ Ceir ëka jö Moab na bedo gĩnĩ ĩ Ar ötimö ködë—naka wan ëngölö kulo Jordan yo lobo na Rwoth Obangawa tye ka miöwa.'

30 Ëntö Cikon rwoth më Kecbon ökwërö ökö nĩ wan kür ewok na cwök ködë piën Rwoth Obanga onwongo ömöö ën obedo kĩ cwiny na nwang ëka kĩ cwiny na tæk ëk ëmüi ën ĩ cingwu kite na dong ötimö ködë.

31 “Rwoth okobo nĩna nĩ, ‘Nën, an dong acakö miö Cikon ëka kĩ lobo mërë bothwu. Cak unu dong gamö lobo mërë na calö mewu.’ ”

32 ĩ karë na Cikon ëka acikari mërë kibëc obino gĩnĩ më lwëny ĩ komwa kĩ ĩ Jakaj,

33 Rwoth Obangawa öcakö miö ën ĩ cingwa ëka eneko ën kanya acël k'awope mërë ëka k'acikari mërë kibëc.

34 ĩ karë nön wan ëgamö peci mërë kibëc. Etyekogĩ—cwö, mon ëka ëthĩnö. Ngat mörö ope n'öbwöth na kwö.

35 Wan etero lĩm na kwö na wan ëyakö ëk ödök mëwa, kanya acël kĩ jami nököne n'ëyakö kĩ ĩ peci kibëc na wan ëmaögĩ.

36 Cakërë kĩ ĩ Aroer na tye ĩ nget ora më Arnon ëka kĩ ĩ pacö na tye ĩ ora, më thuno ködë naka ĩ Gilead, pacö mörö ope na tæk n'ëgërö malö rwök na maö ölööwa. Rwoth Obangawa ömöögi kibëc ĩ cingwa.

37 Ëntö un ba ibino iwok unu na cwök kĩ lobo ka jö Amon, kadĩ lobo na tye ĩ dhö kulo më Jabok onyo peci mörö na tye ĩ lobo n'otingere, onyo kanya Rwoth Obangawa öjüköwa kĩ ië.

3

Èlöö Og rwoth më Bacan (Wel 21:31-35)

¹ Cě wan dökĩ èlökèrè, èdök malö ì yoo na cìdhö yo Bacan; Og rwoth më Bacan obino ì komwa k'acikari mërè kībēc më bino lwëny ködwa ì Edrei.

² Èntö Rwoth okobo nīna nī, “Kūr ibed kī lworo ì kome, piēn an atyeko mīö èn bothi k'acikari mërè kībēc èka kī lobo mërè. In ibino tīmō ì kome kite na yam itīmō ì kom Cikon rwoth ka jō Amor n'onwongo löö Kechbon.”

³ Cě Rwoth Obanga onu thon ömīö Og rwoth më Bacan k'acikari mërè kībēc ì cīngwa. Wan enekogĩ kībēc na ngat mörö ba öbwöth na kwö.

⁴ Ì karè nōn wan ëmaö peci mërè kībēc. Pacö mörö ope kī ì peci pyer abicēl na wan ba ëmaö kī bothgĩ—lobo kībēc më Argob na tye ì thē löc ka Og rwoth më Bacan.

⁵ Peci nī kībēc onwongo ècēlö kī cēl na tēk n'otingere malö rwök èka dhö wangkac gīnī n'eloro kī lote n'obedo nyweny, mēd kī peci na thīthīnō na pol na ba ècēlögĩ.

⁶ Wan ebino etyeko peci kībēc, kite na wan ebino ètīmō ì kom Cikon rwoth më Kechbon—neko cwö kībēc, mon èka èthīnō.

⁷ Èntö līm na kwö èka jami kībēc na wan èyakö kī ì pecigĩ, wan eterogĩ èk obed mēwa.

⁸ Cě ì karè nōn wan èkwanyö lobo nōn kī ì cīng rwodhi ariö ka jō Amor na tye kukidē më kulo Jordan, cakèrè kī ì ora më Arnon naka othuno ködè ì kidi më Kermon.

⁹ (Jō Cidon cwodo Kermon nī Cirion; èka jō Amor cwodo nī Cenir.)

¹⁰ Wan ëmaö peci kībēc na tye ì lobo n'otingere malö n'öpèdhërë, lobo Gilead kībēc ëka Bacan naka othuno ködë yo Caleka ëka Edrei, peci na tye ì thë löc ka Og rwoth më Bacan.

¹¹ (Og rwoth më Bacan ënë onwongo odong kënë kī kin jö Repa. Ëka ëtana mërë onwongo ëyübö kī nywenyo. Bor mërë tye mita angwën ëka lac mërë mita ariö. Pod tye ì Raba ì pacö ka jö Amon.)

Poko lobo na tye kukidë kulo Jordan
(Wel 32:1-42)

¹² Ì karë nön na onu ëmaö lobo ni, an abino amïö lobo na tye kukuju më Aroer both jö Reuben ëka jö Gad, na tye ì ora më Arnon, kī nucu lobo n'otingere më Gilead, kanya acël kī peci mërë.

¹³ Lobo Gilead n'odong ëka lobo Bacan kībēc, na ënë lobo ka rwoth Og, an abino amïö both nucu kaka ka Manace. (Lobo kībēc më Argob na tye ì Bacan n'onwongo ecwodo nī lobo ka jö Repa.

¹⁴ Jair, akwar Manace, ökwanyö lobo Argob kībēc na cīdhö naka ì wang lobo ka jö Gecur ëka jö Maakat; ebino ëcakö kī nyīngë, ëk naka tin Bacan ecwodo nī Kabot Jair.*)

¹⁵ Ëka an amïö Gilead both Makir.

¹⁶ Ëntö both jö ka Reuben ëka jö ka Gad amïö lobo n'öcakërë kī ì Gilead cīdhö ködë naka ì ora më Arnon (dyere kulo ënë obedo wang apoki mërë) naka othuno ködë ì kulo më Jabok, na ënë wang apoki lobo ka jö Amon.

¹⁷ Wang apoki mërë kī kuthö onwongo tye ì kulo Jordan na tye ì Araba, cakërë kī ì nam më Kineret†

* **3:14 Kabot Jair** gönyö nī peci më Jair. † **3:17 Nam më Kineret** ecwodo thon nī Nam më Galilaya.

naka othuno ködë i nam më Araba (nam më Kadö) na tye i lobo na tye i kor kidi më Piciga na tye ki kukidë.

¹⁸ I karë nön an aciköwu nakun akobo ni: “Rwoth Obangawu ömiöwu lobo ni ëk igam unu obed mewu. Ëntö jö na mewu kibëc na tük i lwëny myero öngöl gini Jordan nakun nwongo orukere gini ki jami lwëny më cidhö ködë löka i nyim utmegowu jö Icarael.

¹⁹ Ëntö monwu, ëthinäwu, ëka limwu na kwö na pol twërö dong gini i peci na an amiöwu.

²⁰ Myero ilwëny unu naka ka Rwoth ömiö utmegowu yweo kite n'ömiöwu ködë, na gin thon onwongo lobo na Rwoth Obangawu bino miögi i löka kulo Jordan. Kinge manön, ngat acëlacël twërö dök cen i lobo mërë na dong amiöwu.”

Ëjükö Muca kür öngöl kulo Jordan

²¹ I karë nön, an acikö Yocua ni, “In inënö ki wangi gin na kibëc na Rwoth Obangani ötimö i kom rwodhi ariö ni. Rwoth bino timö ni kömanön thon i kom löc kibëc na un ibino thuno ië ka ipoth unu yo kanya un itye ka cidhö ië.

²² Kür ilworgi; Rwoth Obangawu kikokome bino lwëny pirwu.”

²³ I karë nön an akwaö Rwoth ni,

²⁴ “Rwoth Obanga, in icakö nyutho both aticni dit na meg iëka ki tüköni. Obanga mënë na tye i wi polo onyo i wi lobo na twërö tio tic më aura kite na in itio ködë?

²⁵ Wëk acidh anën lobo na bër na tye yo löka kulo Jordan, lobo na bër n'otingere ëka kite më Lebanon.”

²⁶ Ëntö Rwoth ökēcö i koma pīrwu ēka onwongo ba dök twērö winyona. Cē Rwoth okobo nī, “Manön örömö, kür dōkī itwak kōda i kom köp nī.

²⁷ Apē iīdh malö i wi kidi mē Piciga, cē inēn yo kuthö ēka kukuju, kukwap ēka kukidē. Nēn lobo kī wangi, piēn in ba ibino ngölö kulo Jordan.

²⁸ Ëntö cìk Yocua, iīi cwinye ēka imīi ēn tēk cwiny; piēn enē bino poth yo lōka ca nakun tēlō jō nī, cē bino miōgī gamö lobo na in ibino nēnō.”

²⁹ Cē wan ebēdo i ora na cwök kī Bet Peor.

4

Muca öcükö cwiny jö Icarael mē gwökö cìk

¹ Kobedini un jö Icarael, winy unu cìk kibēc na an abino pwoyowu. Gwökgī ēk ibed unu na kwö ēk idöny ēka igam unu lobo na Rwoth, Obanga ka kwerewu, tye ka miöwu.

² Kür imēd unu köp mörö i kom cìk na an aciköwu ēka kür ikwany unu köp mörö kī iē, ëntö gwök unu cìk ka Rwoth Obangawu kite na an amiöwu ködē.

³ Un inēnō kī wangwu gin na Rwoth ötīmō i Baal Peor. Rwoth Obangawu obino otyeko jö kibēc na wörö Baal mē Peor kī i kinwu.

⁴ Ëntö un kibēc na pod iketho genwu i kom Rwoth Obangawu pod itye unu na kwö naka tin.

⁵ Nēn! An dong atyeko pwoyowu cìk kibēc kite na Rwoth Obangana öcika ködē, ēk igwök unugī i lobo na un icwök dönyö iē mē gamö dökö mewu.

⁶ Gwök unu na bër, piēn manön enē bino nyutho ryökö ēka ngecwu both rok, na bino gīnī winyo cìk nī kibēc cē kobo nī, “Adyer, rok na dīt nī obēdo gīnī jö na ryök rwök ēka nīang gīnī.”

⁷ Rok mënē na dit na tye k'obangagī na cwök ködgī, kite na Rwoth Obanga onu bedo na cwök kod onu i karē kibēc na onu èlégō bothe?

⁸ Rok mënē nökēnē na dit, na tye kī cīk n'atīr gīnī na calō man na tin an atye ka ketho i nyimwu?

⁹ Èntō gwökērē unu na bër, kūr imīi wiwu owil ökö kī kom gin na un inēnō kī wangwu, onyo kūr imīgī orweny ökö kī i cwinywu pī karē mē kwōwu kibēc. Pwony unu cīk ni both èthīnōwu ēka both èthīnōgī thon.

¹⁰ Po unu i kom nīnō na un icung i nyim Rwoth Obangawu i Koreb, i karē na èn okobo nīna nī, “Gūr lwak i nyima èk owiny gīnī köpna èk opwony gīnī kite mē wörōna pī karē na gīn pod tye na kwō i wi lobo èk opwony gīnī both èthīnōgī.”

¹¹ Un ibino na cwök ēka icung unu i tyēn kidi, nakun wi kidi lyēl kī mac naka i polo, k'edou n'ocido na cōl ēka pīny na cōl cuc.

¹² Cē Rwoth ötwak kodwu kī i mac. Un iwinyo köp èntō ba inēnō unu kome; dwōn kēkēn ènē owinyere.

¹³ Èn okobo niwu cīkērē mērē, cīk apar, na èn öcīkōwu mē gwökō ēka öcōögī i kom kite ariō n'apada.

¹⁴ Èka Rwoth öcīka i karē nōn mē pwonyowu kī cīk kibēc na èn öcīka ködē, èk igwök unu i lobo na un icīdhō gamō mē bedo mewu.

Cìk na makō cal jwogi

¹⁵ Myero igwökērē unu rwök pīen ba inēnō unu cal gin mörō i karē na Rwoth ötwak kodwu i Koreb kī i mac na lyēl.

16 Kür ibal unu më yübö cal jwök pîrwu kenwu, cal gin mörö kékên na un iyübö, kadî ëyübö na cal k'ëcwö onyo dhakö,

17 onyo na cal kî lee mörö na bedo i wi lobo onyo wînyü mörö na ngwëcö malö i wi yamö,

18 onyo gin mörö na kwö na wotho i wi ngöm onyo rëc mörö na tye i öd pii pîny.

19 Ëka ka itingo wangi malö i polo cë inënö ceng, dwe ëka cër—kî jami kîbëc na tye i polo—kür imîi gin mörö öywa thamawu më ryeberë pîny i nyingî ëka më wörö jami na Rwoth Obangawu ömiö pî rok kîbëc nökênë na tye i thë polo.

20 Ëntö Rwoth ölaröwu ëka ökwanyöwu ökö kî i lobo Ejip, n'onwongo cal kî keno theth, më bedo jögë na pîrgî tæk kite na un itye ködë kobedini.

21 Akëmö ömakö Rwoth i koma pîrwu, cë okwon-gere nî an ba abino ngölö kulo Jordan ëka dönyö i lobo na bër na Rwoth Obangawu bino mîöwu më bedo mewu.

22 An abino thöö i lobo ni; an ba abino ngölö kulo Jordan; ëntö un icwök ngölö kulo yo löka ëka ibino unu gamö lobo na bër më bedo mewu.

23 Gwökërë unu ëk kür wiwu owil kî cikërë ka Rwoth Obangawu na ën öcikërë kodwu. Kür iyüb unu cal jwök mörö pîrwu na cal kî gin mörö na yam Rwoth Obangawu öcikö nî kür itîm unu.

24 Pîën Rwoth Obangawu cal kî mac na wangö pîny, ën obedo Obanga na nyek.

25 I karë më anyim, ka dong inywölö unu ëthînö ëka ëkwaëwu cë ibedo unu i lobo pî karë na lac, kür ibal unu kî yübö cal jwök mörö kékên. Man obedo gin na rac i wang Rwoth Obangawu ëka bino mîö

akēmō makō ēn ī komwu.

²⁶ An tin acwodo polo ēka lobo mē bedo caden ī komwu nī ibino unu thōō piōpiō kī ī lobo na un itye ka ngölō kulo Jordan mē gamō. Un ba ibino bedo kunōn pī karē na lac ēntō ebino tyekowu ökō.

²⁷ Rwoth bino kēthōwu ökō ī kin rok na papath. Jō na nōnōk kēkēn ēnē bino dong na kwō ī kin rok na Rwoth bino terowu iē.

²⁸ Kī kunōn un ibino wörō obanga na dhanō öyübō ayüba kī cīngē kī ī kom yen ēka kite, na ba rōmō neno, ba winyo köp, ba cemo ēka ba ngweo gin mörō.

²⁹ Ēntō ibino unu rangō Rwoth Obangawu kī kunōn, ibino unu nwongo ēn ka īrangō unu kī cwinywu kībēc ēka kī tipowu kībēc.

³⁰ Ka itye unu ī pēkō na jami nī kībēc ötimērē ī komwu, cē kinge, ibino unu dwogo both Rwoth Obangawu ēka ibino bedo unu kī winy ī kome.

³¹ Piēn Rwoth Obangawu obedo Obanga na nyakīca; ēn ba bino wēkō onyo tyekowu onyo wie ba bino wil kī cīkērē mērē kī kwerewu, na ēn omoko bothgī kī kwong.

Rwoth ēnē Obanga

³² Kobedini peny unu pī karē n'opoth anged, na bara ēnywölōwu, cakērē ī karē n'Obanga ocweo dhanō ī wi lobo; cak penyō kī ī acaki lobo naka ī ajiki. Tye gin mörō na dit rwök na calō man n'ötimērē, onyo gin mörō na cal ködē n'obino owinyere?

³³ Tye rok mörō na yam owinyo dwōn Obanga na twak kī ī mac kite na un iwinyo ködē ēka pod tye gīnī na kwō?

³⁴ Onyo obanga mörö tye n'ötēmō kwanyō rok mörö mē bedo mēgē kēnē, kī ī kin rok nōkēnē nakun tēmō cwinygī k'anyuth mē tango ēka gin mē aura gīnī, kī lwēny, kī tēkō ēka kī twērō, kī thwōn lworō na dwong na rōm kī gin na Rwoth Obangawu ötīmō niwu ī lobo Ejip nakun un itye ka nēnō kī wangwu?

³⁵ Enyutho jami ni bothwu ēk inge unu nī Rwoth ēnē Obanga; ba dōk tye Obanga mörö nōkēnē.

³⁶ Ēn ömīō iwinyo unu dwōnē kī ī polo ēk opwonywu. Ēka onyutho niwu mac mērē na thwōnē ī wi lobo cē iwinyo unu kōp mērē kī ī mac.

³⁷ Pīen ēn ömarō kwerewu ēka öyērō ēkwaēgī na gīn önywölō, ēn ökwanyögī ökö kī lobo Ejip kī tēkō mērē na dit nakun ēn kikome tye kodwu.

³⁸ Ēn öryēmō rok na dōngō ēka na tēk lööwu ökö kī ī nyimwu, ēk ekelwu ī lobogī mē mīō lobogī bedo mewu kite na tye ködē tin.

³⁹ Tin dong myero inge unu ēka iketh unu ī cwinywu nī Rwoth ēnē Obanga na tye ī wi polo ēka pīny ī wi lobo. Ba dōk tye obanga mörö nōkēnē.

⁴⁰ Pī manōn, myero īgwök unu cīk mērē kibēc na an atye ka cīkōwu ködē tin, ēk nyimwu ēka ēkwaēwu obed na leng, ēk ikwō unu pī karē na lac ī lobo na Rwoth Obangawu bino mīōwu pī karē kibēc.

Peci n'epono iē

⁴¹ Ī karē nōn Muca opoko peci adek yo kukidē kulo Jordan

⁴² ēk ka ngat mörö oneko dhanō öring yo kunōn, ka ba öthēna athēna mē neko awodhe akaka, na kōp mörö ope ī kin-gī cōn. Ēn twērō rīngō ī pacō mörö acēl ēka gwökō kwō mērē.

⁴³ Peci nön gín enene: Bejer na tye ì thim n'otingere malò n'öpèdhèrè, pì jò ka Reuben; Ramot na tye ì Gilead pì jò ka Gad, èka Golan na tye ì Bacan pì jò ka Manace.

Acaki mè nwönö Cìk

⁴⁴ Man ènè cìk na Muca òmìö both jò Icarael.

⁴⁵ Man ènè cìk kībèc na Muca òmìö bothgì ì karè na gín òya kì ì lobo Ejip.

⁴⁶ Gín onwongo tye ì ora na cwök kì Bet Peor na tye kukidè mè kulo Jordan, na tye ì lobo ka Cikon rwoth ka jò Amor, n'onwongo lóö Kechon na Muca èka jò Icarael obino òlöö ì karè na gín dong òya òkò kì ì lobo Ejip.

⁴⁷ Gín ògamò lobo mërè èka lobo ka Og rwoth mè Bacan, rwodhi ariö ka jò Amor na bedo gínì ì loka kulo Jordan yo kukidè.

⁴⁸ Lobo ni òcakèrè kì ì pacö Aroer na tye ì lak kulo mè Arnon cìdhö kódè naka ì kidi Cirion (manön, Keron),

⁴⁹ kanya acèl k'Araba kībèc na tye kukidè mè Jordan, na dök kódè yo nam mè Araba na tye ì thè kidi mè Piciga.

5

Cìk Apar

(Yaa 20:1-17)

¹ Muca ocwodo jò Icarael kībèc cè okobo bothgì nì:

Un jò Icarael, winy unu cìk kībèc na an acwök kobo niwu tin. Pwony unu èka ìgwökèrè unu mè lübögì.

² Rwoth Obanga onu òcìkèrè kod onu ì Koreb.

³ Ën ba oketho cìkèrè ni kì kwere onu èntö oketho cìkèrè kod onu kībēc, na pod etye na kwö tin.

⁴ Rwoth ötwak kodwu wang kì wang kì ì mac ì wi kidi.

⁵ Ì karè nön, an acung ì kin Rwoth ëka un më kobo niwu köp ka Rwoth, piën un onwongo ilworo mac ëka ba ìcìdhö unu malö ì wi kidi. Ëka èn okobo nì:

⁶ “An ènè Rwoth Obangawu n'okelowu kì ì lobo Ejip, lobo më opii.

⁷ “Kür ibed unu k'obanga nökènè na path köda.

⁸ “Kür ìyüb cal jwök mörö na megì, onyo cal gin mörö na tye malö ì wi polo, onyo na tye piny ì wi lobo onyo na tye ì thè pii.

⁹ Kür iryebiri piny ì nyimgì më wörögì. Piën an, Rwoth Obangani, abedo Obanga na nyek, ëka abino pwodo ëkwaë ka jö na daga pì bal ka kweregì naka thuno ködè ì kom ëkwaë më adek kì më angwën.

¹⁰ Èntö an abino nyutho mar na ba lökèrè both jö elip kì elip na mara ëka gwökö cìkna gīnì.

¹¹ “Kür icwod nyīng Rwoth Obangani atata, piën Rwoth bino miö köp löö ngat na cwodo nyīngè atata.

¹² “Gwök nīnō më Cabīt ëk obed na leng, kite na Rwoth Obangani ociki ködè.

¹³ Tii tic pì nīnō abicël nakun ityeko ticni kībēc,

¹⁴ èntö nīnō më abīrö ènè Cabīt* ka Rwoth Obangani. Nīnō nön kür igud tic mörö, kadì in kikomi, onyo wodi onyo nyari, onyo aticni n'ëcwö onyo na dhakö, onyo thwoni pur, onyo kanani onyo leenini mörö kēkēn, onyo arok mörö na bedo ì

* **5:14 Cabīt**gönyö nīyweo.

peciwu, èk aticni n'ècwö onyo na dhakö myero oywe thon calö in.

¹⁵ Po unu nĩ un onwongo ibedo opii ì Ejip èka Rwoth Obangawu ènè ökwanyöwu ökö kĩ kunön kĩ thwön tēkö. Manön ènè ömĩö Rwoth Obangawu öcökö nĩ ìgwök unu nĩnö mē Cabit.

¹⁶ “Wör apapni èka ayani, kite na Rwoth Obangani ociki ködē, èk ibed ì wi lobo pĩ karē na lac èka nyimi obed na leng ì lobo na Rwoth Obangawu tye ka mĩöwu.

¹⁷ “Kür ineki.

¹⁸ “Kür idöny ì elomi.

¹⁹ “Kür ikwal.

²⁰ “Kür ikob köp mē twodo ì kom ngat mörö.

²¹ “Kür inir dhakö ka ngat nökenē. Kür inir öt ka ngat mörö, onyo ngöm, onyo etic mērē na cwö onyo na mon, thwön mē pur onyo kana mērē, onyo gin mörö kēkēn n'obedo mē ka ngat nökenē.”

²² Man ènè cìk na Rwoth ötwakö kĩ dwön na longo ì athukowu kibēc kĩ ì mac na lyël ì wi kidi, kĩ ì edou èka piny na cöl cuc cē èn ba ömēdö köp mörö nökenē. Èn öcöö cìk ni gini ì kom kite n'apada ariö èka ömögì botha.

²³ Ì karē na un iwinyo dwön n'odonyo kĩ ì piny na cöl, nakun wi kidi tye ka lyël kĩ mac, ètēla kibēc mē kakawu èka edongwu obino gini botha.

²⁴ Èka un ikobo nĩ, “Rwoth Obanga onu onyutho nĩ onu dheo èka dit mērē cē onu ewinyo dwönē kĩ ì mac. Tin onu ènēnö nĩ dhanö twērö bedo na kwö kadì bed nĩ Obanga twak ködē.

²⁵ Ëntö kobedini, pīngö onu myero ëthöö? Mac na thwönë nön bino camö onu ökö ëka onu ebino thöö ka ëmedërë më winyo dwön Rwoth Obanga onu.

²⁶ Ngat mörö tye na tye kī kom na naka yam owinyo dwön Obanga na kwö nakun twak kī ï mac, kite na onu ewinyo ködë, ëka pod tye na kwö?

²⁷ In ïcīdh na cwök ëk iwiny köp kībëc na Rwoth Obangawa kobo. Cë ikob nīwa gin mörö kēkēn na Rwoth Obangawa bino kobo nini. Wan ebino winyo ëka ëlübö.”

²⁸ Rwoth owinyo köp na un ikobo botha cë okobo nīna nī, “An awinyo köp kībëc na lwak okobo bothi, köp kībëc na gin okobo tye kakarë.

²⁹ Ka onwongo gin mëdërë më bedo kī cwiny n'obedo nī kömanön ï karë kībëc, më lworona ëka më gwökö cīkna kībëc, ëk jami kībëc owoth na bër ködgi ëka ëkwaëgi na twal.

³⁰ “Cīdh ikob nīgi nī ödök gīnī ï këmagī.

³¹ Ëntö in idong botha kany ëk an akob nini cīkna kībëc, na in myero ipwonygi ködë, ëk öcīdh ölüb gīnī ï lobo na an atye ka mīögi më bedo mëgi.”

³² Pī manön, gwökërë unu ëk itīm unu kite na Rwoth Obangawu öcīköwu ködë; kür īngël unu yo cīngwu kucem onyo kucam.

³³ Lüb unu yoo kībëc na Rwoth Obangawu öcīköwu, ëk ibed unu na kwö, nyimwu obed na leng ëka ibed unu pī karë na lac ï lobo na un ibino gamö më bedo mewu.

6

Cìk na dit na löö kībëc

¹ Man ènè cìk kībēc na Rwoth Obangawu öcìka nī èk apwonywu mè lübö ì lobo na un ìcìdhö ngölö kulo Jordan mè gamö bedo mewu,

² Èk un, èthīnōwu èka èkwaägī na bino lübögī obed gīnī kī wörö ì kom Rwoth Obangawu pī karè mè kwōwu na un ìgwökö cìk mērè kībēc na an amīōwu. Man bino mīōwu bedo na kwö pī karè na lac.

³ Pī manōn, winy unu jö Icarael, gwökērè unu mè lübögī èk nyimwu obed na leng èka thon ìnya unu na pol rwök ì lobo na mio na cak kī möö kic möl kī ië, kite na calö Rwoth, Obanga ka kwerewu, öcìkō ködè.

⁴ Winy unu jö Icarael, Rwoth Obangawa, èn kènè ènè Rwoth.

⁵ Mar Rwoth Obangani kī cwinyi kībēc, kī tiponi kībēc èka kī tēkōni kībēc.

⁶ Cìk nī gīnī na an tin acìkōwu ködè myero obed ì cwinywu.

⁷ Pwony unu èthīnōwu kī cìk nōn gīnī. Twak unu pīrgī ka ibedo unu pacö èka ka iwotho unu ì yoo, ka ibuto unu pīny èka ka iyaa unu malö.

⁸ Twegī na calö anyuth gīnī mè po wiwu ì ngut cīngwu èka ì ter nyimwu.

⁹ Cöögī ì kom yen dholokek mè udiwu èka ì kom dhö wangkacwu.

¹⁰ Rwoth Obangawu bino kelowu ì lobo na èn öcìkērè kī kwong both kwarōwu Abraam, Icaaka èka Jakob. Lobo nōn tye kī peci na lac na bër rwök, na pathī un ènè ìgērö,

¹¹ udi n'opong kī jami kībēc na bēcö na un ba iketho gin mörö ië, kulo na un ba igolo, pwothi ölöc èka yen jeituni na un ba ipìdhö cè ka ìcamö unu èka iyeng unu,

¹² gwökërë unu èk kür wiwu owil ökö ì kom Rwoth n'okelowu kî ì Ejip, lobo më opii.

¹³ Wör Rwoth Obangawu, tii unu nînë kèkën èka ikwong unu kwong na mewu kî nyîngë.

¹⁴ Kür iwör unu obanga nökënë, obanga ka rok na tye ì ngetwu,

¹⁵ pîën Rwoth Obangawu, na tye ì kinwu, obedo Obanga na nyek èka akëmö mërë bino podho ì komwu cë bino tyekowu ökö kî ì wi lobo.

¹⁶ Kür itëm unu Rwoth Obangawu kite na un itimö ködë kî ì Maca.

¹⁷ Myero igwök unu cík ka Rwoth Obangawu kibëc na èn öcîkôwu.

¹⁸ Tîm unu gin na tye atîr èka na bër ì nyim Rwoth èk nyimwu obed na leng èka icîdh igam unu lobo na bër na Rwoth yam öcîkërë kî kwong both kwerewu,

¹⁹ èka Rwoth bino ryëmö langwu ökö kî ì nyimwu kite na èn okobo.

²⁰ Ì karë më anyim, ka èthînöwu openyowu nî, “Pîngö Rwoth Obangawa öcîkôwa më lübö cík ni kibëc?”

²¹ Un ibino kobo both èthînöwu nî, “Wan onwongo ebedo opii ka Parao ì lobo më Ejip, èntö Rwoth ökwanyöwa ökö kî kunön kî tükö më cîngë.

²² Rwoth obino otio anyuth më tango èka gin më aura gîni—na döngö èka na reco rwök—ì kom jö Ejip, ì kom Parao èka ì kom jö më ödë kibëc na wan ènënö kî wangwa.

²³ Èntö èn obino ökwanyöwa ökö kî kunön më kelowa kany, èk èmîiwa lobo na èn okwongere nî ebino mîö both kwerewa.

²⁴ Rwoth öcüköwa më Lübö cík ni kibëc ëka më wörö Rwoth Obanga onu, ëk ebed na bër i karë kibëc ëka ebed na kwö, kite na tye ködë tin.

²⁵ Ka onu ëgwökërë më wörö cík ni kibëc i nyim Rwoth Obangawa, kite na ën öcükö onu ködë, cë ebino bedo jö na kitegĩ atir.”

7

Ryëmö Erok ökö

¹ Ka Rwoth Obangawu bino kelowu i lobo na un itye ka dönyö ië më gamö bedo mewu, nakun ryëmö rok na pol ökö ki i nyimwu—jö Kit, jö Girgac, jö Amor, jö Kanaan, jö Periji, jö Kibi ëka jö Jebuc—rok abirö na pol ëka tæk gini na lööwu ökö

² ëka ka Rwoth Obangawu ömïögĩ i cingwu cë ilöo unugi, myero ityek unugi ökö. Kür imok unu cükërë ködgi, ëka kür thon inyuth kica mörö bothgi.

³ Kür inyömërë unu ködgi. Kür imii anyirawu both awopegĩ më anyöma onyo kür inyöm unu anyiragi n'awopewu,

⁴ piën gin bino mïö ëthïnöwu lökërë ökö ki botha cë cakö gini wörö obanga nökenë, ëka akëmö ka Rwoth bino bino i komwu cë tyekowu ökö piöpïö.

⁵ Man ënë gin na myero un itim i komgi: Tütürö unu keno tyërgi ökö piny, rëdh unu kite na gin ocibo më awöra ökö piny, tong unu yen n'ëpidhö kanya gin wörö obangagi na dhakö ië n'ecwodo ni Acera ëka iwang unu cal jwogigi ökö ki mac.

⁶ Piën un ibedo jö na leng both Rwoth Obangawu. Rwoth Obangawu otyeko yërowu ki kin lwak kibëc na tye i wi lobo më bedo jögë na pïrgi tæk.

⁷ Rwoth ba oketho mar mërè ì komwu ëka öyëröwu, pathi nì un onwongo ipol unu na löö rok nökënë, piën un ënë onwongo itye unu na nönök na löö kì kin rok kibëc.

⁸ Ëntö piën Rwoth onwongo ömaröwu ëka ögwökö kwong mërè na ën okwongo both kwerewu, ënë ömïö ën ökwanyöwu ökö kì tükö më cingë ëka ökököwu kì ì lobo më opii, kì ì tükö ka Parao rwoth më Ejip.

⁹ Myero dong inge unu nì Rwoth Obangawu ënë Obanga; ën obedo Obanga na genere, na gwökö cikërè mërè më mar both wang rok elip kì elip na marö ën ëka gwökö gini cik mërè.

¹⁰ Ëntö
jö na dag Rwoth, ën bino cülö kwor ì komgi kì tyekogi;
ën ba bino galërè më cülö kwor ì kom jö na dag
ën.

¹¹ Pì manön, myero igwökërè unu më lübö cik kibëc na an amïöwu tin.

¹² Ka iwinyo unu cik nì gini ëka ilübö unu na bër, cë Rwoth Obangawu bino mëdërè më gwökö cikërè më mar mërè kodwu kite na ën okwongo ködë both kwerewu.

¹³ Ën bino maröwu, mïöwu gum ëka mëdö welwu. Ën bino mïö gum both ëthinö na un ibino nywölö, gin na bino cëk ì pwothiwu—kalwu, köngö ölok na nyen ëka möö jeituni—ëthin dhok na mewu ëka ëthin rom kì dyegiwu ì lobo na ën yam okwongere both kwerewu nì ebino mïöwu.

¹⁴ Ebino mïöwu gum na löö rok nökënë; ngat mörö ope kì ì kin cwö onyo mon na mewu na bino bedo abonge athin, onyo leeniwu mörö ope

na bino bedo abonge athìn mërë.

¹⁵ Rwoth bino gwököwu kî ì kom two kibëc. Ën ba bino miö two na reco na un ingeo kî ì lobo Ejip maköwu, ëntö ën bino miö makö jö kibëc na dagwu.

¹⁶ Myero ityek unu rok kibëc na Rwoth Obangawu bino miö ì cingwu. Kür kîca ömakwu ì komgî ëka kür iwör unu obangagî gîni, piën manön bino bedo calö pawaka më maköwu.

¹⁷ Ka un ithamö kenwu ni, “Rok ni tæk lööwa ökö. Wan ebino ryëmögî nîngö?”

¹⁸ Ëntö kür ibed unu kî lworö ì komgî; po unu ì gin na Rwoth Obangawu ötimö ì kom Parao ëka jö më Ejip kibëc.

¹⁹ Un inënö kî wangwu atëmatëma na döngö, anyuth më tango ëka gin më aura gîni, cing na tæk ëka kî twërö mërë na Rwoth Obangawu okelowu ködë. Rwoth Obangawu bino timö ni kömanön ì kom rok kibëc na un kobedini ilworö.

²⁰ Rwoth Obangawu bino oro lworö ì kin-gî naka thon jö n'ökwö n'opono gîni kî bothwu ebino tyekogî ökö.

²¹ Kür ibed unu kî lworö ì komgî, piën Rwoth Obangawu na tye ì kinwu, ën obedo Obanga na dit ëka ngat na myero elwor.

²² Rwoth Obangawu bino ryëmö rok nön gîni ökö kî ì nyimwu momoth. Ba ebino yeo niwu më tyekogî ökö wang acël, piën wel leeni na ger römö mëdërë ëka twërö yelowu.

²³ Ëntö Rwoth Obangawu bino miögî ì cingwu, ën bino miögî rubere rwök naka ibino unu tyekogî ökö.

²⁴ Ën bino miö rwodhigî ì cingwu, ëka ibino unu

rwenyo nyĩng-gĩ ökö kī i wi lobo. Ngat mörö ope na bino cung i nyimwu; ibino unu tyekogĩ ökö.

²⁵ Myero iwang unu cal obangagĩ gĩnĩ kī mac. Kür inĩr unu ryal onyo gol na tye i komgĩ, ěka kür ikwany mẽ bedo mewu onyo bino dökö pawaka mẽ maköwu, piẽn obedo gin mẽ kwer both Rwoth Obangawu.

²⁶ Kür ikel unu gin mörö mẽ kwer i udiwu na mïö etyekowu ökö calö gĩn. Myero ikwër ěka idag unu gin nön, piẽn obedo gin na myero etyek ökö.

8

Kür wiwu owil i kom Rwoth

¹ Gwökërë unu mẽ lübö cík kibęc na an atye ka mïöwu tin, ěk ibed unu na kwö ěka inya unu na pol, icidh idöny unu i lobo na Rwoth öcikërë kī kwong both kwerewu.

² Myero ipo unu kite na Rwoth Obangawu ötölöwu ködë kī i thim pĩ mwaka pyer angwën, mẽ mïöwu bedo na mwol ěka mẽ tēmöwu ěk enge gin n'onwongo tye i cwinywu, ka onyo ibino unu gwökö cík mërë onyo pe.

³ Ěn ömïö idökö unu na mwol, ömïö kec onekowu, cë öpidhöwu kī mana, na un onyo kwerewu onwongo ba onge, mẽ pwonyowu nĩ dhanö ba kwö kī cem kēkēn ěntö kwö kī köp kibęc na donyo kī i dhö Rwoth.

⁴ Böngwu ba obino otii kī i komwu ěka tyēnwu ba obino okwot i mwaka pyer angwën ni kibęc.

⁵ Myero dong inge unu kī i cwinywu nĩ kite na calö dhanö pwonyo athĩn mërë, Rwoth Obangawu thon pwonyowu.

⁶ Myero igwök unu cík ka Rwoth Obangawu, nakun iwotho unu i yoo mërë ëka ilworo unu ën.

⁷ Piën Rwoth Obangawu tye ka kelowu i lobo na bër—n'opong kî ora, kulo më pii ëka wang pii na möl i ora ëka wi kite;

⁸ lobo na tye kî ngano ëka cayiri, ölok ëka yen ölam, okwer pomegranat, lobo na möö jeituni ëka möö kic möl kî ië;

⁹ lobo na cem ba nönök ië ëka gin mörö ope na bino rem kî bothi; lobo na kite mërë obedo nywenyo ëka itwërö künyö mola kî i kite.

¹⁰ Ka icemo ëka iyeng unu, pak unu Rwoth Obangawu pi lobo na bër na ën ömïöwu.

¹¹ Gwökërë unu ëk kür wiwu owil ökö i kom Rwoth Obangawu, na nwongo ba igwökö unu cík mërë kibëc na an atye ka miöwu tin.

¹² Ka icemo ëka iyeng unu, ka igërö unu udi na bëcö më bedo ië,

¹³ ka dhok, rom kî dyegiwu önya ödökö na pol, ka ryalwu ëka gol ömëdërë ëka kî jami kibëc na un itye ködgî önya,

¹⁴ cë cwinywu cakö wakërë ëka wiwu bino wil ökö i kom Rwoth Obangawu n'ökwanyöwu kî i lobo Ejip, lobo më opii.

¹⁵ Ën ötölöwu kî i thim na lac ëka na lik, lobo më öriö na pii ope ië, na thwone ëka ith tye gîni ië. Ën ömïöwu pii n'öya kî i lëla.

¹⁶ Ën öpidhöwu kî mana kî i thim, gin mörö na kwerewu ba ongeö anaka yam, më miöwu bedo na mwol ëka më tëmöwu ëk i ajiki nyimwu obed na leng.

¹⁷ Gwökërë unu ëk kür ikob kenwu ni, “Tëköna ëka twërö më cînga ënë ömïa anwongo lönyö ni.”

¹⁸ Ëntö po unu i kom Rwoth Obangawu, piën ën ënë mïö tøkö më nwongo lönyö, ëk omok cïkërë mërë na ën okwongo both kwerewu, kite na tye ködë tin.

¹⁹ Ka wiwu bino wil ökö i kom Rwoth Obangawu, cë ilübö unu obanga nökënë, iwörö ëka iryebere unu piny i nyimgi, an akobo bothwu tin ni ebino tyekowu ökö.

²⁰ Ebino tyekowu ökö calö rok nökënë na Rwoth otyekogi ökö ki i nyimwu, cë ebino tyekowu ökö pi kwërö winyo dwön Rwoth Obangawu.

9

Tyën köp na Rwoth bino könyö ki jö Icarael

¹ Winy unu, jö Icarael. Un kobedini icwök unu ngölö kulo Jordan yo löka, ëk icidh unu më ryëmö rok na tye kunön, jö na tøk na lööwu ökö, na tye ki peci na lac ki cël na thuno naka i polo.

² Jö nön tøk ëka boco gini, jö Anak! Un ingeo köp i komgi, ëka iwinyo unu ka ekobo ni: “Nga na twërö cung i nyim jö Anak më lwëny ködgi?”

³ Ëntö myero inge unu tin ni Rwoth Obangawu ënë ngat na tye ka woth i nyimwu na calö mac na wangö piny. Ën kikome ënë bino tyekogi, ën bino löönögi ökö ki i nyimwu. Un ibino ryëmögi ëka ibino nekogi pïöpïö, kite na Rwoth öcïkërë ködë bothwu.

⁴ Kinge na Rwoth Obangawu öryëmögi ökö ki i nyimwu, kür ikob unu köp ki i cwinywu ni, “Rwoth okela kany më gamö lobo ni piën an kitena atir.” Manön obedo pi tim na reco më rok ni ënë ömïö Rwoth bino ryëmögi ökö ki i nyimwu.

⁵ Pathĩ pĩ kite atĩrwu onyo pĩ leng cwinywu nĩ un ìcìdhö mè gamö lobogĩ; èntö pĩ tĩm na reco mè rok ni gĩnĩ, Rwoth Obangawu bino ryëmögĩ ökö kĩ ì nyimwu, èk ocob gin na èn okwongo both kwaröwu Abraam, Icaaka èka Jakob.

⁶ Myero ìniang unu nĩ pathĩ pĩ kite atĩrwu ènè ömïö Rwoth Obangawu tye ka mïöwu lobo ni na bër èk ìgam unu obed mewu, pièn un jö na ngutwu nwang.

Wod thwön n'obedo gol

⁷ Po unu ì köp ni èka kür ìmïi wiwu owil kite na un ìmïö akëmö ömakö Rwoth Obangawu kĩ ì thim. Cakërè ì nĩnö na un ìya kĩ Ejip naka ithuno unu ì kabedo ni, un ibedo jëm ì kom Rwoth.

⁸ Ì kidi mè Koreb, un ìmïö Rwoth obedo k'akëmö, cè ömïö akëmö ömakö èn rwök ì komwu mè tyekowu.

⁹ Ì karè na an aìdhö malö ì wi kidi mè gamö kite n'apada, kite n'apada mè cìkërè na Rwoth oketho kodwu, an abino abedo ì wi kidi pĩ nĩnö pyer angwën kiceng èka kiwor, nakun ba acemo èka ba amodho pii.

¹⁰ Rwoth ömïa kite ariö n'apada n'Obanga onwongo öcöö kĩ cingë. Cík kibëc onwongo tye ì komgĩ na Rwoth ötītö bothwu kĩ ì mac na lyël ì wi kidi ì nĩnö mè athuko.

¹¹ Kinge nĩnö pyer angwën kiceng èka kiwor, Rwoth ömïa kite ariö n'apada, kite n'apada mè cìkërè.

¹² Cè Rwoth okobo nĩna nĩ, “Yaa malö kĩ kany ìcìdh yo pĩny pïöpïö, pièn jogi na in ikelogĩ kĩ ì Ejip ötīmö gĩnĩ bal. Gĩn ölökerè gĩnĩ ökö pïöpïö kĩ ì kom

gin na an acìkögì èka öyübö gīnī cal jwök n'obedo nywenyo.”

¹³ Rwoth okobo nīna nī, “An anënö jö ni èka obedo gīnī jö na ngutgī nwang rwök!

¹⁴ Wëka an këna, èk atyekgī èka ajwa nyīng-gī ökö kī ī thë polo. An abino mīöni idökö rok na tèk èka ìnya unu na pol na löögì.”

¹⁵ Cë an alökara, aidho yo pīny kī ī wi kidi, nakun kidi tye ka lyël kī mac. Èka kite ariö n'apada më cìkèrè onwongo tye ī cīnga gīnī.

¹⁶ Ī karë na an anënö, anënö nī ìbalö unu ī kom Rwoth Obangawu; un ìyübö cal jwök na cal kī wod thwön pīrwu. Un ìlökèrè ökö pīöpīö kī ī yoo na Rwoth onwongo öcìköwu.

¹⁷ Cë an amakö kite ariö n'apada èka abologī ökö pīny kī ī cīnga gīnī, angënyö ökö na thīthīnö ī nyimwu.

¹⁸ Kinge dökī abuto pīny aryeba cwiny ī nyim Rwoth pī nīnö pyer angwën kiceng èka kiwor; an ba acemo èka ba amodho pii piën pī bal kibëc na un itīmö, nakun itīmö unu gin na rac ī wang Rwoth n'ömīö akëmö ömakö ën.

¹⁹ An abedo kī lworö ī kom akëmö ka Rwoth na tèk, piën akëmö onwongo ömakö ën rwök ī komwu më tyekowu ökö. Èntö Rwoth dökī obino owinya.

²⁰ Akëmö ömakö Rwoth rwök ī kom Aron më neko ën, èntö ī caa nön an alëgö pīrë thon.

²¹ An thon akwanyö gin më balwu nön, wod thwön na un ìyübö, cë awangö ökö kī mac. Cë angënginyö èka amīö ödökö buru na pwöth calö apua, cë aönyö apua mërë ī kulo na möl pīny kī ī wi kidi.

22 Un thon ìmiö akëmö ömakö Rwoth kî ì Tabera, ì Maca ëka ì Kibrot Ataaba.

23 Ëka ì karë na Rwoth oorowu kî ì Kadec Barnea ën okobo nî, “Cîdh unu malö ëka ìgam unu lobo na an amiöwu,” ëntö un ibino ìjëm unu ì kom Rwoth Obangawu. Un ba ibedo kî gen ì kome ëka ba iwinyo unu ën.

24 Un ibedo jëm ì kom Rwoth anaka ì nînö na an angeowu ködë.

25 An abuto aryeba cwiny ì nyim Rwoth pî nînö pyer angwën nön kiceng ëka kiwor piën Rwoth onwongo okobo nî ebino tyekowu ökö.

26 Cë an alëgö both Rwoth ëka akobo nî, “Rwoth Obanga, kür ityek jogi, jö na megî na pîrgî tæk na in ìkökögî kî tæköni ëka ìkwanyögî kî ì Ejip kî tækö mē cingi.

27 Po ì kom aticni Abraam, Icaaka, ëka Jakob. Kür ibed ka thamö pî ngut na nwang, tîmgî na reco ëka balgî.

28 Pî manön lobo na in ìkwanyöwa kî ië bino kobo nî, ‘Rwoth onwongo ba römö terogî ì lobo na ën öcîkërë ködë bothgî, ëka piën ën onwongo dag-gî, ën ökwanyögî ëk enekgî ökö ì thim.’

29 Ëntö gîn obedo jogi na pîrgî tæk na in ìkwanyögî kî tæköni ëka kî twëröni.”

10

*Muca dökî ögamö cîk
(Yaa 34:1-10)*

1 Ì karë nön Rwoth okobo nîna nî, “Yüb kite ariö n'apada calö mē acël ca ëka ibin yo botha ì wi kidi malö. Yüb thon canduk mē bao.

² An abino cöönö ì kom kite n'apada kóp n'onwongo tye ì kom kite n'apada më acèl ca, na in ibino ìngènyögi ökö. Cè in myero ikethgi ì canduk.”

³ Cè an ayübö canduk kî ì kom yath alwii ëka an ayübö kite arïö n'apada calö më acèl ca gîni. Èka an acìdhö malö ì wi kidi kî kite arïö n'apada ì cînga gîni.

⁴ Rwoth öcöö ì kom kite n'apada ni ngö na èn onwongo öcöö cön, cìk apar na èn onwongo ötitö bothwu kî ì mac, ì nînö na un ìcökèrè ì tyèn kidi. Rwoth ömïögi botha.

⁵ Cè an adwogo pîny kî ì wi kidi ëka aketho kite n'apada ì canduk n'onwongo an ayübö kite na Rwoth öcika ködè ëka pod tye gîni kunön.

⁶ (Ì karè nön jö Icarael öya gîni kî ì Beerot Bene Jakan* cè öcìdhö gîni ì Mocera. Kî kunön Aron öthöö ëka eiko, cè wode Eleajar oleo ka tyènè na calö alamdhök.

⁷ Gîn öya kî kunön, cè öcìdhö gîni yo Gudugoda ëka yo Jotbata, lobo na pii dwong ië.

⁸ Ì karè nön Rwoth opoko kaka ka jö Lebi path më tingo canduk më cìkèrè ka Rwoth, më cung ì nyim Rwoth më tio tic ëka më lamö gum kî nyîngè, kite na gîn pod tímö ködè tin.

⁹ Manön ènè ömïö jö Lebi ba tye gîni kî dul lobo mörö n'obedo mëgi ì kin utmegogi; Rwoth ènè obedo gin n'epoko nîgi kite na Rwoth Obangawu okobo bothgi ködè.)

¹⁰ An abedo ì wi kidi pî nînö pyer angwèn kiceng ëka kiwor, kite na an abedo ködè ì më acèl ca.

* **10:6 Beerot Bene Jakan** gönyö nî kulo k'awope ka Jakan.

Rwoth obino owinyo lëgana ì karë nön thon cë Rwoth oyeo nì ba ebino tyekowu.

¹¹ Rwoth okobo nìna nì, “Yaa malö, itël wi jüü ëk ödöny ëka ögam gĩnì lobo na an akwongara më mïö both kweregì.”

Lwor Rwoth

¹² Kobedini dong, un jö Icarael, ngö na Rwoth Obangawu mütö kì bothwu? Gin na Rwoth Obangawu mütö kì bothwu ënë nì lwor unu Rwoth Obangawu, ilüb unu yodhi mërë kibëc, ìmar unu ën, ëka itii unu both Rwoth Obangawu kì cwinywu kibëc ëka kì tipowu kibëc.

¹³ Gwök unu cìk ka Rwoth kibëc na an atye ka miöwu tin pì bër bedowu.

¹⁴ Nën, kadì jami kibëc na tye malö ì wi polo rwök, lobo ëka jami kibëc na tye ië obedo më ka Rwoth Obangawu.

¹⁵ Ëntö Rwoth oketho cwinye ì kom kwerewu ëka ömarögì cë obino öyëröwu, ëkwaëgì, kì ì kin rok kibëc, kite na tye ködë tin.

¹⁶ Pì manön, bed unu kì winy both Rwoth ëka iwëk unu bedo jö na ngutgì nwang.

¹⁷ Piën Rwoth Obangawu ënë obedo Obanga na löö obanga nökenë gĩnì ëka Rwoth ka rwodhi nökenë. Ën obedo Obanga na dit, na tye kì tükö ëka Obanga na myero elwor. Ën ba lengere ì ngölö köp ëka ba wilërë kì lìm.

¹⁸ Ën ngölö köp n'atir ì kom athin kic ëka ì kom dha thöö. Nyutho mar mërë both Erok ëka miögi cem kì gin më aruka.

¹⁹ Un myero ìmar Erok, piën un thon onwongo ibedo unu Erok ì lobo Ejip.

²⁰ Wör Rwoth Obangawu, tii unu nîñë kèkën ëka ikwong unu kwong na mewu kî nyîngë.

²¹ Ën obedo Obanga na myero ïpak unu; ën obedo Obangawu, n'ötîmô niwu jami na döngö ëka tango më aura na un ïnënö kî wangwu.

²² Kwerewu n'obino öcîdhö gîñî ï Ejip onwongo tye pyer abîrö kibëc, ëka Rwoth Obangawu ömîöwu ïdökö na pol na calö cër na tye ï polo.

11

Gin na döngö na Rwoth ötîmô pî jögë

¹ Myero ïmar unu Rwoth Obangawu ëka ïtîm unu gin na ën mîtö; gwök unu cîk mërë kibëc, ëka gin na ën öcîkö ï karë kibëc.

² Po unu tin ï kom pwony na Rwoth Obangawu opwonyowu ködë, an ba atye ka twak k'ëthîñöwu ëntö kodwu piën un ingeo ëka ïnënö unu dit mërë, cîngë na tøk ëka twërö mërë.

³ Gîñ ba önënö tango ëka gin më aura na ën ötîmô ï Ejip both Parao rwoth më Ejip ëka ï lobo mërë kibëc;

⁴ gin na ën ötîmô ï kom acikari më Ejip, ï kom angole ëka gadigadigî, ï karë na ën ömîö pii më Nam na Kwar ömwönyögî ökö nakun onwongo gîñ tye ka ryëmö körwu, ëka kî kite na Rwoth otyekogî ködë.

⁵ Gîñ ba önënö gin na ën ötîmô niwu ï thim na un bara ithuno ï kabedo ni,

⁶ onyo gin na ën ötîmô ï kom Datan ëka Abiram, ëthîñö k'Eliab wod ka Reuben, ï karë na Rwoth ömîö ngöm öyabërë kî kanya jö Icarael onwongo bedo ië, cë ömwönyögî ökö kî jö kibëc

më dholokekgì, këmagì ëka gin na kwö kibëc n'onwongo obedo mëgì.

⁷ Ëntö un ënë ìnënö kî wangwu jami na döngö ni kibëc na Rwoth otio.

⁸ Pî manön, myero ìgwök unu cìk kibëc na an atye ka miöwu tin, ëk ibed unu kî tükö më cìdhö dönyö ië ëka gamö lobo na un itye ka ngölö kulo Jordan më bedo mewu,

⁹ ëk ibed unu pî karë na lac ì lobo na Rwoth okwongo më miö both kwerewu ëka both ëkwaëgì, lobo na mio na cak kî möö kic möl kî ië.

¹⁰ Lobo na un itye ka dönyö ië më gamö ba obedo calö lobo Ejip, kî kanya un ìya unu kî ië, kanya un ìpidhö kodhiwu ëka iönyö unu pii ië kî cingwu calö pwodho gwedo.

¹¹ Ëntö lobo na un itye ka cìdhö më ngölö kulo Jordan më gamö ëk obed mewu, obedo lobo n'obedo kitekite ëka ora gîni, lobo na köth dwong ië.

¹² Obedo lobo na Rwoth Obangawu gwökö; wang Rwoth Obangawu tye ië ì karë kibëc, cakërë ì acaki mwaka naka ì ajiki mërë.

¹³ Cë ka un ibino lübö unu cìk kibëc na an atye ka miöwu tin—më marö Rwoth Obangawu ëka më tic nîné kî cwinywu kibëc ëka kî tipowu kibëc—

¹⁴ cë ën bino miö köth cwe ì lobowu ì karë mërë kikokome, köth më cwîr ëka köth më oro, ëk icök unu cemwu, köngö ölök na nyen ëka möö jeituni.

¹⁵ Ën bino miö lum pî dhok na mewu, ëka ibino unu cem cë iyeng unu.

¹⁶ Gwökërë unu ëk kür ìmîi thamawu öbwölwu më lökërë ökö më wörö obanga nökenë gîni ëka ryeberë pîny ì nyimgì.

17 Ka ìtīmō unu nī kōmanōn, akēmō bino makō Rwoth ì komwu, cē jūkō kōth òkō ēka mīō kōth ba cwe. Lobo ba bino cēgō cem ēka ebino tyekowu òkō kī ì lobo na bēn na Rwoth tye ka mīōwu.

18 Keth unu kōpna nī ì cwinywu ēka ì thamawu; twe unugī na calō anyuth ì ngut cīngwu ēka irukugī ì terinyimwu.

19 Pwony unu ēthīnōwu kī cīk nōn, twak kōp nōn bothgī ka in itye pacō, ka in itye iwoth ì yoo, ka ibuto pīny ēka ka in ìya malō kī ì kabuto.

20 Cōōgī ì kom yen dholokek mē udiwu ēka ì kom dhō wangkacwu,

21 ēk nīnōwu ēka mē k'ēkwaēwu obed na pol ì lobo na Rwoth okwongere mē mīō both kwerewu, pī karē kībēc na polo pod bino bedo kōdē malō ì wi ngōm.

22 Ka ìgwōkō unu cīk nī kībēc na an atye ka mīōwu ēk ìlūb unu—mē marō Rwoth Obangani, ìlūb unu yodhi mērē kībēc ēka mē moko ì kome—

23 cē Rwoth bino ryēmō rok nī kībēc na tye ì nyimwu ēka un ibino ryēmō rok na dito ēka na tēk na lōōwu.

24 Kabedo kībēc na tyēnwu bino nyōnō bino bedo mewu. Wang lobowu bino cakērē kī ì thīm thuno kōdē yo Lebanon ēka cakērē kī ì kulo mē Euparate naka yo nam Mediterenian.

25 Ngat mōrō ope na bino cung ì nyimwu. Rwoth Obangawu bino mīō jīi podho cwiny ēka lworō pīrwu ì kom lobo kībēc na un ibino cīdhō yo ìē, kite na ēn òcīkō kōdē.

26 Nēn, tin an atye ka ketho ì nyimwu gum ēka cen—

²⁷ gum ka ilübö unu cík ka Rwoth Obangawu na an atye ka miöwu tin;

²⁸ èntö cen bino maköwu ka un ikwërö lübö cík ka Rwoth Obangawu éka ilökërë unu kî i yoo na an aciköwu tin nakun iwörö unu obanga nökenë gîni na un ba ingeo.

²⁹ Ka Rwoth Obangawu dong okelowu i lobo na un ibino dönyö ië më gamö bedo mewu, myero ilam unu gum i wi kidi Gerijim éka cen i wi kidi Ebal.

³⁰ Kite na un ingeo ködë nî kite ariö ni tye gîni yo kuthö kulo Jordan, nakun cwök kî yen më More i lobo ka jö Kanaan nön na bedo gîni i Araba n'opimere kî Gilgal.

³¹ Un icwök ngölö kulo Jordan më dönyö gamö lobo na Rwoth Obangawu tye ka miöwu. Ka igamö unu éka ibedo unu kunön,

³² gwökërë unu më lübö cík kibëc na an atye ka pwonyowu tin.

12

Kabedo më wörö Obanga

¹ Man ènë cík kibëc na myero ilüb unu na bër i karë kibëc na un ibino bedo i lobo na Rwoth, Obanga ka kwerewu, ömiöwu më gamö.

² Un myero imuk kabedo kibëc, kanya Erok na un iryëmö kî i lobogî wörö obangagî ië. Kabedo na tye malö i wi kite na boco éka i thë yen na potgî mar.

³ Un myero imumuko keno tyërgî, ngîngînyö unu kitegî na gîn wörö éka iwang unu yen n'ëpîdhö kanya ewörö obangagî na dhakö ië n'ecwodo nî

Acera; tong unu cal jwogi obangagĩ ěka ĩmĩ unu nyĩng-gĩ orweny ökö kĩ ĩ kabedo nön gĩnĩ.

⁴ Un myero kür ĩwör Rwoth Obangawu ĩ kite na gĩn wörö k'obangagĩ ködë.

⁵ Ĕntö Rwoth Obangawu bino yërö kany mörö kĩ ĩ kakawu kibëc. Kanya ebino wörö nyĩngë ĩë. Kabedo nön ěnë un myero ĩcĩdh ěka ĩwör unu Rwoth Obangawu ĩë.

⁶ Kunön ěnë un myero iter tyër awanga na mewu, tyërwu, acël më apar na mewu, mïc na pĩrë tøk, gĩn na in ikwongo akwonga më mĩö, mïc na cwinyi öpwöyö, ěka kaö më dhokwu ěka rom kĩ dyegiwu.

⁷ Kunön, un ibino cem ĩ nyim Rwoth Obangawu, kanya acël kĩ jö më udiwu ěka ibino bedo unu kĩ yom cwinyi ĩ kom jami kibëc na un iketho cĩngwu ĩë piën Rwoth Obangawu ömĩöwu gum.

⁸ Un myero kür ĩtĩm kite na onu ětĩmö ködë tin kany, na ngat acëlacël tĩmö gĩn na ěn nënö nĩ bër nĩnë,

⁹ piën un bara ithuno ĩ kabedo na myero iywe unu ĩë ěka lobo na Rwoth Obangawu tye ka mĩöwu më bedo mewu.

¹⁰ Ĕntö un ibino ngölö kulo Jordan ěka ibedo unu ĩ lobo na Rwoth Obangawu tye ka mĩöwu më bedo mewu. Ĕn bino mĩöwu iyweo kĩ ĩ kom langwu kibëc n'ögüröwu ěk ibed unu abonge pëkö mörö.

¹¹ Cë un myero ibin unu ĩ kabedo acël na Rwoth Obangawu öyërö më wörö nyĩngë ĩë. Kunön ěnë un myero ikel jami kibëc na an aciköwu ĩë: tyër awanga na mewu, tyërwu, acël më apar na mewu, ěka mïc na pĩrë tøk na un ikwongo akwonga më

möö both Rwoth.

¹² Un ibino bedo kī yom cwiny ī nyim Rwoth Obangawu, kanya acēl k'awopeni, anyirani, etic na cwö, etic na mon ēka jö Lebi na bedo gīnī ī peciwu; po nī jö Lebi ba ebino poko nīgī lobo mörö onyo gīn mörö mē bedo mēgī.

¹³ Gwökērē unu ēk kūr ītyēr tyēr awanga na mewu ī kabedo mörö kēkēn na un īnēnō;

¹⁴ Ēntö ibino unu tyērö tyēr awanga ī kabedo na Rwoth bino yērö kī ī kakawu mörö acēl. Kunön ēnē un ibino tīmō jami kībēc na an acīkōwu.

¹⁵ Ēntö un itwērö neko leeniwu mē pacö mē acamawu kī ī peciwu mörö kēkēn kite na cwinywu mītö na lübērē kī gum na Rwoth Obangawu mīōwu. Jö kībēc na cīk ögēngö onyo na cīk ba ögēngö twērö camö gīnī ringo nōn, calö ringo egwethe onyo pura.

¹⁶ Ēntö kūr myero icam unu remo; öny unu ökō pīny calö pii.

¹⁷ Kūr myero icam kī ī peciwu acēl mē apar mē kalwu, onyo kōngö ölōkwu na nyen, onyo möö jeituniwu, onyo ēthīnō kaö mē rom, dyegi ēka dhok, onyo gīn mörö kēkēn na in ikwongo mē mīö, onyo mīc na cwinywu öpwöyö, onyo mīc na pīrgī tēk.

¹⁸ Ēntö un ibino cem ī nyim Rwoth Obangawu ī kabedo na ēn bino yērö. Un, awopewu ēka anyirawu, eticwu na cwö ēka eticwu na mon, ēka jö Lebi kī ī peciwu. In myero ibed kī yom cwiny ī nyim Rwoth Obangani ī jami kībēc na in ibino ketho cingī iē.

¹⁹ Myero igwökērē unu kūr iwēk unu jö Lebi ata ī karē kībēc na un ibedo ī lobowu.

²⁰ Ka Rwoth Obangawu önyaö wang lobowu kite na ën öcìkòwu ködë, cë cwinyi ömitö ringo ëka ikobo nĩ, “An amitö camö ringo,” cë in itwërö camö ringo kite na cwinyi mītö ködë.

²¹ Ka kabedo n'ëwörö nyĩng Rwoth Obangawu tye na bor kī kanya un itye ië, cë un itwërö neko leeni kī i kom rom, dyegi ëka dhokwu na Rwoth ömīöwu, kite na an acìkòwu ködë. Un myero icam ringo kite na cwinywu mītö ködë kī i peciwu.

²² Ngat mörö kēkēn, kadī obedo dhanö na cìk ögēngö onyo na cìk ba ögēngö twërö camö ringo nön, kite na un icamö kī ringo egwethe onyo pura.

²³ Ëntö myero kür icam unu remo, piën kwö tye i remo ëka kür myero icam unu kwö kanya acël kī ringo.

²⁴ Kür myero icam unu remo; öny unu ökö pīny calö pii.

²⁵ Kür icam unu remo, ëk nyimwu k'ëthīnöwu na bino lübö körwu obed na leng, piën nwongo itimö unu gin na tye atir i wang Rwoth.

²⁶ Ëntö kwany jamini na leng kibëc ëka gin mörö kēkēn na in ikwongiri më mīö, ëka icidh i kabedo na Rwoth bino yërö.

²⁷ Mīi unu tyër awanga na mewu i wi keno tyër ka Rwoth Obangawu, ringo kanya acël kī remo. Remo më tyërwu myero ëöny i kom keno tyër ka Rwoth Obangawu, ëntö un itwërö camö ringo ökö.

²⁸ Gwökërë unu më lübö cìk ni gīnī kibëc na an atye ka mīöwu, ëk nyimwu obed na leng i karë kibëc, k'ëthīnöwu na bino lübö körwu, ka un ibino timö gin na bër ëka na tye atir i wang Rwoth Obangawu.

²⁹ Rwoth Obangawu bino tyeko rok ökö kî ï kabedo na un itye ka cîdhö më gamö lobogî, ka dong igamö unu, ëka ibedo unu ië,

³⁰ kinge na dong etyekogî ökö kî ï nyimwu, gwökêrê unu ëk kür imok unu ï owico më penyo pî obanga na gîn wörö ëka ikob unu nî, “Rok ni wörö obangagî nîngö? Wan thon ebino tímö nî kömanön.”

³¹ Un myero kür iwör unu Rwoth Obangawu kite na gîn wörö k'obangagî ködê, piën ï wörö obangagî, gîn tímö jami kibêc më kwer na Rwoth ba mitö. Gîn thon tyërö awope ëka anyiragî ï wi keno tyër ï nyim obangagî.

³² Myero ilüb unu gin na kibêc na an aciköwu ködê. Kür imêd onyo ikwany mörö kî ië.

13

Wörö obanga nökênê gîni

¹ Ka adwarpîny onyo ngat mörö na leko lek onen ï kinwu cê onyutho niwu anyuth më tango onyo gin më aura,

² ëka ka anyuth onyo gin më aura ötimêrê, cê adwarpîny okobo nî, “Eru ëwör obanga nökênê” (obanga na un bara ingeo) “ëka eru ëwörgî.”

³ Un myero kür iwiny köp k'adwarpîny onyo alek nön. Rwoth Obangawu tye ka têmöwu më nönö ka un îmarö ên kî cwinywu kibêc ëka kî tipowu kibêc.

⁴ Myero ilüb unu Rwoth Obangawu nakun ilworo unu ên. Gwök unu cîk mërê kibêc ëka iwör unu ên; tii unu nîné ëka imok unu ï kome.

⁵ Adwarpîny onyo alek nön myero enek ökö piën ên opwonyo pwony më jëm ï kom Rwoth Obangawu, n'ökwanyöwu ökö kî ï lobo Ejip ëka ökököwu

ökö kî ì lobo më opii. Adwarpîny onyo alek nön ötëmö më lõkõwu kî ì yoo na Rwoth Obangawu öcìkõwu më lübö. Un myero ìkwany gin na rac ökö kî ì kinwu.

⁶ Ka omeru, onyo wodi onyo nyari, onyo dhakö na in ìmarö, onyo okoneni na cwök kodi obwoli ìmüng nakun kobo nî, “Èrö ècìdhî èwör obanga nökënè gîñî” (obanga na kwereni onyo in ba ingeo,

⁷ obanga ka jö n'oguri, kadî tye gîñî na cwök onyo na bor, yaa kî ì ajiki më thwok lobo naka ì thwok lobo nökënè),

⁸ in myero kür iyee onyo kür iwiny köp mërè. Kür kîca omaki ì kome ëka kür ìmüng nîñè.

⁹ In myero inek èn ökö. In ènè myero ìcak tingo cingi më neko èn ëka jö kibëc bino tingo cîng-gî më neko.

¹⁰ Un ibino celo èn kî kite naka ì thöo, piën èn ötëmö më lõkõwu ökö kî ì yoo ka Rwoth Obangawu, n'òkwanyöwu ökö kî ì lobo Ejip, n'obedo kabedo më opii.

¹¹ Cè jö Icarael kibëc bino winyo ëka bedo gîñî kî lworo, ëka ngat mörö ba dökî bino tímö gin na rac na cal kî man ì kinwu.

¹² Ka iwinyo unu kî ì pacõwu mörö acël, na Rwoth Obangawu tye ka miõwu më bedo ië, nî

¹³ jö mökö na kitegî reco öya kî ì kinwu ëka öywaö thama ka jö na bedo ì pacö nön nakun kobo gîñî nî, “Èru ècìdhî ëka èwör obanga nökënè gîñî” (obanga na un bara ingeo).

¹⁴ Cè myero ipeny unu körè na bër ëka ìrang unu kî ryëkö. Ka adyer inwongo unu nî tye atîr ëka enwongo nî gin më kwer nî ötîmërè ì kinwu,

¹⁵ cē myero inek unu jō na bedo i pacō nōn kibēc kī pala abadē. Tyekugī ökō kibēc, jō kibēc na tye iē ēka līm kibēc na kwō myero enekgī ökō.

¹⁶ Cōk unu jami kibēc na un iyakō i dyere pacō kanya jīi gūrē iē, ēka iwang unu pacō nōn kī jami kibēc na tye iē na calō tyēr awanga both Rwoth Obangawu. Pacō nōn bino bedo wi obur na twal na ba dōkī ebino gērō.

¹⁷ Un myero kūr ikwany unu gin mōrō n'onwongo ētyērō ökō. Cē Rwoth bino kwanyō akēmō mērē na ger rwōk ökō, ēka bino tīmō niwu kīca, nakun nyutho cwiny mē kīca i komwu. Cē bino mīō welwu nya na pol, kite na ēn ōcīkērē kōdē kī kwong both kwerewu.

¹⁸ Pī manōn myero iwiny unu Rwoth Obangawu, mak unu cīk mērē kibēc na an atye ka mīōwu tīn ēka itīm unu gin na tye atīr i nyime.

14

Kwero cōla k'Erok

¹ Un ibedo ēthīnō ka Rwoth Obangawu. Kūr īngōl unu komwu onyo īlyēl unu terinyimwu pī kwero cōla pī jō n'ōthōō.

² Pīēn un ibedo jō na leng both Rwoth Obangawu. Ēn ōyērōwu kī kom jō kibēc na bedo gīnī i wi lobo ēk ibed unu jōgē na pīrgī tēk.

Leeni n'ēcamō ēka mana ba ēcamō

³ Kūr icam unu gin mōrō mē kwer.

⁴ Man ēnē leeni na un itwērō camōgī: dhyang, rōmō, dyēl,

⁵ aburi, egwethe, rūda, pura, dyegi kī rom na bedo i wi kite.

⁶ Un ìtwërö camö lee mörö kèkèn n'obokoro tyënë opokere ië ariö ëka na dwongo lum cë nyamö dökì.

⁷ Ëntö leeni na dwongo lum cë nyamö dökì, onyo n'obokoro tyën-gì opokere ië ariö, na un ba ibino camö ënë: kìnaga, apwöü ëka oduka. Kadì bed nì gìn dwongo lum cë nyamö dökì, gìn ope k'obokoro tyën-gì n'opokere ië ariö. Gìn obedo gìn na cìk ögëngö kì bothwu.

⁸ Pünö thon obedo gìn na cìk ögëngö; kadì bed obokoro mërë opokere ië ariö, ën ba dwongo lum cë nyamö dökì. Un myero kür ìcam ringogì onyo gudo komgì n'öthöö.

⁹ Kì kom gìn na kwö kibëc na bedo gìnì ì pii, ìtwërö unu camö mörö kèkèn na tye k'oguro na bith ì komgì ëka pök komgì.

¹⁰ Ëntö gìn mörö kèkèn na ba tye k'oguro na bith ì komgì ëka pök komgì, kür ìcam unu; piën obedo gìn na cìk ögëngö niwu më camö.

¹¹ Un ìtwërö camö wīnyü mörö kèkèn na cìk ba ögëngö.

¹² Ëntö man ënë wīny na un myero kür ìcam: jür, acuth, acuth na cöl,

¹³ ocucu, koth okolokol kibëc,

¹⁴ koth akürük kibëc,

¹⁵ udo, tula, awëwët, koth ölwithölwith kibëc,

¹⁶ tula na thithinö, tula na döngö, tula na tar,

¹⁷ tula më thim, jür na döngö, koth wīny më kulo kibëc,

¹⁸ okolokol, öthëba kori ëka olikolik.

¹⁹ Kudi kibëc na tye kì bwomgì obedo gìn na cìk ögëngö kì bothwu; kür icamugì.

20 Ëntö gin mörö kékèn na cìk ba ögèngö na tye kī bwomgī, un itwërö camö.

21 Kür ìcam unu gin mörö na in inwongo öthöö kënë. Un itwërö mīö both arok mörö na bedo ì pacöwu èk èn òcam; onyo itwërö unu cadhò both welo mörö. Un ibedo jö na leng both Rwoth Obangawu.

Kür ited unu ringo athīn dyël kī cak k'aya mërë.

Cìk na makö acël më apar

22 Myero iketh unu acël më apar më cem n'öcèk kī ì pwothiwu thenge mwaka kī mwaka.

23 Cam unu acël më apar më kalwu, köngö ölökwa na nyen, möö jeituniwu ëka èthīn kaö më rom kī dyegi ëka dhokwu ì nyim Rwoth Obangawu ì kabedo na èn bino yërö më wörö nyīngë ië. Èk ipwony unu kite më lworö Rwoth Obangawu ì karë kibëc.

24 Ëntö ka kabedo nön tye na bor ëka Rwoth Obangawu ömīöwu gum, ëka ba irömö unu yëö acël më apar na mewu (piën kabedo na Rwoth Obangawu bino yërö më wörö nyīngë ië tye na bor),

25 cë ìcadh unu acël më apar èk ilök unu obed cīlīng ëka iter unu cīlīng ì kabedo na Rwoth Obangawu bino yërö.

26 Tii unu kī cīlīng më wilö gin mörö kékèn na un imītö: dhok, rom, köngö ölök onyo kit köngö mörö na kéc, onyo gin mörö kékèn na in imītö. Cë in kanya acël kī jö më odi ibino cem unu kunön ì nyim Rwoth Obangawu kī yom cwiny.

²⁷ Kür iwëk jö Lebi na bedo gini i peciwu ata; piën gin ba tye ki lobo mörö onyo gin mörö n'obedo mēgi.

²⁸ I ajiki mē mwaka adek adek, kel unu acēl mē apar mē gin n'öcēk bothwu kibēc ēk ikan unu i peciwu,

²⁹ cē jö Lebi (n'ope gini ki lobo mörö n'obedo mēgi), Erok mörö na bedo i kinwu, ēthino kic, ēka mon thöo na bedo gini i peciwu twērö bino gini ēka cemo cē yeng, ēk Rwoth Obangawu ömüwu gum i tic kibēc na cingwu bino gudo.

15

Cik na makö jalö banya

¹ I ajiki mē mwaka abirö abirö un myero ijal benyiwu ökö.

² Man enē kite na myero etim ködē: Ngat acēlacēl n'ömio den both awodhe n'obedo dhanö mē Icarael bino jalö ökö na twal. En ba bino pido banya mērē ki both dhanö mē Icarael onyo ömīn mērē, piën karē ka Rwoth mē jalö benyi etyeko kobo ökö.

³ In itwērö pido banyani ki both arok, entö banya na tye both dhanö mē Icarael n'obedo awodhi, myero ijal ökö.

⁴ Acan mörö myero kür obed i kinwu, piën Rwoth bino miöwu gum i lobo na Rwoth Obangawu tye ka miöwu mē bedo mewu,

⁵ ka ibino timö unu gin na Rwoth Obangawu mitö nakun igwökö unu cik ni kibēc na an atye ka miöwu tin.

⁶ Piën Rwoth Obangawu bino miöwu gum kite na en öcikö ködē ēka un ibino miö den both rok na pol

ëntö ba ibino unu deno gin mörö. Un ibino löönö rok na pol ëntö rok mörö ope na bino löönöwu.

⁷ Ka ngat mörö n'obedo acan i kin ewodhwu n'obedo jö Icarael tye i pacö mörö acël i lobo na Rwoth Obangawu tye ka müöwu, kür imii unu cwinywu obed na nwang onyo kür ikwër unu më könyö.

⁸ Nakaka manön, bed unu ki cwiny na bër ëk imii unu den më gin mörö këkën na ën mitö.

⁹ Gwokiri kür tham mörö na rac ödüny i cwinyi ëka icak kobo ni, “Mwaka më abirö, n'obedo mwaka më jalö benyi, onyingo na cwök,” ëka thamani obed na rac i kom omeru n'obedo acan, cë ikwër müö gin mörö. Ën bino kok i komi i nyim Rwoth, cë in ibino dökö abal.

¹⁰ Myero imii köny bothgi abonge cwinyi mörö na rac. Cë Rwoth Obangawu bino müöni gum i kom ticni kibëc ëka jami kibëc na in ibino ketho cingi ië.

¹¹ Piën jö n'obedo ëcan ba bino rwenyo ki i lobowu. Pi manön an aciköwu ni myero iköny unu utmegowu na tye i lobowu ëka ëcan na mitö köny abonge cwiny mörö na rac.

*Cìk na makö tic k'opii
(Yaa 21:1-11)*

¹² Ka omeru onyo ameru, n'obedo dhanö më Iburu awodhi öcadhërë bothi ëka otio tic bothi pi mwaka abicël, i mwaka më abirö mërë in myero iwëk ën öcïdh ki kuc.

¹³ Ka in iwëkö ën më cïdhö, kür imii öcïdh ki cingë nono.

¹⁴ In ibino müö ën cïdhö ki jami mökö ki i kom romni onyo dyegini, kal ëka köngö ölöc abonge

cwinyi mörö na rac. Mii bothe kite na Rwoth Obangawu ömïöwu kî gum.

¹⁵ Myero ipo nî un onwongo ibedo opii i lobo Ejip ëka Rwoth Obangawu ökököwu. Manön ënë ömïö an tin amiöwu cîk ni.

¹⁶ Ëntö ka aticni okobo nini nî, “An ba amïtö cïdhö kî bothi,” piën ën mari kî jö më odi ëka ën tye kî kwö na bër kodi,

¹⁷ cë ikwany pinü ituc kî ithe i dholokek ëka ën bino bedo aticni pi kwö mërë kibëc. Tîm nî kömanön pi aticni na dhakö thon.

¹⁸ Kür imii obed gin na tæk bothi më mïö ën cïdhö abonge cül mörö, piën tic na ën otio bothi pi mwaka abicël kadhö tic ka ngat n'epango wang ariö. Cë Rwoth Obangawu bino mïö gum i kom jami kibëc na in ibino tîmö.

*Cîk na makö ëthïnö kaö më leenini
(Elebi 27:26; 27; Wel 18:15-18)*

¹⁹ Ëthïnö kaö kibëc n'ënywölögi i kin dhokni onyo romni kî dyegini, myero un ipok ökö na path pi Rwoth Obangawu. Kür imii kaö më dhokni më tio tic mörö ëka kür ñyar yer më kaö ka romni.

²⁰ In kanya acël kî jö më odi, ibino camö unu ringogî i nyim Rwoth Obangawu i kabedo na ën bino yërö mwaka kî mwaka.

²¹ Ëntö ka kany mörö na rac tye i kom lee, ongwäl onyo wangë öthöö, onyo tye kî kany mörö na rac i kome, kür myero ñtyër unu both Rwoth Obangawu.

²² Un ibino camö i peciwu, kadî bed jö na cîk ögëngö onyo na cîk ba ögëngö twërö gîni camö, kite na ngat mörö twërö camö kî ringo egwethe onyo pura.

23 Ëntö kür myero ìcam unu remo; öny unu ökö piny calö pii.

16

Poth

(Yaa 12:1-20)

¹ Gwök unu dwe më Abib* ëka ikwer unu nïnö më Poth ka Rwoth Obangawu; piën i dwe më Abib ënë Rwoth Obangawu ökwanyöwu ködë kî i Ejip i kiwor.

² Un ibino tyërö lee më Poth kî kom rom onyo dyegiwu both Rwoth Obangawu i kabedo na Rwoth bino yërö ëk nyingë obed ië.†

³ Kür ìcam unu k'ogati n'erubo kî thöbî, ëntö myero ìcam unu k'ogati na thöbî ope ië pî nïnö abirö. Man obedo ogati më can na un inënö, piën iya unu kî i lobo Ejip nakun ibünyërë unu abünya. Man bino po wiwu i kom nïnö më Poth na un iya ködë kî i Ejip pî karë kibëc më kwöwu.

⁴ Myero thöbî mörö kür enwong bothwu i lobowu pî nïnö abirö. Kür imü unu ringo lee mörö na un ityërö i kothyeno më nïnö më acël odong naka kodiko.

⁵ Myero kür ityër unu lee më Poth i pacö mörö na Rwoth Obangawu tye ka müöwu,

⁶ ëntö un myero ityër lee më Poth i kabedo na Rwoth öyërö më wörö nyingë ië i kothyeno, i caa na ceng dönyö, na ënë karë na un iya ködë kî i Ejip.

* **16:1 Abib** onwongo obedo dwe më acël kî i mwaka më Iburu na röm aröma kî dwe më adek naka i angwën më karë ni. † **16:2 Nyingë obed ië** obedo kabedo na Rwoth öyërö më wörö nyingë ië.

⁷ Ted ëka ìcam unu ì kabedo na Rwoth Obangawu bino yërö. Cë kodiko ìdök unu ì këmawu.

⁸ Cam unu ogati na thöbì ope ië pì nīnō abicël ëka nīnō mē abīrō bed unu ì cökērē mē wörö Rwoth Obangawu. Kür itii unu tic mörö ì nīnō nōn.

Karama mē Cabīt
(Yaa 34:22; Elebi 23:15-21)

⁹ Ibino unu kwanō cabīt abīrō cakērē ì karē na un ìcakō kac.

¹⁰ Cë ibino unu kwero Karama mē Cabīt gīnī ì nyim Rwoth Obangawu kī mīc na cwinywu öpwöyö; ibino mīö unu kī kite na Rwoth Obangawu ömīöwu kī gum.

¹¹ Ibino bedo unu kī yom cwiny ì nyim Rwoth Obangawu ì kabedo na ën bino yërö na calö kabedo n'ëwörö nyīngē ië. In, ëthīnō awopeni ëka anyira, eticni na cwö ëka eticni na mon, jö Lebi na bedo ì peciwu ëka Erok na bedo ì kinwu, ëthīnō kic ëka mon thöö na bedo gīnī ì kinwu.

¹² Po unu nī un onwongo ibedo unu opii ì lobo Ejip ëka myero igwökērē unu mē lübö cìk nī gīnī.

Karama mē Bölö
(Elebi 23:33-43)

¹³ Kinge na dong ityeko unu cökö cemwu ökö kī ì larü mē pwodo kal ëka ìbīö unu ölökwu, kwer unu Karama mē Bölö pì nīnō abīrō.

¹⁴ Bed unu kī yom cwiny ì karamawu; in, awopeni ëka anyira, eticni na cwö ëka eticni na mon, jö Lebi, Erok na bedo ì kinwu, ëthīnō kic ëka mon thöö na bedo ì peciwu.

¹⁵ Kwer unu karama pì nīnō abīrō ì nyim Rwoth Obangawu ì kabedo na Rwoth bino yërö. Pīën Rwoth Obangawu bino mīöwu gum ì kom cemwu

kībēc na un ìcęgö èka ì kom tic mē cīngwu cē ibino bedo unu kī yom cwiny rwök.

¹⁶ Cwö kībēc na tye ì kinwu myero obin gīnī ì nyim Rwoth Obangawu wang adek ì mwaka acēlacēl ì kabedo na èn bino yērō: ì Kwer mē Ogati na Thōbī ope iē, ì Karama mē Cabīt gīnī, èka ì Karama mē Bölö gīnī. Ngat mörö myero kür obin ì nyim Rwoth kī cīngē nono.

¹⁷ Ngat acēlacēl myero okel mīc na lübērē kī kite na Rwoth Obangawu ömīö kī gum ködē.

Ketho èngöl-köp

¹⁸ Myero iketh unu èngöl-köp èka edite pī kakawu acēlacēl ì peciwu kībēc na Rwoth Obangawu tye ka mīöwu èka gīn bino ngölö köp ka jīi atīr.

¹⁹ Kür ilök unu pido ka dhanö na köp mērē tye atīr onyo inyuth apokapoka mörö ì kin dhanö. Kür iye ewīlwu kī līm, piēn līm umo wang jö na ryēk ökö cē balö pido ka jö na köpgī tye atīr.

²⁰ Ngöl unu köp atīr, èka köp atīr kēkēn, èk ibed unu na kwö èka ibed unu ì lobo na Rwoth Obangawu tye ka mīöwu.

Wörö cal obanga nökēnē gīnī

²¹ Kür ipīdh unu yath mörö mē wörö obanga na dhakö n'ecwodo nī Acera ì nget keno tyēr ka Rwoth Obangawu na un ibino gērö.

²² Kür thon icib unu wīr mē kidi mē awörö, gin mörö na Rwoth Obangawu ba mītö.

17

¹ Kür ityēr thwön onyo römö mörö n'ongwal onyo na kany mörö rac kī i kome both Rwoth Obangani, piēn bino bedo mē kwer bothe.

² Ka ibino unu nwongo ěcwö onyo dhakö mörö na bedo i kinwu, na tye i pacö mörö acël na Rwoth Obangawu ömiöwu, na tīmö gin mörö na rac i nyim Rwoth Obangawu nakun türö cikērē mērē,

³ tio both obanga mörö nökēnē ěka wörö ceng onyo dwe onyo cēr onyo gin mörö kēkēn na tye i polo na cik ka Rwoth ökwērö.

⁴ Ka iwinyo unu köp nön, myero irang unu körē na bër. Ka irangö unu ěka imoko unu nī obedo tīm mē kwer n'ötīmērē i lobo Icarael,

⁵ myero ikel unu ěcwö onyo dhakö nön n'ötīmö tīm na rac nī i dhö wangkac mē pacöwu ěka icel unu dhanö nön kī kite naka i thöö.

⁶ Ebino neko dhanö nön pī köp mē caden ka jö ariö onyo adek, ěntö ba ebino neko ngat mörö pī köp mē caden ka ngat acël kēkēn.

⁷ Ecaden ěnē bino cakö yuo kite mē neko dhanö nön ěka dong jö kibēc kī körgi. Un myero ikwany unu gin na rac ökö kī i kinwu.

Pido köp i nyim ělamdhök

⁸ Ka ekelo pido mörö i nyimwu na ngölö tēk rwök —twērö bedo önyö remo, adoth onyo lwēny—ter unu pido nön gini yo kabedo na Rwoth Obangawu bino yērö.

⁹ Cidh both ělamdhök na gin ěnē jö Lebi ěka both angöl-köp na tye i dhö tic i caa nön. Peny kī bothgi cē gin bino ngölö köp nön nini.

¹⁰ Myero ìtìm unu kite na gín okobo niwu kòdè ì kabedo na Rwoth bino yërö. Gwökèrè unu mē tīmō gin na kibēc kite na gín okobo.

¹¹ Tii unu kite na gín opwonyowu kòdè èka kite na gín öngölö niwu. Kür ilökèrè unu ökö kī ì ngö na gín okobo niwu.

¹² Ngat mörö na bino kwërö winyo köp k'angöl-köp onyo köp k'alamdhök na tio kunön both Rwoth Obangawu myero enek ökö. Myero ikwany unu gin na rac ökö kī ì Icarael.

¹³ Cē jö kibēc bino winyo èka bino bedo gīnī kī lworö na ba bino mēdèrè gīnī dökī kī kwërö winyo köp.

Pwony na makö kom rwoth

¹⁴ Ì karè na un ibino dönyö ì lobo na Rwoth Obangawu tye ka mīöwu èka ìgamö unu, ibedo unu iē cē ikobo unu nī, “Eru eketh rwoth na bino löö onu calö rok nökèné n'ögürö onu,”

¹⁵ myero inèn nī iketho unu rwoth na Rwoth Obangawu èné öyërö. Dhanö na un ibino ketho myero obed kī ì kin utmegowu kikome. Kür iketh unu arok mörö mē lööwu na ba obedo dhanö mē Icarael.

¹⁶ Dhanö nön myero kür obed k'angole mērè na pol onyo ömī jī ödök gīnī ökö yo Ejip mē nwongo angole nökèné gīnī, pièn Rwoth yam okobo niwu nī, “Un myero kür dökī idök unu cen yo kunön.”

¹⁷ Èn myero kür önyöm mon na pol, pièn bino mīö thama mērè lökèrè ökö na path. Èn myero thon kür obed kī ryal èka gol na dwong.

18 Ka ën dong obedo i wi then ker mërë, ën myero öcöö cík ni i buk nakun kwanyö ki i kom më k'ëlamdhök n'obedo jö Lebi.

19 Ẽn myero ögwök buk ni bothe ëka ökwan pĩ karë kibëc më kwö mërë ëk opwony lworö Rwoth Obanga mërë ëka ölüb cík ni kibëc na bër.

20 Ẽn ba bino tingere malö na löö utmegö mërë jö Icarael onyo lökërë ökö ki i cík. Cë ën ëka ëkwaë mërë bino bedo i löc i ker mërë pĩ karë na lac i lobo Icarael.

18

Mïc pĩ ëlamdhök ëka Elebi

1 Ẽlamdhök n'obedo gĩnĩ Elebi, na gĩn ënë kaka ka Lebi kibëc, ba bino bedo gĩnĩ ki dul lobo mörö n'obedo mëgĩ ki i kin jö Icarael. Gĩn bino camö tyër awanga n'ëmö both Rwoth, pĩen manön ënë gĩn n'obedo mëgĩ.

2 Gĩn ba bino bedo ki dul lobo mörö më bedo mëgĩ ki i kin utmegögĩ; Rwoth ënë obedo gĩn n'epoko nigĩ kite na ën okobo bothgĩ.

3 Man ënë bino bedo wang wodhi n'ëlamdhök nwongo ki both jö na bino tyërö gĩnĩ thwön onyo römö: ringo wi bac, ringo lem ëka jamïc kibëc.

4 Un myero imiigĩ acaki kac më kalwu, köngö ölok na nyen, möö jeituni ëka yer rom n'ëcakö nyarö ki kom rom na mewu.

5 Pĩen Rwoth Obangawu otyeko yërö jö Lebi ki i kin kakawu kibëc ëk gĩn ëka ëkwaëgĩ obed jö na tio gĩnĩ ki nying Rwoth na twal.

⁶ Ka Alebi mörö öya kī ī pacō mörö acēl na ěn bedo ěē na tye kany mörö kī ī Icarael, ěka obino na cwinye öpwöyö yo kabedo na Rwoth bino yērö,

⁷ ěn twērö tic kī nyīng Rwoth Obanga mērē calö utmegö mērē kībēc n'obedo Elebi na tio kunön ī nyim Rwoth.

⁸ ěn bino nwongo dul mē cem na röm kī mē ělamdhök nökenē, kadī bed nī ěn onwongo cīlīng kī kom jami na jö mē pacō mērē öcadhö.

Tim mē kwer

⁹ Ka dong ědönyö unu ī lobo na Rwoth Obangawu tye ka mīöwu, myero ěkwēr unu lübö kit tim na reco mē kwer na rok na tye kunön timö.

¹⁰ Ngat mörö myero kür enwong kī ī kinwu na wangö wode onyo nyarē calö tyēr awanga, na pwonyo bedo dhanö na thyedho onyo tic mē jwöjwök onyo na nēnö jamïc dyēl onyo tim mörö mē jwök,

¹¹ onyo alam wör, gagī, onyo ajwök onyo amak tipo onyo na twak kī tipo ka jö n'öthöö.

¹² Ngat mörö na timö koth tim ni obedo gin mē kwer both Rwoth; piēn timö koth tim mē kwer nön ömīö Rwoth Obangawu tye ka ryēmö rok nökenē ökö kī ī nyimwu.

¹³ Myero ibed unu abonge bal mörö ī nyim Rwoth Obangawu.

Adwarpīny na nyen calö Muca

¹⁴ Rok na un ěcwök gamö lobogī mē bedo mewu obedo ginī ketho cwinygī ī köp ka jö na tio tic mē jwöjwök onyo jö na thyedho, ěntö Rwoth Obangawu ba ömīöwu twērö mē timö koth tim nön.

¹⁵ Rwoth Obangawu bino miöwu adwarpiny kî i kinwu, jö Icarael ewodhwu, na cal köda. Myero iwiny unu ên.

¹⁶ Man ênê gin na un ikwaö kî both Rwoth Obangawu i nînö na un icökêrê i Koreb. I karê nön un ikobo unu nî, “Kür imliwa ewiny dwön Rwoth Obangawa dökî, onyo ênên mac mêrê na dit rwök piên wan ebino thöo ökö.”

¹⁷ Cê Rwoth okobo nîna nî, “Köp na gîn okobo tye na bër.

¹⁸ An abino miögî adwarpiny na cal kodi kî i kin jö Icarael ewodhgî, ëka an abino ketho köpna i dhögê. Ên bino kobo nîgî köp kibêc na an acikö ên.

¹⁹ An kikoma abino penyo ngat mörö na ba bino winyo köpna n'adwarpiny bino kobo kî nyinga.

²⁰ Êntö adwarpiny na bino poro më twakö gin mörö kékên kî nyinga na an ba akobo, onyo adwarpiny na kobo köp kî nying obanga nökenê gîni, myero enek ökö.”

²¹ Gwök onyo ibino kobo unu kî i cwinywu nî, “Kara wan ebino ngeo nîngö nî köp nön ba odonyo kî i dhö Rwoth?”

²² Ka adwarpiny ötitö köp mörö kî nying Rwoth cê köp nön ba ötimêrê onyo ocobere, manön ênê köp na ba odonyo kî i dhö Rwoth. Adwarpiny nwongo ötwakö köp nön kî wie kênê, myero kür ilwor unu ên.

19

Cík na makö peci më larö kwö

¹ Ka Rwoth Obangawu otyeko rok na lobogì èn tye ka miöwu, ëka ka dong ìryëmö unugì ökö, cë ibedo unu ì pecigì ëka ì udigì,

² cë ipok unu peci adek na papath pîrwu ì lobo na Rwoth Obangawu bino miöwu më bedo mewu.

³ Ibino unu puro yoo ëka ipoko unu wang lobo na Rwoth Obangawu bino miöwu körë adek më bedo mewu, ëk ka ngat mörö oneko dhanö, èn twërö ringö yo ië më larö kwö mërë.

⁴ Man ènë köp na makö ngat n'oneko dhanö ëka ringö më larö kwö mërë kunön—ngat oneko awodhe na nwongo ba öthëna athëna ëka adinga mörö thon onwongo ope ì kin-gì cön.

⁵ Apor mërë, dhanö mörö twërö cìdhö ì bunga gîn k'awodhe më ngölö yen, cë lëb atong n'engölö kî yen oore kî ì pur mërë ëka ögöö wi awodhe oneko ökö, dhanö nön twërö ringö ì pacö mörö acël kî ì kin peci adek nön më larö kwö mërë.

⁶ Ka onwongo pacö më larö kwö tye acël kèkën, caa nökënë twërö bedo na bor n'acül kwor pî athöö twërö bedo kî karë më makö dhanö n'oneko awodhe, kadì bed onwongo ba opore më aneka, pïen adinga mörö onwongo ope ì kin-gì cön.

⁷ Man ènë ömiö an aciköwu nî myero ipok unu peci adek pîrwu.

⁸ Ka Rwoth Obangawu bino nyanö wang lobowu kite na èn öcikö both kwerewu kî kwong ëka miöwu lobo kibëc na èn öcikö bothgì,

⁹ un myero ìmëd peci adek nökënë ì kom manön. Èn bino miöwu lobo nî ka cë un ìlübö cìk kibëc na an amiöwu—më marö Rwoth Obangawu ëka më lübö yoo mërë.

10 Tīm unu man èk remo na bal mërè ope kūr ööny i lobowu na Rwoth Obangawu tye ka miöwu mē bedo mewu, èk bal mē önyö remo kūr obed i wiwu.

11 Ëntö ka dhanö mörö onwongo dag awodhe ëka obedo kūrö ën mē cakö lwëny i kome, ëka oneko ökö cē dhanö nön öringö i pacö mörö acël kī i kin peci ni,

12 edong mē pacö mërè bino oro köp mē ömö ën kī kunön cē ëmïö ën i cing ngat na myero öcül kwor èk enek ën thon.

13 Kīca myero kūr ömakwu i kome. Myero ikwany unu bal mē thöö ka dhanö n'ope kī bal ökö kī i Icarael èk nyimwu obed na leng.

14 Kūr iköb unu wang ngöm k'awodhi na yam edong oketho cön i lobo na un ibino leeno na Rwoth Obangawu bino miöwu mē bedo mewu.

Cìk na makö ecaden

15 Köp ba bino löönö ngat mörö pī köp ka caden acël pī kit bal mörö na rac na gwök onyo ën öbalö. Myero ëngöl köp pī köp k'ecaden ariö onyo adek.

16 Ka acaden mörö na cwinye rac ocung ëka odotho ngat mörö n'ötīmö bal,

17 jö ariö na tye kī köp i kin-gī myero obin gīnī i nyim Rwoth, i nyim ëlamdhök ëka i nyim ëngöl-köp n'onwongo tye gīnī i tic i caa nön.

18 Ëngöl-köp bino rangö kör köp nön na bër rwök, ka gīn onwongo nī acaden obedo ngat na twot nakun okelo adoth mē twodo i kom ömīn mërè,

19 cē ibino miö unu ën pwod, pwod na röm kī mana ën onwongo mitö ketho i kom ömīn mërè. Un myero ikwany unu gīn na rac ökö kī kinwu.

²⁰ Jö kibēc bino winyo cē bino bedo gīnī kī lworō ēka gīn na rac na cal kī man ba dōkī bino tīmērē ī kinwu.

²¹ Myero kīca kūr ōmakwu: kwō myero ēcūl kī kwō, wang ēcūl kī wang, lak ēcūl kī lak, cīng ēcūl kī cīng, tyēn ēcūl kī tyēn.

20

Cík mē cīdhō ī dhō lwēny

¹ Ka īcīdhō unu mē lwēny ī kom langwu cē īnēnō unu angole gīnī, gadigadi ēka mwony na pol na lōō mewu ōkō, kūr ibed unu kī lworō ī komgī, pīēn Rwoth Obangawu, n'ōkwanyōwu kī ī lobo Ejīp, bino woth kodwu.

² Ka dong īcwōk unu cīdhō īlwēny, alamdhōk bino bino anyim ēka twak kī mwony.

³ Ēn bino kobo nī, “Winy unu, un jō Icarael: Tin ibino unu cīdhō mē lwēny ī kom langwu. Kūr iwēk cwinywu opodhi onyo ibed unu kī lworō; kūr komwu ōmyēl onyo kūr īnyō komwu pī gīn.

⁴ Pīēn Rwoth Obangawu ēnē tye ka woth kodwu mē cīdhō lwēny pīrwu ī kom langwu mē mīōwu lōōnōgī.”

⁵ Cē edite na lōō jō na cīdhō ī dhō lwēny bino kobo bothgī nī, “Ngat mōrō tye na pod ōgērō ōdē na nyen na bara ēlēgō gum iē? Wēk ēn ōdōk ōkō pacō, onyo caa nōkēnē ēn bino thōō ōkō ī dhō lwēny cē ngat nōkēnē ēnē bino dōnyō mē bedo iē.

⁶ Ngat mōrō tye n'ōpīdhō ōlōk mērē ī pwodho cē pod bara ōcakō camō nyige? Wēk ēn ōdōk ōkō pacō, onyo caa nōkēnē ēn bino thōō ōkō ī dhō lwēny cē ngat nōkēnē ēnē bino camō nyige.

⁷ Ngat mörö tye na pod öcìkèrè kî dhakö cê bara önyömö? Wëk ên ödök pacö, onyo caa nökënë ên bino thöo ökö i dhö lwëny cê ngat nökënë ên bino nyömö dhakö nön.”

⁸ Cê edite thon bino kobo nî, “Ngat mörö tye na lwor onyo na cwinye podho? Wëk ên ödök yo pacö, êk acikari ewodhe kür cwinygî opodhi kamê ên.”

⁹ I karê n'edite otyeko twak gîni kî jö na cîdhö i dhö lwëny, gîn bino yërö edite na tëlö wigî.

¹⁰ Ka ìcîdhö unu më celo pacö mörö, un myero kono imîi jö më pacö nön karê më penyo pî kuc.

¹¹ Ka gîn oyeo cê öyabö dhö wangkacgî gîni, jö kibêc na tye i pacö nön bino bedo opiiwu êka bino gîni tio tic na tøk pîrwu.

¹² Èntö ka gîn ökwërö më penyo pî kuc cê öyërö gîni më lwëny kodwu, gür unu pacö nön kî mwony na mewu.

¹³ Ka Rwoth Obangawu ömiögî i cîngwu, myero inek unu cwö kibêc na tye i pacö nön kî pala abadë.

¹⁴ Èntö mon, èthînö, dhok êka kî gîn mörö kékên na tye i pacö, ìtwërö unu tero na calö jami n'ëyakö më bedo mewu. Èka ìtwërö unu tic kî jami n'ëyakö na Rwoth Obangawu ömiöwu kî both langwu.

¹⁵ Man ênë gîn na un ibino tîmö i kom peci kibêc na tye na bor kodwu êka i peci ka rok na ba cwök kodwu gîni.

¹⁶ Èntö i peci k'Erok na Rwoth Obangawu bino miöwu më bedo mewu, kür iwëk unu gîn mörö na yweo odong na kwö.

¹⁷ Myero ityek unu jö kibêc—jö Kit, jö Amor, jö Kanaan, jö Periji, jö Kibi êka jö Jebuc—kite na Rwoth Obangawu öcîköwu ködë.

¹⁸ Ka iwëkö unu obedo gĩnĩ na kwö, cë gĩn bino pwonyowu mē lübö gĩn mē kwer kibëc na gĩn tĩmō ĩ wörö obangagĩ ěka bino miö ĩbalö unu ĩ kom Rwoth Obangawu.

¹⁹ Ka ĩgürö unu pacö mörö pĩ caa na lac, nakun ĩlwënyö unu ěk ĩgam, kür ĩngöl unu yen k'atong, piën un ĩtwërö camö nyige. Yen thon obedo langwu, na myero ĩlwëny unu ĩ komgĩ?

²⁰ Un ĩtwërö ngölö yen na ba nyakö nyig-gĩ mē acama ěka itii unu kōdē mē yübö madala ěka pem ěk ökönywu mē idho ĩ pacö nön na lwënyö ĩ komwu naka ka ĩgamö unu pacö nön.

21

Tyeke köp ĩ kom nek na ba ngere

¹ Ka ebino nwongo dhanö mörö obuto n'eneko ĩ lobo na Rwoth Obangawu tye ka miöwu mē bedo mewu, cë ba engeo ngat n'oneko ěn,

² edongwu ěka ěngöl-köpwu bino cĩdhö gĩnĩ yökö mē pimo bor pĩny cakërē kĩ ĩ kom lyël naka ĩ peci na cwök kĩ kany nön.

³ Cë edong na tye ĩ pacö na cwök kĩ kom dhanö n'eneko bino gĩnĩ kelo nya raa na bara otio tic mörö, na bara eketho ayokoth ĩ ngute mē ywaö kwër wanu.

⁴ Edong mē pacö nön bino kelo gĩnĩ nya raa naka ĩ ora mörö na pige möl, ĩ ora mörö na naka yam ba epuro, kanya ba ěcwö kodhi mörö ĩë. Gĩn bino türö ngut nya raa ökö ĩ ora kunön.

⁵ Cë ělamdhök n'obedo Elebi myero obin gĩnĩ anyim, piën Rwoth Obangawu öyërögĩ pĩ tic mërē ěka mē lamö gum kĩ nyĩng Rwoth. Gĩn myero otyek köp mē pido ěka lwëny kibëc.

⁶ Edong kībēc mē pacō na cwök kī kanya enwongo kom dhanō n'eneko iē bino lwökō cīng-gī i kom nya raa na gīn ȳtūrō ngute i ora,

⁷ cē gīn bino kobo nī, “Cīngwa ba ȳōnyō remo ka dhanō ni, onyo wangwa ba ȳnēnō ka eneko.

⁸ Rwoth tīm kīca i kom jō Icarael na gīn ēnē jō na megī na yam ikökōgī. Kūr iketh bal mē remo ka dhanō n'ope kī bal i wi lwak na megī.” Cē itīm kīca i kom bal mē remo n'ēōnyō.

⁹ Ibino unu lwökō bal mē ȳnyō remo kī i kinwu kōmanōn, ka itīmō unu gīn na nen n'atīr kī i wang Rwoth.

Nyōmō dhakō n'ēmakō kī dhō lwēny

¹⁰ Ka icīdhō unu mē lwēny i kom langwu, cē Rwoth Obangawu ȳmīȳgī i cīngwu ēka itero unu jō n'ēmakōgī kī dhō lwēny,

¹¹ ēka in inēnō dhakō mōrō na leng kī kin jō n'ēmakō kī dhō lwēny cē cwinyi ȳmarō, in itwērō tero ēn ēk obed dhakōni.

¹² In myero ikel ēn yo pari ēka ilyēl wie cē ingad lwētē ȳkō.

¹³ Gōny bōng mērē n'onwongo ēn oruko i karē n'ēmakō kōdē kī i dhō lwēny. Kinge na ēn dong obedo pari ēka okumo pī apap mērē ēka aya mērē pī dwe acēl, cē in itwērō cīdhō bothe mē bedo cwōrē ēka ēn bino bedo dhakōni.

¹⁴ Ka inwongo nī cwinyi ba dōk mītō ēn, cē itwērō wēkō ēn cīdhō yo kanya cwinye mītō. In myero kūr icadh ēn onyo iter ēn na calō opii, pīēn in dong ilanō ēn ȳkō.

Twērō k'athīn kaō

¹⁵ Ka ēcwō mōrō tye kī mon ariō, ēka marō ngat acēl na lōō nōkēnē ca, ēka mon ariō ni kībēc

önywölö gīnī èthīnō awope nīnē, èntō athīn kaō obedo wod ka dhakō na èn ba marō,

¹⁶ ka ècwō ni tye ka poko jami mērē both awope mērē, myero èn kūr òmīī twērō k'athīn kaō both wod ka dhakō na èn marō, nakaka wode kikome n'obedo kaō, wod ka dhakō na èn ba marō.

¹⁷ Èntō èn myero onyuth athīn kaō ka dhakō mērē na èn ba marō, nakun doko gin n'epoko nīnē wang ariō kī kom jami na èn tye kōdē kibēc. Athīn awobi nōn ènē obedo acaki mē tèkō k'apap mērē. Twērō k'athīn kaō obedo mēgē.

Awobi na jēm

¹⁸ Ka dhanō mōrō tye kī wode na ngute nwang èka obedo ngat na jēm, na ba winyo dhō apap mērē onyo aya mērē, kadī bed ègōō èn kī lūth, ba bino winyogī.

¹⁹ Apap mērē èka aya mērē bino makō gīnī èn èka etero both edong ī dhō wangkac mē pacō na èn bedo iē.

²⁰ Gīn bino kobo both edong nī, “Wodwa ni ngute nwang èka obedo ngat na jēm. Èn ba wōrōwa. Èn obedo ngat n'owor èka amērō.”

²¹ Cē jō mē pacō nōn kibēc bino celo èn kī kite naka thōō. Un myero ikwany gin na rac òkō kī ī kinwu. Jō Icarael kibēc bino winyo cē bedo gīnī kī lworō.

Cìk na papath

²² Ka dhanō mōrō òtīmō bal na mīō èn nwongo pwod mē thōō, èka ñgabō unu èn malō ī wi yath,

²³ un myero kūr iwēk kome òngabērē ī wi yath naka kiwor. Ik unu kome òkō ī nīnō nōn, pīen dhanō mōrō n'engabō kome ī wi yath bedo dhanō

n'Obanga ölamö. Un myero kür ibal lobowu na Rwoth Obangawu tye ka miöwu më bedo mewu.

22

¹ Ka in inënö thwön onyo römö k'omeru n'orwenyo ökö ata, kür inën anëna; myero idwök yo both omeru.

² Ka won mërë ba bedo na cwök kodi onyo ba ingeo won mërë, cë in myero iter lee n'orwenyo nön yo pari ëka igwök naka ka won mërë obino na tye ka rangö. Cë imüi bothe.

³ In ibino timö nï kömanön i kom kana mërë, böng mërë, onyo gin mörö kékën n'omeru orwenyo ëka in inwongo; in kür inën anëna.

⁴ Ka in inwongo kana onyo thwön k'omeru n'opodho piny i nget yoo, kür inën anëna, ëntö köny ën më tingo malö ëk ocung ki tyënë.

⁵ Dhakö myero kür oruk böng ka cwö, onyo ëcwö kür oruk böng ka mon, piën dhanö n'ötümö kömanön bedo më kwer both Rwoth Obangawu.

⁶ Ka in tye ka woth i yoo cë icop i kom öd winyü i nget yoo, onyo i wi yath onyo i ngöm, ëka mün winyü obuto i kom ëthinë onyo i kom tòngë, kür imak mün mërë kanya acël k'ëthinë.

⁷ In itwëro tero ëthinë, cë iwëkö mün mërë cidhö, ëk nyimwu obed na leng ëka ibed unu na kwö pi karë na lac.

⁸ Ka in igërö öt na nyen, myero iketh gin mörö na jükö podho ka dhanö orum wi öt ëk kür okel bal më önyö remo i odi ka ngat mörö opodho ki i wi öt.

⁹ Kür icwö kodhi na papath arïö i pwodho ölöknï, ka icwö, miö gin na kibëc n'öcëk ië myero eter i öt k'Obanga, gin na in icwö ië thon naka ki nyig ölöc.

¹⁰ Kür itwe thwön ëka kana kanya acël më pur.

¹¹ Kür iruk böngü n'obedo yer ëka böngü na pwöth n'ëkwö kanya acël.

¹² Myero ikwö töl tacël na lyero i twok böngü angwën na in iruko.

Cìk na makö nyakö na bara ënyömö

¹³ Ka ëcwö mörö önyömö dhakö cë obedo ködë, cë ökwërö ën ökö,

¹⁴ cë okobo köp na rac i kome, na balö nyïng dhakö nakun kobo ni, “An anyömö dhakö ni, ëntö i karë na an abedo ködë, anwongo gin mörö ope na nyutho ni ën bara ongere k'ëcwö.”

¹⁵ Cë apap ëka aya ka dhakö nön bino kelo gini gin na nyutho ni ën bara ongere k'ëcwö both edong i dhö wangkac më pacö.

¹⁶ Apap mërë bino kobo both edong ni, “An amïö nyara both ëcwö ni ëk önyöm ëntö ökwërö nyara ökö.

¹⁷ Kobedini ën okelo köp më adoth i kome nakun kobo ni, ‘An anwongo gin mörö ope na nyutho ni ën bara ongere k'ëcwö.’ Ëntö man ënë gin na nyutho ni nyara bara ongere k'ëcwö.” Cë enyodo mërë bino yarö böngü i nyim edong më pacö.

¹⁸ Edong më pacö bino tero ëcwö nön ëka epwodo.

¹⁹ Gin bino ngölö ninë cül më ryal mia acël. Gin bino mïö both apap ka dhakö, piën ëcwö nön öbalö nyïng nya jö Icarael na bara ongere k'ëcwö. Cë ën bino mëdërë më bedo dhakö mërë; ëka myero kür ökwër dhakö nön pi karë më kwö mërë kibëc.

20 Ëntö ka köp më adoth nön tye atir, ëka gin mörö ope n'enwongo na nyutho nĩ dhakö nön bara ongere k'ëcwö,

21 cë jö më pacö nön bino kelo dhakö nön i dholokek më öt k'apap mërë ëka kī kunön cwö më pacö nön bino celo ën kī kite naka thöö. Ën ötīmō gin më lewic i Icarael nakun obedo tīmō tīm më ölyang i karë na ën bedo i öt k'apap mërë. Un myero ikwany unu gin na rac ökö kī i kinwu.

22 Ka ebino nwongo ëcwö mörö n'obedo kī dhakö ka ngat nökenë, ëcwö n'obedo ködë ëka dhakö nön myero enekgi ökö. Un myero ikwany unu gin na rac ökö kī i Icarael.

23 Ka ëcwö mörö kī i pacö oromo kī nyakö na bara ongere k'ëcwö, n'onwongo öcikerë kī ngat mörö më anyöma cë obedo ködë,

24 un ibino tero jö ariö nön kibëc yökö i dhö wangkac më pacö nön, ëka ecelogi kī kite naka i thöö. Eneko nyakö nön piën ba ögöo oduru ëk ëkönyë ëka eneko ëcwö piën ötürö cìk më bedo kī dhakö ka ngat nökenë. Un myero ikwany unu gin na rac ökö kī kinwu.

25 Ëntö ka ëcwö mörö oromo kī nyakö n'öcikerë kī ngat mörö më anyöma i dye thim cë obedo ködë tètëk, ëcwö këken n'ötīmō gin ni ënë ebino neko.

26 Kür itim unu gin mörö i kom nyakö; piën ën ba öbalö bal mörö na römö ngölö ninë thöö. Köp ni röm kī köp k'ëcwö n'ölwënyö i kom awodhe cë oneko ökö,

27 piën ëcwö oromo kī dhakö n'ëcikerë ködë më anyöma i thim cë obedo ködë tètëk ëka dhakö ögöo oduru, ëntö ngat mörö onwongo ope kunön na twërö könyö ën.

²⁸ Ka ëcwö mörö oromo kî nyakö na bara ongere k'ëcwö n'onwongo ba öcîkërë më anyöma ëka obedo ködë tètëk cë engeogi,

²⁹ ën bino cülö apap ka nyakö ryal pyer abic. Ën myero önyöm nyakö nön piën ën ötīmō bal ī kome. Ën ba bino kwërö dhakö nön pī karë më kwö mërë kibëc.

³⁰ Dhanö mörö kür obed kî dhakö k'apap mërë; ën myero kür ömīi lewic ī kom apap mërë.

23

Jö n'ëryëmögî ökö kî ī athuko

¹ Dhanö n'edino onyo n'ëngölö kome më cwö ökö ba bino dönyö ī athuko ka Rwoth.

² Dhanö n'ënywölö ī lek ba bino dönyö ī athuko ka Rwoth, kadī naka ëkwaëgî më apar mörö ba bino dönyö ī athuko ka Rwoth.

³ Ngat mörö n'obedo dhanö më Amon onyo dhanö më Moab ba bino dönyö ī athuko ka Rwoth, kadī naka ëkwaëgî më apar, mörö ba bino dönyö ī athuko ka Rwoth.

⁴ Piën gîn ba obino më romo kodwu kî cem ëka kî pii ī karë na un itye ka bino kî ī Ejip. Gîn obino opango Balaam wod ka Beor kî ī Petor na tye ī Aram Naaraim* ëk obin ölamwu.

⁵ Ëntö Rwoth Obangawu ökwërö winyo köp ka Balaam ökö. Ën obino ölökö köp më lamöwu ödökö më gum pīrwu, piën Rwoth Obangawu maröwu.

⁶ Kür itīm unu gîn mörö na kelo nīgî kuc kodwu ëka lönyö, pī karë më kwöwu kibëc.

* **23:4 Naaraim** manön, Kukuju kuthö Mecopotamia.

⁷ Kür ìcaa unu dhanö mörö më Edom, piën gín obedo wat kodwu. Kür ìcaa unu dhanö mörö më Ejip, piën ibino ibedo unu Erok ì lobogì.

⁸ Èthìnögì na gín bino nywölö n'obedo èkwaègì më run më adek bino dönyö ì athuko ka Rwoth.

Gwökö cìk më lengo ì laì

⁹ Ka ìcìdhö unu më lwëny kì langwu, gwökërë unu kì ì kom gín mörö na ba leng.

¹⁰ Ka ècwö mörö tye ì kinwu na cìk ögëngö piën oleko lek më kiwor, èn myero öcìdh yökö èka obed kunön.

¹¹ Èntö ka pïny dong yutho èn myero ölwökërë, èka ka ceng ödönyö èn twërö dwogo ì laì.

¹² Yüb unu kany mörö yökö ì nge laì kanya un ibino cìdhö ië më könyërë.

¹³ Ngat acèlacèl myero obed kì gín mörö më künyö pïny ì kin jami më lwënywu, èka ka ikonyiri, küny bur èk ium ökö.

¹⁴ Piën Rwoth Obangawu wowotha ì dye laìwu më gwököwu èka më müö langwu ì cingwu. Laìwu myero obed na leng èk kür önën gín mörö na ba leng cè lökërë ökö kì bothwu.

Cìk na papath

¹⁵ Ka opii mörö öringö ökö kì both adwong mërë cè opono bothi, kür imii èn ödök both adwong mërë.

¹⁶ Müi èn obed ì kinwu kany mörö kèkën na cwinye mitö èka ì pacö mörö kèkën na èn öyërö. Kür idii èn.

¹⁷ Dhanö mörö më Icarael n'obedo ècwö onyo dhakö myero kür obed ngat na tímö tím më ölaya ì öt wörö jwök.

18 Kür ikel unu ciling më cül n'enwongo kî kom tim më ölaya n'öya kî both dhakö onyo ëcwö i öt ka Rwoth Obangawu më cülö kwong mörö, piën jami nön kibëc obedo gin më kwer both Rwoth Obangawu.

19 Kür imüi dhanö më Icarael awodhi öcül magoba pi ciling, cem onyo gin mörö këkën na twërö kelo magoba na ën odeno.

20 In itwërö müö arok cülö magoba ëntö pathi dhanö më Icarael awodhi. Gwök unu cik ni ëk Rwoth Obangawu ömüiwu gum i kom gin na kibëc na un ibino ketho cingwu ië i lobo na un itye ka dönyö më gamö bedo mewu.

21 Ka ikwongo kwong both Rwoth Obangani, kür igaliri më cobo, piën Rwoth Obangawu bino penyoni pirë ëka ibino bedo ngat n'ötömö bal.

22 Ëntö ka ba ikwongo kwong, ba ibino bedo ngat n'ötömö bal.

23 Ëntö gin mörö këkën na donyo kî i dhogi myero inën ni icobo, piën in ikwongo kwong keni kî dhogi both Rwoth Obangani.

24 Ka idönyö i pwodho ölok k'awodhi, in itwërö camö nyig ölok kibëc na cwinyi mitö, ëntö kür iketh mörö i aditani.

25 Ka idönyö i pwodho kal k'awodhi, in itwërö rïdhö kal kî cingi, ëntö kür ikaa kal kî pala.

24

Cík na makö këthö nyom

1 Ka ëcwö mörö önyömö dhakö na ba yomo cwinye piën onwongo gin mörö na rac ködë, ëcwö nön twërö cöö waraga më këthö nyom, cë müö i cingë ëka ryëmö ën ökö kî i ödë.

² Cê kinge na ên dong öya ökö kî î ödê, ên dökö dhakö k'êcwö nökênê.

³ Ka cwörê mē ariö ba mitö ên, êcwö nön cöo waraga ninê mē kēthö nyom, cê mïö î cingê, êka ryēmö ökö kî î ödê, onyo ka cwörê mē ariö nön öthöo ökö,

⁴ cwörê mē acël n'ökwërö ên ba dök bino nyömö ên mē bedo dhakö mērê kinge na ên dong öbal ökö. Manön bino bedo gin mē kwer both Rwoth. Kür ikel unu bal î lobo na Rwoth Obangawu tye ka miöwu mē bedo mewu.

⁵ Ka êcwö mörö pod onyomo anyoma, myero kür emii öcîdhî î dhö lwëny onyo emii tic ka lwak mörö nökênê. Ên myero obed mwaka acël nakun bedo parê êk okel yom cwiny both dhakö na ên önyömö.

⁶ Kür ikwany pong onyo nya pong rego na calö gin n'ejengo î den. Piën manön bino bedo calö kwanyö kwö ka dhanö mē bedo gin n'ejengo.

⁷ Ka enwongo ngat mörö kwalö dhanö mē Icarael awodhe, êka tero na rac na calö opii onyo cadhö ên. Ngat n'ökwälö dhanö nön myero enek ökö. Un myero ikwany gin na rac ökö kî î kinwu.

⁸ Na makö köp î kom two dhöbü, gwökêrê unu rwök êk ilüb unu gin n'ëlamdhök n'obedo Elebi okobo niwu. Myero ilüb unu na bër ngö na an acikögi.

⁹ Po unu î kom ngö na Rwoth Obangawu ötimö î kom Miriam kî î wanga yoo kinge na un iya kî î Ejip.

¹⁰ Ka imiö gin mörö mē adena both awodhi, kür idöny î ödê mē kwanyö gin mörö n'emïö bothi na calö gin n'ejengo.

11 In myero ibed yökö, èk dhanö na in ìmìö gin mörö mè adena okel gin na èn ojengo bothi yökö.

12 Ka dhanö nön obedo acan, kür ìmìi böngü na èn ojengo obut bothi.

13 Dwök böngü mërè na ceng bara ödönyö èk oumereködè. Cè èn bino pwöyöni èka ebino kwanö na calö tic n'atir i nyim Rwoth Obangani.

14 Kür idüi atic na in ipango n'obedo acan èka na mitö köny, kono kadì atic nön obedo dhanö mè Icarael awodhi onyo arok na bedo i pacöwu mörö acël.

15 In myero ìmìi cül mërè i nünö nön na bara ceng ödönyö, piën èn obedo acan èka geno gin nön. Ka ba ìmìö, èn bino kok i komi both Rwoth, èka ibino bedo ngat n'ötümö bal.

16 Ba ebino neko enyodo pì bal k'èthünögì, onyo ba ebino neko èthünö pì bal k'enyodogì. Ngat acèlacèl ebino neko pì bal mërè.

17 Kür ìbal pido k'arok onyo k'athün kic mörö, onyo iter böngü ka dha thöo na calö gin n'ejengo.

18 Po unu nì un onwongo ibedo opii i lobo Ejip èka Rwoth Obangawu obino ökököwu kì kunön. Manön ènè ömìö an aciköwu mè lübö cìk nì.

19 Ka in itye ka kaö kac kì i pwodhoni, èka ìnènö körè mörö na ba ìkaö, kür idök cen mè cìdhö kaö dökì. Myero iwèk odong pì Erok, èthünö kic èka mon thöo, èk Rwoth Obangawu ömüwu gum i kom tic kibèc mè cingwu.

20 Ka ipüdö nyig jeitunini kì i wi yath, kür dökì idök cen mè püdö man odong i wi yath. Myero iwèk nyig jeituni n'odong pì Erok, èthünö kic èka mon thöo.

²¹ Ka ìpüdö nyig ölök kî ì pwodho ölökni, kür dökî ìdök cen më püdö man odong. Myero iwëk nyig ölök n'odong pî Erok, èthínö kic éka mon thöö.

²² Po unu nî un onwongo ibedo opii ì lobo Ejip. Manön ènè ömïö an aciköwu më lübö cìk nî.

25

¹ Ka jö ariö tye gîni kî köp ì kin-gî, gîn myero oter ì nyim okiko éka èngöl-köp bino ngölö köp cè gönyö gîni dhanö n'ope kî bal éka ngölö köp ì wi dhanö n'öbalö.

² Cè ka dhanö n'öbalö pore nî myero ègöö, angöl-köp bino müö èn buto pîny éka ègöö ì nyime kî wel lüth n'oporo bal mërè.

³ Angöl-köp twërö müö ègöö lüth pyer angwën èntö kür ökadh manön. Ka ègöö na kadhö, ömînwu ebino lanö ì wangwu.

⁴ Kür itwe dhö thwön ka tye ka nyönö kal më apwoda.

⁵ Ka utmego na bedo gîni kanya acël éka acël kî kin-gî öthöö ökö abonge athîn mörö, myero cii athöö kür önyömërè kî ngat mörö na ba obedo dhanö më dholokek. Ömîn cwörè ènè bino tero èn na calö dhakö mërè éka cobo tic më bedo cwörè nakaka ömîn mërè.

⁶ Wode na èn bino nywölö më acël ebino cakö nyîngè kî nyîng ömîn mërè n'öthöö, èk nyîngè kür orweny ökö kî ì Icarael.

⁷ Èntö ka ömîn athöö ba mitö tero cii ömîn mërè, dha thöö bino cidhö ì dhö wangkac më pacö both edong éka kobo nî, “Ömîn cwöra ökwërö müö nyîng ömîn mërè nen ì Icarael; èn ba mitö cobo tic më bedo cwöra nakaka ömîn mërè.”

⁸ Cē edong mē pacō mērē bino cwodo òmīn athōō ēka ētwak kōdē. Ka ocere nakun kobo nī, “An ba amītō tero ēn,”

⁹ cii òmīn athōō bino cīdhō bothe ī nyim edong cē wōdhō wōr acēl òkō kī ī tyēn òmīn cwōrē, ngūlō laō dhōgē ī wangē ēka kobo nī, “Man ēnē gīn n'ebino tīmō ī kom dhanō mōrō na ba bino nywōlō ēthīnō ka wī òmīn mērē.”

¹⁰ Dholokek ka dhanō nōn ebino cwodo kī ī Icarael nī, “Ōt ka dhanō n'ēwōdhō wōrē òkō kī ī tyēnē.”

¹¹ Ka cwō ariō tye ka lwēny ēka dhakō ka ngat acēl obino mē kōnyō cwōrē kī both ngat na tye ka lwēny kōdē, ēka otero cīngē cē òmakō kome mē cwō,

¹² un myero ingun unu cīng dhakō nōn òkō. Kūr kīca òmakwu ī kome.

¹³ Kūr ibed unu kī gīn mē pimo jami ariō ī ocwewu—acēl na pēk ēka acēl na yot.

¹⁴ Kūr ibed unu kī gīn mē pimo jami ī òdwu—acēl na thwōnē ēka acēl na tīdī.

¹⁵ Myero ibed unu kī gīn mē pimo jami na bēr, na pimo jami ī wangē, ēk ibed unu ī lobo na Rwoth Obangawu tye ka mīōwu pī karē na lac.

¹⁶ Pīēn jō kībēc na tīmō koth tic nī, jō na tīmō gīn na ba tye atīr, gīn obedo gīn mē kwer kī both Rwoth Obangawu.

¹⁷ Po unu ī kom gīn na jō Amalek òtīmō ī komwu ī yoo ī karē na un īya òkō kī ī Ejip.

¹⁸ Gīn òlwēnyō ī komwu ī karē na un idhero rwōk na tēkō mōrō ope ī komwu. Gīn oneko jō kībēc n'onwongo odong cen nakun ba lworō gīnī Obanga.

¹⁹ Pì manön, ka Rwoth Obangawu ömïöwu iyweo kî ï kom langwu kîbéc n'ögüröwu ï lobo na Rwoth Obangawu tye ka miöwu ëk igam unu më bedo mewu, myero inek unu jö Amalek kîbéc ëk ngat mörö kür dökî opo ï komgî na twal kî ï thë polo. Kür imïi wiwu owil!

26

Mic më wi cem ëka acël më apar

¹ Ka un idönyö ï lobo na Rwoth Obangawu tye ka miöwu na calö mewu ëka igamö unu ökö cë ibedo unu ië,

² kwany unu wi cem mökö kî ï kom cem kîbéc n'ökakö cëk kî ï ngöm na Rwoth Obangawu tye ka miöwu ëka ikethgî ï adita. Cë iter unu ï kabedo na Rwoth Obangawu bino yërö më wörö nyîngë ië.

³ In myero icidh both alamdhök na tye ï dhö tic ï caa nön ëka ikob ninë nî, “Tin dong an atuco both Rwoth Obangani nî an athuno ï lobo na Rwoth okwongo both kwerewa më miöwa.”

⁴ Cë alamdhök bino gamö adita kî bothi ëka ketho ï nyim keno tyër ka Rwoth Obangani.

⁵ Cë in ibino kobo ï nyim Rwoth Obangani nî, “Kwaröna onwongo obedo dhanö më Aram, n'onwongo wotho awotha. Ën obino öcidhö yo Ejip kî jö na nönök ëka obedo kunön cë ödökö rok na dit, na tæk ëka n'önya gîni na pol.

⁶ Ëntö jö Ejip obedo ka tic ködwa na rac rwök ëka ömïöwa ëlimö can, nakun ëmïöwa etio tic na tæk.

⁷ Cë wan ekok both Rwoth, Obanga ka kwerewa, ëka Rwoth owinyo kokowa cë önönö pëköwa, tic na tæk n'eketho ï komwa ëka kite n'ëdiöwa ködë.

⁸ Cè Rwoth ökwanyöwa ökö kī ī Ejip kī twër më badë ëka kī tēkö mërë, kī tīm na kelo lworō na thwönë, k'anyuth më tango ëka gin më aura gīnī.

⁹ Ēn okelowa naka ī kabedo ni ëka ömīöwa lobo ni, lobo na mio na cak kī möö kic möl kī ië.

¹⁰ Cè kobedini dong, an akelo wi cem n'öcakö cëk kī ī ngöm na in Rwoth īmīa.” Cè in myero iketh adīta ī nyim Rwoth Obangani ëka iwör ěn.

¹¹ In ibino bedo kī yom cwiny kanya acël kī jö Lebi ëka Erok na bedo gīnī ī kinwu kī gin na kibëc na bër na Rwoth Obangani ömīö bothi ëka jö më odi.

¹² Ka in ityeko miö acël më apar më gin n'öcëk ī mwaka më adek mërë, mwaka më miö acël më apar, in ibino miö both jö Lebi, Erok, ëthīnō kic ëka mon thöō ëk gīn obed kī gin më acama na römō miögī yeng kī ī peciwu.

¹³ Cè in ibino kobo ī nyim Rwoth Obangani nī, “An dong atyeko kwanyö acël më apar ökö kī ī öda ëka amiö both jö Lebi, Erok, ëthīnō kic ëka mon thöō kite na in icīka ködë. An ba atürō onyo wia ba owil ī kom cīkni gīnī.

¹⁴ An ba acamö acël më apar ī karë n'onwongo an akwero cōla, onyo kwanyö mörō kī ië ī karë na cīk ögënga, onyo tyërō both tipo ka ngat n'öthöō. An awinyo köp ka Rwoth Obangana; an atīmō jami kibëc na in icīka ië.

¹⁵ Nën pīny kī ī kabedoni na leng na tye ī polo, mīi gum ī kom jogi Icarael ëka ī kom lobo na in īmīöwa kite na in icikiri ködë kī kwong both kwerewa, lobo na mio na cak kī möö kic möl kī ië.”

Lüb cīk ka Rwoth

¹⁶ Tin Rwoth Obangawu öcüköwu më Lübö cík mërë kibëc. Pî manön myero igwökërë unu më Lübö kî cwinywu kibëc ëka kî tipowu kibëc.

¹⁷ Tin dong ituco köp î kom Rwoth nî ën obedo Obangani, ëka ibino Lübö yoo mërë nakun igwökö cík mërë kibëc, ëka nî ibino winyo köp mërë.

¹⁸ Rwoth otuco köp î komwu nî tin un ibedo jögë na pîrgî tæk kite na ën öcükërë ködë, ëka un myero igwök cík mërë kibëc.

¹⁹ Ën otuco nî ebino miöwu bedo rok na tæk na löö rok nökenë kibëc na ën eketho ëka un ibino miö pak kî wörö î nyingë. Un ibino bedo jö na leng both Rwoth Obangawu kite na ën öcükërë ködë.

27

Keno tyër î wi Kidi Ebal

¹ Muca ëka edong më Icarael okobo ginî both jîi nî, “Gwök unu cík nî kibëc na an tin atye ka miöwu.

² Î nînö na un ibino ngölö kî kulo Jordan më dönyö î lobo na Rwoth Obangawu bino miöwu, un ibino cicibo kite na thwon cë ipu unu komgî kî rangi na tar.

³ Cöö köp kibëc më cík nî î komgî ka ipoth unu yo löka më dönyö î lobo na Rwoth Obangawu tye ka miöwu, lobo na mio na cak kî möö kic möl kî ië, kite na Rwoth, Obanga ka kwerewu, öcükërë kodwu.

⁴ Ka dong ingölö unu kulo Jordan, cicibo unu kite nî î wi Kidi Ebal kit na an atye ka cüköwu ködë tin. Myero ipu unu komgî kî rangi na tar.

⁵ Gër unu keno tyër n'ëyübö kî kite both Rwoth Obangawu kunön. Kür itii unu kî nywenyo mörö më paögi.

⁶ Myero ìgèr unu keno tyèr ka Rwoth Obangawu kī kite na lūl ēka ìryèd unu tyèr awanga ì wie both Rwoth Obangawu.

⁷ Ngöl unu thon tyèr mē kuc nakun ìcamö unu kunön, kanya un ibino bedo kī yom cwiny ì nyim Rwoth Obangawu.

⁸ Un myero ìcöö na bër köp kibëc mē cìk ni ì kom kite ni na un icicibo.”

Alem kī ì Kidi mē Ebal

⁹ Cē Muca ēka ēlamdhök n'obedo Elebi okobo both jö Icarael kibëc nī, “Līng unu moth, un jö Icarael, ēk iwiny unu köp! Un dong idökö jö ka Rwoth Obangawu.

¹⁰ Pī manön, un myero dong iwiny unu köp ka Rwoth Obangawu ēk ilüb unu cìk mērē kibëc na an atye ka miöwu tin.”

¹¹ Ì nīnō nön kikokome Muca öcökö jīi nī:

¹² Ka ìngölö unu kulo Jordan, kaka ka Cimeon, Lebi, Yuda, Icarak, Yocepu ēka Benjamin bino cung gīnī ì wi Kidi Gerijim mē lamö gum ì kom jīi.

¹³ Èka kaka ka Reuben, Gad, Acer, Jabulon, Dan, ēka Naputali bino cung gīnī ì wi Kidi Ebal mē lamö cen ì kom jīi.

¹⁴ Cē jö Lebi bino redo gīnī rwök both jö mē Icarael kibëc nī:

¹⁵ “Cen myero ömak dhanö mörö na bino yübö cal jwök n'ēpaö apaa onyo nywenyo n'ēlīö—n'obedo gin mē kwer both Rwoth, n'adīrū öyübö kī cīngē—ēka ocibo ì mūng mē awöra.”

Cē jö kibëc bino gamö nī, “Amën!”

¹⁶ “Cen myero ömak dhanö mörö na ba bino wörö apap mērē ēka aya mērē.”

Cē jö kibëc bino gamö nī, “Amën!”

17 “Cen myero òmak dhanö mörö na bino cwarö kidi më wang ngöm k'awodhe.”

Cë jö kibëc bino gamö nî, “Amën!”

18 “Cen myero òmak dhanö mörö na bino miö athöö wang lübö yoo na path.”

Cë jö kibëc bino gamö nî, “Amën!”

19 “Cen myero òmak dhanö mörö na bino balö pido k'arok, athîn kic onyo dha thöö ëka miö köp löö.”

Cë jö kibëc bino gamö nî, “Amën!”

20 “Cen myero òmak dhanö mörö na bino buto kî cii apap mërë, piën nwongo ën oketho lewic i kom apap mërë.”

Cë jö kibëc bino gamö nî, “Amën!”

21 “Cen myero òmak dhanö mörö na bino buto kî lee mörö këkën.”

Cë jö kibëc bino gamö nî, “Amën!”

22 “Cen myero òmak dhanö mörö na bino buto k'amîn mërë, onyo amîn mërë më babö onyo amîn mërë n'aya mërë önywölö k'ëcwö nökökë.”

Cë jö kibëc bino gamö nî, “Amën!”

23 “Cen myero òmak dhanö mörö na bino buto kî marö mërë.”

Cë jö kibëc bino gamö nî, “Amën!”

24 “Cen myero òmak dhanö mörö na bino neko awodhe i müng.”

Cë jö kibëc bino gamö nî “Amën!”

25 “Cen myero òmak dhanö mörö na bino gamö lîm më wilönë i müng ëk enek kî dhanö na ba öbalö.”

Cë jö kibëc bino gamö nî, “Amën!”

26 “Cen myero òmak dhanö mörö na ba bino moko ëka lübö köp kibëc na tye i cìk nî.”

Cě jö kibēc bino gamö nĩ, “Amën!”

28

Gum pĩ bedo kĩ wörö

¹ Ka ibino unu winyo köp ka Rwoth Obangawu ěka ilübö unu cík mērē kibēc na an tin atye ka miöwu, Rwoth Obangawu bino miöwu idökö na tēk na löö rok kibēc na tye i wi lobo.

² Gum ni kibēc bino bino i komwu na thwönē ka iwinyo unu köp ka Rwoth Obangawu:

³ Gum bino bedo i komwu i pacö ěka i pwothiwu.

⁴ Gum bino bedo i kom ěthĩnöwu, i kom gin na bino cěk i pwothiwu, ěka i kom ěthĩnö limwu na kwö—ěthĩnö dhokwu ěka ěthĩn rom kĩ dyegiwu.

⁵ Gum bino bedo i kom adītani ěka i kom gin mē nyöbö ogatini.

⁶ Ibino bedo unu kĩ gum i karē na un idönyö i öt ěka i karē na un idonyo yökö.

⁷ Rwoth bino miö ilöö unu langwu na bino mē lwēny i komwu. Gĩn bino mē lwēny i komwu kĩ i yoo acēl ěntö bino gĩnĩ ngwēc kĩ bothwu nakun pokere gĩnĩ i yodhi abĩrö.

⁸ Rwoth bino miö gum i kom derewu ěka i kom gin na kibēc na cĩngwu otio. Rwoth Obangawu bino miöwu gum i lobo na ěn tye ka miöwu.

⁹ Ka ibino unu gwökö cík ka Rwoth Obangawu kibēc nakun ilübö unu, Rwoth bino miöwu ibedo jögē na leng kite na ěn öcĩkērē kōdē kĩ kwong bothwu.

¹⁰ Cě jö kibēc mē wi lobo bino nēnö nĩ ecwodowu kĩ nyĩng Rwoth ěka bino gĩnĩ lworowu.

¹¹ Rwoth bino miöwu jami na pol—ëthñöwu, ëthñö limwu na kwö, ëka cem më pwothiwu bino cëk—i lobo na yam ën okwongo both kwerewu më miöwu.

¹² Rwoth bino yabö niwu polo na ën kanö lönyö mërë ië, më miö köth cwee i pwothiwu i karë mërë kikokome ëka më miö gum i kom tic kibëc na cingwu bino tio. Un ibino miö jami më adena both rok na pol ëntö ba ibino unu deno gin mörö ki both ngat mörö.

¹³ Rwoth bino miöwu bedo ëtëla, ëka pathi jö n'ëtölögi. Karë kibëc un ibino bedo anyim nakun ba ibedo unu angec ka iwinyo unu cìk ka Rwoth Obangawu kibëc na an tin aciköwu nakun igwökërë unu më lübö.

¹⁴ Kür ilökërë unu ökö ki i kom cìk na an tin amiöwu, yo cingwu kucem onyo kucam, onyo lübö obanga nökënë gini ëka wörögi.

*Adwogi më türö cìk
(Elebi 26:14-46)*

¹⁵ Ëntö ka un ba ibino winyo unu köp ka Rwoth Obangawu onyo igwökërë unu më lübö cìk mërë kibëc na an tin aciköwu, cë cene ni kibëc bino bino i komwu ëka maköwu:

¹⁶ Cen bino maköwu i peciwu ëka i pwothiwu.

¹⁷ Cen bino bedo i kom aditani ëka i kom gin më nyöbö ogatini.

¹⁸ Cen bino bedo i kom ëthñöwu ëka i kom gin na bino cëk i pwothiwu, i kom ëthñö limwu na kwö ëka i kom ëthñö rom ki dyegiwu.

¹⁹ Cen bino maköwu i karë na un idönyö i öt ëka i karë na un idonyo yökö.

²⁰ Rwoth bino oro cene ì komwu, wiwu bino rubere ëka ebino cokowu kî gero ì kom gin na kibëc na un ibino tio, naka ka ithum unu ökö. Ibino thum unu ökö piöpiö pî timwu na reco na un itimö piën iwëka unu ökö.

²¹ Rwoth bino pwodowu kî twoe na reco naka ka ën otyekowu ökö kî ì lobo na un itye ka dönyö ië më gamö më bedo mewu.

²² Rwoth bino pwodowu kî twoe na köbërë, kî lyetho ëka two akwoda, kî lyetho pîny ëka ceng bino ryëny. Cemwu bino ner ëka pur ökö. Pwod ni kibëc bino bino ì komwu naka ka ithöö unu.

²³ Polo na tye ì ka wiwu ba bino miö köth cwee, ëka ngöm na tye ì thë tyënwu bino bedo na tøk calö nywenyo.

²⁴ Rwoth bino lökö köth më lobowu dökö apua ëka luru; bino yaa kî ì polo öny pîny ì komwu naka tyekowu ökö kibëc.

²⁵ Rwoth bino miö langwu lööwu. Un ibino lwëny ì komgî kî ì yoo acël ëntö ibino unu ngwëc kî bothgî nakun ipokere unu ì yodhi abirö, ëka jö më lobo kibëc bino bedo ginî kî thwön lworö pî gin n'ötimërë ì komwu.

²⁶ Lyenewu bino bedo cem ka wîny kibëc na ngwëcö kî malö ëka më ka leeni më thim, ëka ngat mörö ope na bino ryëmögî ökö.

²⁷ Rwoth bino pwodowu kî two bür ginî më Ejip, bür na ba cang, gwönyü ëka ìl kom na ba ibino unu cang kî ië.

²⁸ Rwoth bino pwodowu kî poa, thöö wang ëka bango wiwu ökö.

²⁹ Ibino unu thwathwama kiceng calö athöö wang. Ba ibino bedo unu kî lönyö ì kom gin mörö

kèkèn na un ibino tìmò. Ebino diöwu ëka yakò jamiwu nìnò kì nìnò, èntò ngat mörö ope na bino kõnyöwu.

³⁰ In ibino cikiri kì dhakö më nyömö, èntò ngat nökënë ènè bino bedo ködè tètèk. In ibino gërö öt, èntò ba ibino bedo ië. In ibino pìdhö ölöc, èntò ba ibino camö nyige.

³¹ Ebino neko thwön pur na megì na in inènö, èntò ba ibino camö ringo mërè mörö. Ebino tero kanani tètèk kì bothi, èntò ba ebino dwongo. Ebino mïö romni both langni, èntò ngat mörö ope na bino kõnyöni më dwongogì.

³² Ebino mïö awope ëka anyirani both rok nökënë na in inènö ëka wangi bino dhero më nènögì nìnò kì nìnò, èntò ba ibino bedo kì tèkò më jükögì cìdhö ködgì.

³³ Rok na ba ingeo unu bino camö cem na un ipuro ì pwothiwu, ëka ebino diöwu pì karè kibèc èntò gin mörö ope na un ibino tìmò.

³⁴ Gin na wangwu bino nènö bino mïöwu idökö epoa.

³⁵ Rwoth bino pwodoni kì two më congì ëka tyeni kì бүр na rem rwök na ba bino cang, cakèrè kì ì tyeni piny naka ì wi malö.

³⁶ Rwoth bino ryëmöwu kanya acël kì rwoth na un ibino yërö më tëlöwu yo both rok na un onyo kwerewu ba ongeö. Ibino unu wörö obanga nökënë n'ëyübö kì yen ëka kidi.

³⁷ Ibino unu dökö gin na kelo lworö, gin më carolok ëka gin më anyëra ì kin rok kibèc na Rwoth bino kèthöwu ië.

³⁸ Ibino unu cwöönö kodhi na dwong ì pwothiwu, èntò ibino unu cökö na nönök, pïen

bonyo bino camö ökö.

³⁹ Ibino unu pìdhö ölökö ëka ibino unu yübögì na bër, ëntö ba ibino unu madhö köngö mërë onyo püdö nyige, piën kudi bino camögì ökö.

⁴⁰ Ibino unu bedo kî yen më jeituni ì lobowu, ëntö ba ibino unu tic kî möö mërë, piën nyige bino öny ökö.

⁴¹ Ibino unu nywölö awope ëka anyira, ëntö ba ibino unu gwökögì, piën ebino terogì ökö ì opii.

⁴² Bonyo bino camö yen ëka cem më lobowu ökö.

⁴³ Erok na bedo ì lobowu bino dökö gîni ëlönyö ëka jö na pîrgì tæk rwök, ëntö un ibino dökö ëcan ëka jö na pîrgì ba tæk.

⁴⁴ Gîn bino mïöwu den, ëntö un ba ibino mïö den bothgì. Gîn bino tëlö wiwu, ëntö un ibino dong cen ì körgì.

⁴⁵ Cene ni kîbëc bino podho ì komwu, bino ryëmö körwu cë maköwu naka ibino thum unu ökö kîbëc, piën ba iwinyo unu köp ka Rwoth Obangawu ëka ba ìmakö unu cìk mërë kîbëc na ën öcököwu.

⁴⁶ Gîn bino bedo anyuth ëka tango më aura bothwu ëka both ëkwaëwu naka naka.

⁴⁷ Piën un ba itio unu both Rwoth Obangawu kî yom cwiny ì karë n'onwongo itye unu kî jami na büp,

⁴⁸ pî manön ibino unu tic both langwu na Rwoth bino orogì ì komwu. Kec ëka örïö pii bino nekowu, ibino unu woth kotula ëka can jami kîbëc bino maköwu. Rwoth bino ketho ayokoth n'obedo nywenyo ì ngutwu naka ka otyekowu ökö kîbëc.

⁴⁹ Rwoth bino kelo rok mörö më lwëny ì komwu kî kanya bor, kî ì ajiki më lobo, calö jür na bino

píny, rok na ba ibino unu nĩang ì lëbgĩ.

⁵⁰ Rok na ger na ba bino parö pĩ jö n'otii ëka kica ba bino makögĩ ì kom jö na thĩnö.

⁵¹ Gĩn bino camö ëthĩnö lĩmwu na kwö ëka cem na bino cëk ì pwothiwu, naka ka etyekowu ökö. Gĩn ba bino wëkö niwu kal mörö, kõngö ölöc na nyen onyo möö jeituni, ëthĩnö dhok onyo ëthĩnö rom kĩ dyegi na mewu naka ka gĩn otyekowu ökö.

⁵² Gĩn bino gürö peciwu kībëc naka ka cëlwu n'ëgërö na bor rwök na un igeno örëdhërë píny. Gĩn bino gürö peci kībëc na tye ì lobo na Rwoth Obangawu tye ka mĩöwu.

⁵³ Pĩ can na langwu bino ketho ì komwu ì karë na gĩn bino gürö peciwu, un ibino camö ëthĩnöwu, ringo kom awope ëka anyira na Rwoth Obangawu ömĩöwu.

⁵⁴ Naka thon ëcwö na kite mërë bër rwök ëka n'obedo nyakica kĩ ì kinwu bino twono ömĩn mërë cem, onyo dhakö mërë na ën marö, onyo ëthĩnë na pod kwö.

⁵⁵ Ën ba bino nywakö ködgĩ ringo kom ëthĩnë na ën camö. Pĩën ën ope kĩ gĩn mörö n'odong nĩnë më acama ì karë më can na langwu bino gürö kĩ peciwu kībëc.

⁵⁶ Dhakö na kite mërë bër rwök ëka n'obedo nyakica, n'onwongo ba thamö më nyönö píny kĩ tyënë, wangë bino cido ì kom cwörë na ën marö, ëka wode onyo nyarë.

⁵⁷ Ën bino kanö byero na yaa kĩ ië ëka athĩn na ën önywölö, ëk ëcam ën kënë ì müng ì karë na lang bino güröwu ëka can na rac na langwu bino ketho ì komwu ì peciwu.

⁵⁸ Ka ba igwökërë unu më lübö köp kībëc më cìk

ni, n'ècöögi ì buk ni, ëka ka ba ibedo unu kî lworo ì nyĩng mē dheo na pīrē tēk na ēnē nyĩng Rwoth Obangawu,

⁵⁹ cē Rwoth bino mēdō pwod ì komwu ëka ì kom ëkwaēwu, can na rac rwōk ëka odeke na ba cang gīnī.

⁶⁰ Ēn bino mīō two kibēc mē Ejip na yam un ilworo rwōk mē makōwu, ëka ba ibino unu cang.

⁶¹ Rwoth thon bino mīōwu koth twoe kibēc ëka can na ba ècöö ì buk mē cík ni, naka ka etyekowu ökō.

⁶² Kadī onwongo ipol unu calō cēr na tye malō ì wi polo, welwu bino dōkō na nōnōk rwōk, pīēn ba iwinyo unu kōp ka Rwoth Obangawu.

⁶³ Dong kite na calō Rwoth cwinye obedo na yom mē mīōwu bedo na bēr ëka mē mīō welwu nya na pol, kōmanōn thon Rwoth cwinye bino bedo na yom mē balō ëka tyekowu. Ebino kwanyōwu ökō kī ì lobo na un itye ka dōnyō iē mē gamō bedo mewu.

⁶⁴ Cē Rwoth bino kēthōwu ökō ì kin rok kibēc, cakērē kī ì ajiki lobo kucēl naka tung ca. Kī kunōn un ibino wōrō obanga nōkēnē gīnī—obanga n'ēyübō kī yen ëka kidi, na un onyo kwerewu ba ongeō.

⁶⁵ Kī ì kin rok nōn gīnī, ba ibino unu nwongo kuc onyo karē mē mīō tyēnwu yweo. Kī kunōn Rwoth bino mīō cwinywu podho, ba ibino bedo unu kī gen ëka tipo komwu bino thōō ökō.

⁶⁶ Cwinywu bino ngabērē angaba pī kwōwu mē anyim. Lworo bino makōwu kiwor ëka kiceng abonge gen mōrō pī kwōwu.

⁶⁷ Kodiko ibino unu kobo nī, “Kono onwongo obed kothyeno!” Ēka kothyeno ibino unu kobo

nĩ, “Kono onwongo obed kodiko!”—piën pĩ lworo na bino pong ì cwinywu òka gin na wangwu bino nènò.

⁶⁸ Cè Rwoth bino dwököwu yo Ejip kĩ mel gĩnĩ, ì yoo na an abino akobo niwu nĩ ba dōkĩ ibino nènò unu. Kĩ kunön, un ibino mĩrè kenwu both langwu mē acadha calō opii n'obedo cwō òka mon, èntō ngat mörö ope na bino wilöwu.

29

Rwoth öcìkèrè kĩ jö Icarael ì lobo mē Moab

¹ Man ènè köp mē cìkèrè na Rwoth öcìkō Muca mē ketho kĩ jö Icarael ì lobo mē Moab, mēd ì kom cìkèrè na èn onwongo oketho ködgi kĩ ì Koreb.

² Muca ocwodo jö Icarael kībēc kanya acēl òka okobo bothgi:

Un inènò kĩ wangwu gin na Rwoth ötimö ì Ejip ì kom Parao, ì kom edite mērè kībēc òka ì kom lobo mērè.

³ Un inènò kĩ wangwu atēmatēma na dito gĩnĩ, anyuth mē tango nön òka gin mē aura gĩnĩ.

⁴ Èntō naka ì nñö na tin ni Rwoth ba ömïöwu thama mē nñang onyo wang mē neno onyo ith na winyo pñy.

⁵ An atëlöwu kĩ ì thim pĩ mwaka pyer angwën. Böngwu ba obino otii, onyo wociwu ba obino othum ökö kĩ ì tyēnwu.

⁶ Un ba ibino ìcamö unu ogati onyo madhö köngö ölök onyo köngö mörö na kēc. An abino atimö kömanön èk inge unu nĩ an abedo Rwoth Oban-gawu.

⁷ Ì karè na un ithuno ì kabedo ni, Cikon rwoth mē Kecbon ëka Og rwoth mē Bacan obino gīnī mē lwēny ì kom onu, èntō onu èlöögī ökō.

⁸ Onu ebino ègamō lobogī ëka èmīō both jō Reuben, Jō Gad ëka nucu kaka ka Manace na calō lobo na mēgī.

⁹ Pī manön, gwökērē unu mē lübō köp mē cīkērē ni, èk gin na kibēc na un ibino tīmō owoth na bër.

¹⁰ Un kibēc icung unu tin ì nyim Rwoth Obangawu—ètèlawu ëka rwodhiwu, edongwu ëka editewu, ëka jō nökēnē kibēc mē Icarael,

¹¹ kanya acël k'èthīnōwu ëka monwu, ëka Erok na bedo gīnī ì kinwu, na ngölō yen ëka na twömō pii niwu.

¹² Un icung kany mē dönyō ì cīkērē kī Rwoth Obangawu, cīkērē na Rwoth tin moko kodwu ëka moko kī kwong,

¹³ mē moko tin nī un ibedo jögē, èk ebed Obangawu kite na èn öcīkōwu ëka kite na èn okwongo both kwarōwu Abraam, Icaka ëka Jakob.

¹⁴ An atye ka ketho cīkērē ni kī kwong mērē, pathī kī un kēkēn

¹⁵ na tin icung unu kany ì nyim Rwoth Obanga onu, èntō thon kī jō na tin ope gīnī kany.

¹⁶ Un kikomwu ingeo unu kite na onu èkwō ködē ì Ejip ëka kite na onu ewok ködē ì rok na papath mē bino yo kany.

¹⁷ Un inēnō unu kī ì kin-gī calgī mē kwer, cal jwogi n'ëyübō kī yath ëka kī kidi, kī ryal ëka kī gol.

¹⁸ Gwökērē unu èk kür ècwō onyo dhakō onyo kaka mörō na tin tye ì kinwu na cwinye bino lökērē ökō kī both Rwoth Obanga onu mē cīdhō wörō

obanga ka rok nön gīnī; man twērö bedo calö orii na döngö mē bedo kwir na kēc.

¹⁹ Ka koth dhanö nön owinyo köp mē kwong ni, ěn bino lamö gum i kome kēnē ěka bino thamö ni, “An abino bedo kī kuc, kadī gin mörö na rac ba bino tīmērē i koma, kadī bed cwinya nwang mē lübö yora kēna.” Man bino kelo pwod i komwu kibēc, jö na bēcö ěka jö na reco.

²⁰ Rwoth ba bino tīmö kīca both dhanö nön; akēmö ěka nyeko mērē bino wangö dhanö nön calö mac na lyël. Cene kibēc n'ęcöö i buk ni bino makö ěn, ěka Rwoth bino jwaö nyīngē ökö kī i thē polo.

²¹ Rwoth bino poko dhanö nön ökö kī i kin kaka mē Icarael ěka bino ketho can i kome, na lübērē kī cene kibēc mē cīkērē n'ęcöö i Buk mē Cìk ni.

²² Ěkwaėwu na bino lübö körwu ěka Erok na bino kī kanya bor bino nēnö can n'opodho i kom lobo ěka twoe na Rwoth ömīö ömakö lobo nön.

²³ Lobo nön kibēc bino wang ökö kī mac calpa ěka kadö—na gin mörö ope n'ėpīdhö iē, gin mörö ope na tuu kī iē, gin mörö ope na döngö kī iē. Bino bedo calö Codom ěka Gomora, Adma ěka Jeboim na Rwoth yam öbalö rwök i karē n'akēmö ömakö.

²⁴ Rok kibēc bino penyo ni, “Pīngö Rwoth ötimö gin ni i lobo ni? Pīngö akēmö ömakö ěn rwök?”

²⁵ Ěka agam mērē bino bedo ni, “Gin n'ömīö ötimö ni kōmanön, piēn jö ni öwēkö gīnī cīkērē ka Rwoth, Obanga ka kweregī, cīkērē na ěn oketho ködgi i karē na ěn okelogi kī i Ejip.

²⁶ Gīn ölökerē ökö ěka öwörö gīnī obanga nökenē gīnī nakun ryebere gīnī pīny i nyimgī, obanga na gīn ba ngeo, obanga na ěn ba ömīögi.

²⁷ Pí manön akēmō ka Rwoth ömakō lobo ni, ëka ooro ië alem kibëc n'ëcöō i buk ni.

²⁸ Rwoth obino ökwanyögi ökö k'akēmō ëka kī thwön cwer cwiny na dit kī i lobogi ëka öryëmögi i lobo nökenë kite na tye ködë tin."

²⁹ Gin më müng obedo më ka Rwoth Obangawa, ëntö gin na nen obedo më onu ëka kī më ëthnō onu na twal, ëk onu ëlüb köp kibëc më cík ni.

30

Ngut ëka timö kica

¹ Ka gum ni ëka cene ni kibëc na an aketho i nyimwu opodho i komwu, ëka ipo unu ië kī kanya Rwoth Obangawu ökëthöwu ië i kin rok na papath,

² ëka ka idwogo unu both Rwoth Obangawu k'ëkwaëwu cë ibedo unu kī winy i köp mërë kī cwinywu kibëc ëka kī tipowu kibëc na lübërë kī köp kibëc na an tin aciköwu ködë,

³ cë Rwoth Obangawu bino bedo kī kica i komwu ëka bino cököwu dökī kī i kin rok kibëc na ën yam ökëthöwu ië cë dwongo gum bothwu.

⁴ Kono kadī bed eterowu i lobo na bor rwök, kī kunön Rwoth Obangawu bino cököwu kanya acël ëka dwongowu cen.

⁵ Ën bino kelowu i lobo n'obedo më ka kwerewu ëka un ibino gamö më bedo mewu. Ën bino müöwu jami na pol ëka ibino unu nya na pol na kadhö kwerewu ökö.

⁶ Rwoth Obangawu bino lökö cwinywu ëka cwiny ëkwaëwu ëk imar unu ën kī cwinywu kibëc ëka kī tipowu kibëc ëk ibed unu na kwö.

⁷ Rwoth Obangawu bino ketho pwod ni kibëc i kom langwu na dagwu ëka yelowu.

⁸ Un ibino winyo köp ka Rwoth dökí ëka ìlúbö unu cík mërë kibëc na an tin amïöwu.

⁹ Cë Rwoth Obangawu bino miöwu jami na pol rwök ì tic kibëc na un ibino timö kî cingwu, ì kom ëthinöwu, ì kom ëthinö limwu na kwö ëka ì kom cem na bino cëk ì pwothiwu. Rwoth ië bino bedo na yom dökí më miö jami nya bothwu, kite na ië obedo na yom ì kom kwerewu,

¹⁰ ëntö ibino unu winyo köp ëka cík ka Rwoth Obanga onu n'ëcöö ì buk ni më cík ëka ìlökërë unu both Rwoth Obangawu kî cwinywu kibëc ëka kî tipowu kibëc.

Yëro kwö onyo thöo

¹¹ Kobedini cík na tin an aciköwu ködë ba tæk rwök ëka ba tye kanya bor kî bothwu.

¹² Ba tye naka yo polo, ëk ömïi ipeny unu nî, “Nga na bino idhö malö ì polo më ömö ëka titö nîwa, ëk ewiny cë dong ëlubi?”

¹³ Onyo ba tye naka yo löka nam tung ca, ëk ömïi ipeny unu nî, “Nga na bino ngölö nam më ömö ëka titö nîwa ëk ewiny cë dong ëlubi?”

¹⁴ Pe, köp nön tye na cwök bothwu; tye ì dhöwu ëka ì cwinywu na miö itwëro unu lübö.

¹⁵ Nën, an tin aketho ì nyimwu gin na bër ëka gin na rac, kwö ëka thöo.

¹⁶ Ka ibino unu lübö cík ka Rwoth Obangawu kibëc na an tin aciköwu, nakun nwongo imarö unu ën ëka igwökö unu cík mërë kibëc, ibino unu kwö ëka welwu bino mëdërë, cë Rwoth Obangawu bino miöwu gum ì lobo na un ibino dönyö ië më gamö bedo mewu.

¹⁷ Ëntö ka cwinywu ölokërë ökö ëka ba ibedo unu kî winy, nakun ilökërë unu both obanga nökënë gîni ëka iryebere unu pîny më wörögî,

¹⁸ an tin akobo kanyalër bothwu nî ebino tyekowu ökö. Ba ibino unu bedo pî karë na lac î lobo na un ibino ngölö kulo kulo Jordan më dönyö ië ëka gamö bedo mewu.

¹⁹ An tin acwodo polo ëka lobo më bedo caden î komwu nî an aketho î nyimwu kwö ëka thöö, gum ëka cen. Dong kobedini yër unu kwö ëk un ëka ëthînowu ibed unu na kwö.

²⁰ An thon akobo niwu nî îmar unu Rwoth Obangawu, iwiny unu köp mërë ëka imok unu î kome. Pîen Rwoth ënë mîöwu kwö, ëka ën bino mîö ibedo unu na kwö pî mwaka na pol î lobo na ën okwongere më mîö both kwaröwu Abraam, Icaka ëka Jakob.

31

Yocua oleo ka tyën Muca

¹ Cë Muca ömëdërë kî twakö köp ni both jö Icarael kibëc nî:

² “An kobedini dong atye kî mwaka 120 ëka ba dök atwërö tölöwu. Rwoth okobo botha nî, ‘In ba ibino poth yo löka kulo Jordan.’

³ Rwoth Obangawu kikokome ënë bino cîdhö anyim niwu yo löka ca. Ën bino tyeko rok ni kibëc na tye î nyimwu, ëka un ibino gamö lobogî më bedo mewu. Yocua thon bino cîdhö anyim niwu yo löka ca, kite na Rwoth okobo ködë.

⁴ Ëka Rwoth bino tîmö bothgî gin na ën obino ötîmö both Cikon ëka Og, n'obedo gîni rwodhi ka jö Amor, na ën obino otyeko kanya acël kî lobogî.

⁵ Rwoth bino miögi bothwu, ëka un myero itim unu bothgi gin na kibëc na an aciköwu.

⁶ Bed unu jö na tæk ëka jö na cwinygi tæk. Kür ibed unu ki lworö mörö, onyo kür imi komwu ömyël i nyimgi, piën Rwoth Obangawu bino woth kanya acël kodwu; ën ba bino wëköwu onyo kwëröwu.”

⁷ Cë Muca ocwodo Yocua ëka okobo bothe i nyim jö Icarael kibëc ni, “Bed ngat na tæk ëka na cwinye tæk, piën myero icidh ki lwak ni i lobo na Rwoth okwongo më miö both kweregï, ëka myero ipok i kin-gi ëk ögam gini ödök na calö mëgi.

⁸ Rwoth kikokome bino cidhö i nyimwu ëka bino bedo kanya acël kodwu, ën ba bino wëköwu onyo kwëröwu. Kür ibed unu ki lworö, kür cwinywu opodhi.”

Kwanö Cìk

⁹ Cë Muca öcöö cik ni gini piny cë ömiö both ëlamdhök n'obedo Elebi, n'otingo gini canduk më cikëre ka Rwoth, ëka both edong kibëc më Icarael.

¹⁰ Cë Muca öcikögi ni: “Kinge thum ka mwaka abirö abirö, i mwaka më jalö banya, i karë më kwero Karama më Bölö,

¹¹ ka jö Icarael kibëc bino cökëre gini i nyim Rwoth Obangani i kabedo na ën bino yërö, in ibino kwanö cik ni kibëc bothgi na gin tye ka winyo.

¹² Gür unu lwak kanya acël—cwö, mon ëka ëthinö, ëka erok na bedo gini i peciwu—ëk owiny gini ëka opwonyere gini kite më lworö Rwoth Obangawu ëka ögwökëre gini më lübö köp më cik ni kibëc.

¹³ Ethinögi, na ba ngeo gini cik ni, myero owiny ëka opwonyere gini më lworö Rwoth Obangawu i

karë kibëc na un itye ka kwö i lobo na un icidhö ngölö yo löka kulo Jordan më bedo mewu.”

Cìk ka Rwoth më ajiki both Muca

¹⁴ Rwoth okobo both Muca nĩ, “Nĩnõni më thõõ dong cwök. Cwod Yocua ëk ibed unu kanya acël ködë i Këma më Rwatërë, ëk an acik ën.” Cë Muca ëka Yocua öcìdhö gĩnĩ yo Këma më Rwatërë.

¹⁵ Cë Rwoth onen i Këma na cal kĩ wĩr më pöl, ëka wĩr më pöl ocung malö ka wi dholokek më dönyö i Këma.

¹⁶ Cë Rwoth okobo both Muca nĩ: “In ibino cìdhö më yweo kanya acël kĩ kwereni, ëka jö ni bino cakö wörö obanga nökënë gĩnĩ, obanga nökënë gĩnĩ më lobo na gĩn tye ka cìdhö yo ië. Gĩn bino wëköna ökö ëka bino türö gĩnĩ cìkërë na an aketho ködgĩ.

¹⁷ Cë i nĩnõ nön akëmö bino maköna i komgĩ ëka abino wëkögĩ ökö; an abino kanö wanga ökö kĩ bothgĩ, ëka ebino tyekogĩ ökö. Can na pol ëka pëkö bino podho i komgĩ, ëka i nĩnõ nön gĩn bino penyo nĩ, ‘Can ni ba obino i komwa piën Obanga onu ba tye kod onu?’

¹⁸ Ëntö an abino kanö wanga ökö i nĩnõ nön piën pĩ balgĩ kibëc më lökërë ökö both obanga nökënë gĩnĩ.

¹⁹ “Kobedini dong cöo wer ni pĩny ëka ipwony kĩ jö Icarael cë imüigĩ ower, ëk obed caden-na i komgĩ.

²⁰ Ka an dong akelogĩ i lobo na mio na cak ëka möö kic möl kĩ ië, lobo na an acikara kĩ kwong both kweregĩ, ëka ka gĩn öcamö cem oyeng cë öcwëë gĩnĩ, gĩn bino lökërë both obanga nökënë gĩnĩ ëka wörögĩ, nakun kwëra gĩnĩ ökö ëka türö cìkërëna.

²¹ Cë ka can na pol ëka pëkö obino i komgĩ, wer ni bino bedo caden bothgĩ, piën ëkwaëgĩ wigĩ ba bino

wil ië. An angeo yüb më thamagi na gîn öyübö, kadî i karë na an bara akelogî i lobo na an acîkara kî kwong më miögi.”

²² Cë Muca öcöö wer ni pîny i nînö nön ëka opwonyo kî jö Icarael.

²³ Rwoth ömiö cîk ni both Yocua wod ka Nun: “Bed ngat na tæk ëka na cwinye tæk, piën in kikomi ënë ibino tero jö Icarael i lobo na an acîkara kî kwong më miögi, ëka an kikoma abino bedo kodi.”

²⁴ Kinge na Muca otyeko cöö köp më cîk ni i buk, cakërë kî i acaki naka i ajiki,

²⁵ ën ömiö cîk ni both Elebi n'otingo Canduk më Cîkërë ka Rwoth:

²⁶ “Ter unu Buk më Cîk ni ëka iketh unu i nget canduk më cîkërë ka Rwoth Obangawu. Bino bedo kunön na calö caden i komwu.

²⁷ Piën an angeo kite na un ibedo unu jö na jëm ëka jö na ngutgi nwang. Ka un ibedo ka jëm i kom Rwoth na an pod atye na kwö kany acël kodwu, cë jëmwu bino bedo na röm kwene ka an dong athöö ökö!

²⁸ Gür unu edong më kakawu ëka editewu kibëc i nyima, ëk akob köp ni bothgi na gîn tye ka winyo ëka acwod polo kî lobo më bedo caden i komgi.

²⁹ Piën an angeo nî kinge thööna un ibino timö gin na rac ëka ibino unu lökërë ökö kî i yoo na an aciköwu ködë. I karë më anyim, can bino podho i komwu piën ibino unu timö gin na rac i wang Rwoth nakun imiö unu akëmö makö ën kî gin na cingwu otio.”

Wer ka Muca

³⁰ Cē Muca öcakö wero köp mē wer ni kī wie na
gīn tye ka winyo cakērē kī ī acaki naka ī ajiki mērē
ī nyim lwak mē Icarael n'ögürē gīnī:

32

- ¹ Cík unu ithwu, un polo ěka lobo,
winy unu na bēr köp na an abino kobo.
- ² Wēk pwonyna ööny ī komwu calö köth,
ěka köpna bino tōn calö thoi,
calö köth na ngidho ī kom lum na nyen,
calö köth na dwong ī kom lum na mar.
- ³ An abino pakö nyīng Rwoth,
ěka jögē bino kobo pī dit mērē!
- ⁴ Ěn obedo Lēla, na bal mörö ope ī tic mērē,
ěka ī yodhi mērē kibēc ěn ngölö köp n'atīr.
Ěn obedo Obanga na genere na ba tīmö gin mörö
na rac,
kite tye atīr ěka ba lengere.
- ⁵ Gīn ötīmö bal ī kome;
ěka gīn ba dök obedo ěthīnō mērē,
ěntō obedo gīnī rok n'ölökērē ěka n'ogom ökö.
- ⁶ Man ěnē kite na un ěcülö kī Rwoth,
un jö na mīng ěka n'ope kī ryökö?
Pathī ěn ěnē Apapwu
n'ocweowu ěka ömīöwu itye na kwö?
- ⁷ Po ī kom karē na cōn;
tham pī run n'opoth gīnī.
Peny apapni, cē ěn bino kobo nini.
Peny unu edongwu, ěka gīn bino nīangöwu.
- ⁸ Ī karē na ěn na Malö Rwök ömīö both rok lobo
n'obedo mēgī,

ï karë na ën opoko jö kibëc,
 ën oketho wang lobo ka rok acëlacël
 na lübërë kî wel awope ka jö Icarael.

⁹ Jö Icarael obedo gîni jö ka Rwoth,
 ëntö ën öyërö ëkwaë ka Jakob obedo mëgë.

¹⁰ Rwoth obino onwongo jö Icarael i thim,
 i lobo na lik na dhanö ope ië,
 ögürögî ëka ögwökögî na bër;
 ögwökögî na calö tōng wangë.

¹¹ Ën cal kî jür na pwonyo ëthinë kî ngwëc malö
 ëka tēngö bwome i wi ëthinë,
 na yarö bwome më tingogî
 ëka tingogî i bwome.

¹² Rwoth kënë ënë ötëlögî;
 obanga mörö onwongo ope bothgî.

¹³ Ën ömïögî öïdhö malö i lobo n'otingere malö,
 ëka öpïdhögî kî cem n'öcëk i pwothi.

Ën ömïögî möö kic kî i lëla,
 ëka kî möö jeituni kî i lobo n'otingere malö,
¹⁴ kî cak na wac më dhok ëka kî cak ka rom ëka
 dyegi

ëka kî dwolo ëthïnö rom ëka dyegi,
 k'ëthïnö rom ka Bacan n'ëyërö,
 ëka kî mökö ngano na pwöth.
 Un imadhö köngö ölöc na bër.

¹⁵ Jecurun* ödöngö n'öcwëë ëka öjëm;
 ka icemo iyeng unu, ibino bedo unu na pëc ëka
 na komwu pwöth.

* **32:15 Jecurun** gönyö nî ngat n'atîr, manön ënë, Icarael.

un iwëkö Obanga n'ocweowu

ëka ikwërö unu Lëla n'obedo alarwu.

16 Gìn ömïö nyeko ömakö Obanga pï wörö obangagï
ëka ömïö akëmö ömakö ën ì kom cal jwogigï më
kwer.

17 Gìn ömïö tyërgï both jwogi na ba obedo Obanga—
obanga na gìn onwongo ba ngeo,
obanga na pod onen na nyen,
obanga na kwerewu ba öwörögï.

18 Un ikwërö Lëla, n'ögwököwu;
wiwu owil ökö ì kom Obanga n'önywölöwu.

19 Ëntö Rwoth önënö man cë ökwërögï ökö
piën awope ëka anyira mërë ömïö akëmö
ömakö ën.

20 Ëka okobo nï, “An abino kanö wanga ökö kï
bothgï,
ëka anën kite na nyimgï bino bedo ködë;
piën gìn obedo rok n'ogom,
ëthïnö na ba genere.

21 Gìn ömïö nyeko ömaka ì kom gìn na ba obedo
Obanga
ëka ömïö akëmö ömaka kï cal jwogigï na köny
mërë ope.

An abino miö nyeko makögï ì kom jö na ba obedo
rok kikokome;
an abino miö akëmö makögï ì kom rok na ba
nïang gïñ.

22 Piën akëmöna dong omoko mac ökö,
ëka tye ka wang naka ì thë bur lyël na thut.

Bino wangö lobo kï gìn n'öcëk ië
ëka bino cwïnyü mac ì acaki thë kite.

- 23 “Abino dhuro can ì wigi
 ëka abino celo athëröna kibëc ì komgi.
- 24 An abino miö kec diögi,
 two odeke na reco bino tyekogi;
 an abino oro leeni na ger më thim ì komgi,
 ëka thwone na tye ki kwir më tongogi.
- 25 Pala abadë bino tyekogi ökö ki ì yodhi,
 lworö bino bedo ì pecigi.
 Awope na thünö ëka anyira na thünö bino thum ökö,
 ëthünö na döth ëka jö na wigi opong lwar.
- 26 An akobo ni an abino këthögi
 ëka an abino miö nyïng-gi rwenyo ökö ki kin jii.
- 27 Ëntö an ba amiö lang-gi,
 më bedo k'awaka,
 ëka okob gini ni, ‘Tëköwa dwong;
 Rwoth ba ötimö gin mörö.’ ”
- 28 Jö më Icarael obedo gini rok na ba ryëk,
 niang mörö ope bothgi.
- 29 Ka onwongo gin ryëk, ëka öniang gini ì köp ni,
 ëka onge gini gin na bino timëre ì komgi!
- 30 Pingö dhanö acël öryëmö jö elip,
 onyo jö ariö twërö ryëmö jö elip apar?
 Rwoth, Kidigi ökwërogï ökö;
 Obangagi më aura öwëkögi ökö.
- 31 Piën lëlagi ba cal ki Lëla onu.
 na calö lang onu thon twërö yeo ni kömanön.
- 32 Jang ölökgi ekelo ki ì jang ölökö ka jö Codom,
 ëka ki ì pwothi ka jö Gomora.
 Ölökgi opong ki kwir,
 ëka öbüng nyig-gi këc.
- 33 Köngö ölökgi cal ki kwir ka thwol,

cal kī kwir k'ororo na kelo thöö.

34 Rwoth okobo nī, “Manön kībēc ba obedo gin na
an akanö botha

ëka amwönö ökö kanya an akanö līmna ië?

35 Obedo ticna më cülö kwor; an abino cülö.

İ karë na tyën-gī bino cër;

nīnögī më can dong cwök,

ëka bino podho ī komgī athura.”

36 Rwoth bino ngölö köp ī kom jögë

ëka kīca bino makö ën ī kom etic mërë,

ka ën önënö tēkögī dong othum

ëka dhanö mörö ba odong, opii onyo ngat na
lööre kënë.

37 Cë Rwoth bino kobo nī, “Obangagī tye gīnī
kwene,

lëla na gīn obino opono ië,

38 obanga n'obino öcamö möö tyër awangagī

ëka ömadhö gīnī kōngö ölöc më tyër amadhagī?

Ëk gīn öya malö më kōnyöwu!

Ëk gīn obed jö na gwököwu!”

39 Rwoth okobo nī, “Nën dong kobedini an ëka an
këna ënë abedo Obanga;

obanga nökenë ope ī ngeta.

An ënë aneko ëka an ënë amiö kwö,

An ënë awanö ëka an ënë acangö,

ëka ngat mörö ope na twërö larö kī ī cīnga.

40 Atingo cīnga malö yo polo ëka akobo nī:

Na calö an Obanga na bedo na twal,

41 ka apakö pala abadëna na mīmīla

ëka k'aryëö cīnga më ngölö köp

cë an abino cülö kwor ī kom langna

ëka abino ketho can ì kom jö na daga gĩnĩ.

⁴² An abino miö athëröna mër kĩ remo,
nakun pala abadëna bino camö ringo:
bino yeng kĩ remo ka jö n'enekogĩ kĩ jö n'ëmakögĩ,
ëka bino tongo wi ëtëla ka lang-gĩ."

⁴³ Pak unu jögë, un rok kibëc,
piën ën bino cülö kwor më remo k'etic mërë;
ën bino cülö kwor ì kom lang mërë
ëka bino kwanyö bal ökö kĩ ì lobo ka jögë.

⁴⁴ Muca obino gĩn kĩ Yocua wod ka Nun ëka
ötwakö köp më wer ni kibëc na jĩi tye ka winyo.

⁴⁵ Ì karë na Muca owero köp ni kibëc kĩ wie both
jö Icarael,

⁴⁶ ën okobo bothgĩ nĩ, "Gwök unu köp ni kibëc ì
cwinylwu na tin an atye ka kobo bothwu, ëk ìcìk
unu k'ëthĩnöwu më lübö köp më cìk ni kibëc na bër.

⁴⁷ Köp ni ba obedo köp na körë ope niwu—gĩn
obedo kwöwu. Gwök unu cìk ni cë ibino bedo unu
pĩ karë na lac ì lobo na un ì tye ka cìdhö më ngölö
kulo Jordan më gamö bedo mewu."

Thöö ka Muca ì wi kidi më Nebo

⁴⁸ Ì nĩnö nön kikokome Rwoth okobo both Muca
nĩ,

⁴⁹ "Cìdh ëk iìdh malö ì wi kite më Abarim, na tye
ì lobo Moab; iìdh ì wi kidi më Nebo n'opimere kĩ
Jeriko ëka inën lobo Kanaan na an acwök miö both
jö Icarael.

⁵⁰ In ibino thöö ì wi kidi nön na in iìdhö cë ibino
cìdhö nywakö kabedo kĩ kwereni kite n'omeru
Aron öthöö ködë ì wi kidi më Kor cë önywakö
kabedo kĩ kwere mërë.

51 Pìen un kībēc ba ibino ibedo unu kī gen ī koma ī nyim jō Icarael ī dhō pii mē Meriba Kadec ī thim mē Jin, un īkwērō wōrōna ī nyim jō Icarael na calō Obanga na leng.

52 Pī manōn, in ibino nēnō lobo nōn kī kanya bor; in ba ibino dōnyō ī lobo na an abino mīō both jō Icarael.”

33

Muca ölamö gum ī kom jō Icarael

1 Man ēnē gum na Muca dhanō k'Obanga ölamö ī kom jō Icarael na ēn bara öthöö.

2 Ēn okobo nī,
 “Rwoth obino öya kī wi kidi Cinai
 cē onen bothgī ī Ceir,
 ēn öryēny ī komgī kī ī wi kidi Paran.
 Ēn obino kī jögē na leng elip kī elip
 kī lēb mac na lyēl kī ī cingē mē kucem.

3 Adyer in kikomi ēnē ĩmarō jīī;
 jō na leng kībēc tye gīnī ī cingi.
 Gīn kībēc ryeberē pīny ī ka tyeni,
 ēka nwongo gīnī pwony kī bothi,

4 cīk na Muca ömīō bothwa,
 mē bedo mē ka jō ka Jakob.

5 Ēn obino obedo rwoth ī Jecurun
 ī karē n'edite ka lwak öcökērē gīnī,
 kanya acēl kī kaka kībēc mē Icarael.

6 “Ēk Reuben obed na kwō ēka kūr öthöö,
 jögē thon kūr obed na nōnök.”

7 Ēka man ēnē gin na ēn okobo ī kom Yuda:
 “Aa Rwoth, winy koko ka Yuda;

- dwongi èn pacö both jögë.
 Èn bino lwëny pîrë kënë kî cîngë.
 Bed ngat na kõnyö èn ì kom lang mërë!”
- ⁸ Èka ì kom Lebi èn okobo nî:
 “Mîi both Lebi Tumim ëka Urim* na megì
 both aticni na in igeno.
 In itëmö èn kî ì Maca;
 in ibino itëmö nî gîn tye adyer kî ì dhö pii më
 Meriba.
- ⁹ Lebi okobo ì kom apap ëka aya mërë nî,
 ‘An ba aparö pîrgî.’
 Èn wie ba opo ì kom utmego mërë
 onyo më ngeo èthînö mërë kikokome,
 èntö èn ögwökö köp na megì
 ëka ölübö cîkërëni.
- ¹⁰ Gîn bino pwonyo Jakob kî cîkni
 ëka cîkni both jö Icarael.
 Èn bino wangö odok na kur ì nyimi
 ëka tyër awanga kîbëc ì wi keno tyërni.
- ¹¹ Aa Rwoth, mîi gum ì kom dîrû mërë kîbëc,
 ëka ibed kî yom cwiny ì kom gin na èn otio kî
 cîngë.
 Göö lang na yaa më lwëny ì kome pîny,
 göö lang mërë pîny ëk kür dökî ölwëny gîni ì
 kome.”
- ¹² Èka ì kom Benjamin èn okobo nî:
 “Èk dhanö na Rwoth marö obed kî kuc ì kome,
 pîen Rwoth gwökö èn ì karë kîbëc,
 ëka ngat na Rwoth marö yweo ì kin wi baë.”
- ¹³ Ì kom Yocepu èn okobo nî:

* **33:8 Tumim ëka Urim** jami arîö ni èlamdhök ènë onwongo tio
 ködë më moko miti k'Obanga; ba ngere kite n'onwongo etio ködë.

- “Rwoth myero òmĩĩ gum ì lobo mërë
kĩ mĩc mē thoi na bēcō na yaa kĩ malō ì polo,
ëka kĩ pii na thuth na tye pĩny ì thē lobo,
14 kĩ nyig yen na bēcō na nyak kĩ ceng,
ëka kĩ cem na cěk dwe kĩ dwe,
15 kĩ nyig kodhi na bēcō na cěk ì wi kite na cōn
ëka kĩ jami na cěk na bũp ì wi cere na bedo
naka naka;
16 kĩ mĩc na bēcō mē ngöm ëka kĩ gin na kibēc na cěk
ì iē,
ëka kĩa ka ngat n'onen kĩ ì bunga na lyēl mac.
Ėk gum ni kibēc obed ì wi Yocepu,
ëka ì wi ngat n'epoko ökö kĩ ì kin utmego mërë.
17 Ĩ dit mërë kĩ dheo mërë ěn obedo calō wod thwōn
n'obedo kaō;
tunge cal gĩnĩ kĩ tung thwōn na ger.
Kĩ tunge gĩnĩ ěn bino twomo kĩ rok gĩnĩ,
naka jō na tye ì thwok lobo kibēc.
Man ěnē gumna pĩ jō Epraim na pol,
ëka kĩ jō ka Manace na rōmō elip kĩ elip.”
18 Ĩ kom Jabulon ěn okobo nĩ:
“Cwinyi obed na yom, Jabulon, ka idōnyō yökō,
ëka in, Icakar, ka ibedo ì kēmani.
19 Gĩn bino cwodo jō kibēc mē cidhō yo wi kidi
ëka kĩ kunōn gĩn bino miō tyērgĩ mē kite atĩr,
gĩn bino nwongo lōnyōgĩ kĩ ì nam,
kĩ ì kom lōnyō n'ėkanō ì kwo.”
20 Ĩ kom Gad ěn okobo nĩ:
“Gum obed ì kom dhanō n'ōmĩō wang lobo ka Gad
obedo na lac!
Gad buto kunōn calō kibwor,
mē yēcō bad lee onyo wie.
21 Ėn öyērō lobo mërë na bër,

pïen nget lobo k'etëla onwongo ëkanö pirë.
İ karë n'edite wi lwak öcökërë gîni,
ën otio gin na Rwoth mütö na tye atir,
ëka kî ngölö-köp mërë i kom jö Icarael.”

22 İ kom Dan ën okobo ni:
“Dan cal k'athin kibwor,
na kîrë kî i Bacan.”

23 İ kom Naputali ën okobo ni:
“Naputali, in ipong kî kîca ka Rwoth,
ëka ipong kî gum ka Rwoth;
gam lobo më kuthö ëka kukwap.”

24 İ kom Acer ën okobo ni:
“Ëk gum obed i kom Acer na löö kaka nökenë,
ëk cwiny utmego mërë obed na bër i kome,
ëka ölwök tyënë i möö jeituni.

25 Nywenyo më loro dhö wangkac na megî bino
bedo nywenyo kî mola,
ëka tükö më komî bino bedo na rom kî mwaka
më ditni.

26 “Ngat mörö ope na cal k'Obanga ka Jecurun,
na ngwëcö arii i polo më könyöni,
ëka kî dheo mërë i kom pöl.

27 Obanga na bedo naka naka ënë obedo ka
ponowu,
ëka cîngë tye pîny më tingowu malö.

Ën ryëmö langni ökö kî i nyimi,
nakun kobo ni, “Tyekgî ököl!”

28 Pî manön Icarael bino bedo kî kuc,
ëkwaë ka Jakob bino bedo gîni abonge ayela
mörö

i lobo na kal ëka köngö öläk na nyen tye ië,
kanya polo müö thoi tön pîny.

29 Cwinywu obed na yom un jö Icarael!
 Nga na cal kodwu,
 rok na Rwoth ölarögi?
 Ën obedo kwotwu ëka ngat na gwököwu
 ëka kî pala abadëni më aura.
 Langwu bino bedo gîni kî myël kom î nyimwu,
 ëka tyënwu bino nyönö kabedogî kîbëc.”

34

Thöö ka Muca

¹ Cë Muca öya kî î bar më Moab ëka öidhö malö î wi kidi Nebo naka î wi pem më Piciga, n'opimere kî Jeriko. Kî kany nön Rwoth onyutho nîné lobo kîbëc —cakërë kî î Gilead më thuno ködë naka î Dan,

² ëka kî lobo ka Naputali kîbëc, lobo ka Ephraim ëka Manace, lobo ka Yuda kîbëc më thuno ködë naka yo kuthö nam,

³ Negeb ëka lobo kîbëc cakërë kî î ora më Jeriko, n'obedo pacö më ötît, thuno ködë naka î Joar.

⁴ Cë Rwoth okobo both Muca nî, “Man ëné lobo na an acikara kî kwong both Abraam, Icaka ëka Jakob î karë na an akobo nî, ‘An abino müö both ëkwaëni.’ An amii inënö kî wangi, ëntö ba ibino cidhö yo löka tung ca.”

⁵ Ëka Muca, atic ka Rwoth, öthöö kunön î lobo Moab, kite na Rwoth obino okobo ködë.

⁶ Rwoth oiko ën î lobo Moab, î ora n'opimere kî Bet Peor, ëntö naka tin ngat mörö ope na ngeo kanya lyënë tye ië.

⁷ Muca onwongo tye kî mwaka 120 î karë na ën thöö, wangë onwongo pod neno na bër ëka kome thon onwongo pod tük.

⁸ Jö Icarael okoko gĩnĩ Muca kĩ ì bar mẽ Moab pĩ nĩnō pyer adek, naka karē mẽ koko kĩ kumo othum.

⁹ Yocua wod ka Nun onwongo opong kĩ cwiny mẽ ryēkō piēn Muca onwongo oketho cīngē ì kome. Cē jō Icarael owinyo gĩnĩ dhōgē ēka ōgwōkō gĩnĩ cīk na Rwoth ōcīkō kĩ Muca.

¹⁰ Anaka nōn, adwarpīny mōrō nōkēnē ba dōk onen na cal kĩ Muca ì lobo Icarael, na Rwoth ongere kōdē wang kĩ wang,

¹¹ n'otio anyuth mẽ tango nōn ēka kĩ gin mẽ aura gĩnĩ na Rwoth ooro ēn yo Ejip—both Parao ēka both edite mērē kibēc ēka lobo mērē kibēc.

¹² Ngat mōrō nōkēnē ope n'obedo tio tic kĩ tēkō na dit ēka kĩ gin mōkō na kelo lworō kite na Muca obedo ka tio ì nyim jō Icarael kibēc.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80